

Matyu

Jesus Wō Yen In Ibor

(Luk 3:23-38)

¹ Jesus Kristus wō yen, anĩ nē ibor gĩ isin, ĩ Dawid tubu, Abraham nē ibor.

² Isak, ne tama Abraham,
Jakop, ne tama Isak,
Juda, ne tura tar geid, idi temeid Jakop,

³ Feres Sera ado, nedi temeid Juda, nedi sineid Tamar,
Hesron, ne tama Feres,
Ram, ne tama Hesron,

⁴ Aminadab, ne tama Ram,
Nason, ne tama Aminadab,
Salmon, ne tama Nason,

⁵ Boas, ĩ yogon tama Salmon, Boas sina Rahab, ĩ haiden kayau, Israel kayau sã,
Obed, ĩ yogon tama Boas, yogon sina Rut, ĩ haiden kayau, Israel kayau sã,

Jesi, ne tama Obed,

⁶ King Dawid, ne tama Jesi.

Solomon, ne tama Dawid, Solomon ne sina ĩ, kulu kusĩ mudur Uria nē kayaun,

⁷ Rehoboam, ne tama Solomon,
Abiya, ne tama Rehoboam,

Asa, ne tama Abiya,

⁸ Jehosafat, ne tama Asa,
Jehoram, ne tama Jehosafat,
Usia, ne tama Jehoram,

⁹ Jotam, ne tama Usia,

Ahas, ne tama Jotam,
Hesekia, ne tama Ahas,

¹⁰ Manase, ne tama Hesekia,

Amon, ne tama Manase,
Josia ne tama, Amon,

¹¹ Jekonia in tura tar geid, nedi temeid Josia, sain anī bun,
Babilonem Israel tamo kayau guri difeid dirou,
Babilon kalabus bun dilen.

¹² Babilon kalabus bun dilen sain anī bunem,
Sieltiel, ne tama Jekonia,
Serubabel, ne tama Sieltiel,

¹³ Abiud, ne tama Serubabel,
Eliakim, ne tama Abiud,

Asor, ne tama Eliakim,

¹⁴ Sadok, ne tama Asor,

Akim, ne tama Sadok,

Eliud, ne tama Akim,

¹⁵ Eleasar, ne tama Eliud,

Matan, ne tama Eleasar,

Jakop, ne tama Matan,

¹⁶ Josef ĩ, ne tama Jakop, Josef ĩ Maria aiwa, Maria ĩ Jesus
gō fen, Jesus ĩ anī Kristus* dedig.

¹⁷ Anī nigin, ibor Abraham bun tamal ile Dawid, are ibor
14, Dawid bun tamal ile Babilon kalabus dilen, are ibor 14,
kalabus bun tamal ile Kristus wō yen, are ibor 14.

Jesus Kristus Wō Yen

(Luk 2:1-7)

¹⁸ Jesus wō yen anī eig fiya: In sina Maria Josefem yalouf
nigin digirkenen, anī ere, idi uruwom fau mois diyo ken,
Awa Uur Fateul bunem Maria bou adon anī dilen. ¹⁹ Josef,
Maria ne aiwa, ĩ nun karīya tamo, anī ĩ Maria atun meleid
bun yana sane ifenēya itor ken, yaor to wogō yen, ĩ namen
kayau anī itornēf nigin kisi fen.

²⁰ Agef kisif mog, Negur nē engel, imīya bun ĩ wagen
wō ye fen, iron, “Josef, Dawid naal, Maria wale fō bun on

* **1:16:** Grik od Kristus, are Hibru od Mesia dedig. Anī nē gariya are, kabī ifenēya nigin, Negurem ĩ bouwa bun moul fi felen.

kayau ibodōf nigin to kumĩ wo, ere nigin, Maria namen kare fef are, Awa Uur Fateul bunem. ²¹ Kayau anĩ kesu monog gō fouf, ò yana ù Jesus wouf, ere nigin, yogon tamo kayau mosor bun temeleid kel gei fouf.”

²² Negur nē od, profet sigor bun eig ye wogō yen anĩ kisi falauf nigin, enĩ ganan wō yen: ²³ “Kayau taulei kesu adouf, kesu monog gō fouf, idi yana dū Imanuel douf,”† anĩ nē gariya, “Negur ĩ ada ado.”

²⁴ Sain Josef irik yen, Negur nē engel wogō fiyen kilei agef fen, Maria yale fō bun irouya ile, in kayau ibodon. ²⁵ Anĩ ere, ĩ kayau ado bouweid bagu fiya san, ile kesu monog matu gō fen, anĩ Josef kesu yana yū Jesus yen.

2

Gaa Iseyan Keleĩ Tamo Ki Dilen

¹ King Herod nē sain bun, Jesus Betlehem fonō Judia distrik bun wō yen, anĩ bure fele di, keleĩ tamo gaa iseyan temeleid Jerusalem disin, ² idi to difen, “Kesu momou Juda neid king wō youf den anĩ, nain wō yen? Amã in barisa gaa iseyan melem mailen, ĩ yana malesauf nigin masin.”

³ King Herod od anĩ karĩ yen, ĩ wau morō fen, idi Jerusalem dibodon anĩ ganan geid waud morō fedin.

⁴ Agef fen, tamo kayau neid pris odudug ganan ado, lo ifelnēdiya tamo ganan iweigneid, guru dife di, ĩ to fedin, “Kristus nain bagai wō youf?” ⁵ Idi aiten dalen, “Oun Betlehem fonō Judia distrik an, age fouf nigin kulu profet eig ye itoton:

⁶ “ Ò Betlehem, Juda teneub bun,

ò Juda neid uyu irouya atun naal bagai sã,
fau ò bunem tamo yana odug ado wō youf,

ĩ anim neu tamo kayau Israel marau ibodōf.* ”

† 1:23: Asaia 7:14 * 2:6: Maika 5:2

⁷ Age de di, Herod gaa iseyan keleĩ tamo iminēyan iweigneĩd fen, ere sain bagai barisa anĩ wõ yen anĩ kelein. ⁸ Ĩ idi Betlehem sur feid fen, iron, “Ulagauf, kesu anĩ foinenem ed ge umirēgouf. Kesu anĩ fata gouf, kaisā bagai aya urokanag, ago ge di, ayag ele fen, yana alesauf.”

⁹ King nē od karĩ del fen, idi naab dale dilen, age de mog, barisa oun gaa iseyan idi dilen anĩ, ĩ ket uyu ile, kesu yenen nē modoũ an bagai dē yel ifaren. ¹⁰ Barisa anĩ dē yele di, dile fen, idi waud kulīya odug bagai adon. ¹¹ Fõ namen disorũ dilen, kesu sina Maria ado diledin, idi bobou dife fen, in yana dalesen, age de fen, nedi faa diwareĩd fen, safina ege luwa eneidi difenen, are gol, aa gaula sumeĩ nigin tõ fiyadig, moul aa bun tamal sumeĩ biya biya ado anĩ. ¹² Herod wagenem to ke de dilauf nigin, imīya bunem wedereid iron, anĩ nigin, idi neid teneub bun ke douf nigin naab taka dalen.

Isip Diya Dilen

¹³ Idi dilel mog, Odug nē engel, imīya bun Josef wagen wõ yen, ĩ iron, “Fã wo, kesu sina ado gei wo, uyag Isip uleg, an ubodōg uleg mog, aya fau arokonōf, gama bagai Herod kesu imirek yukesiyouf nigin age fef.” ¹⁴ Anĩ nigin, Josef fã yen, kesu sina ado gei feid, bõ turan Isip diya dilen. ¹⁵ Josef fau an ibod mog, Herod laa fen. Anĩ bun, Odug nē od, profet sigor bun eig ye wogõ yen anĩ, wõ ye kisi felen, “Isip bun tamal aya neu kesu aweignen.”†

¹⁶ Herod mogo kisi yalen, “Gaa iseyan keleĩ tamo aya didegnan,” ye fen, ĩ mogo fatuk bagai seye yen, keleĩ tamo naa nigin solo de dirokenen anĩ bun kisi es fe fen, Betlehem fonõ kalilĩ fiya anĩ kesu monog yar uru, yar tekelei anĩ ganan didenkesiyouf nigin bagai ari fedid di,

† 2:15: Hosia 11:1

didenkesin. ¹⁷ Anĩ bun, Negur, profet Jeremaia bunem eig ye wogõ yen anĩ, agef kisi felen:

¹⁸ “Rama fonõ ait taka,
inã wau gudũ fiya odug karĩ den,
Rahel inã odug gere tar nigin yalen,
ĩ taka nem bobo fiyẽf anĩ itoron,
ere nigin, yogon kesu taka to mata ibodon.”[‡]

Nasaret Ke Den

¹⁹ Herod laa fe di, Odug nẽ engel, Josef Isip ibod mog, imĩya bun ĩ wagen wõ ye fen, ²⁰ iron, “Fã wo, kesu sina ado gei wo, Israel teneub bun ule, ere nigin, idi kesu yukesiya nigin age difen are mogo gare den.”

²¹ Age fe di, Josef fã yen, kesu sina ado gei feid, Israel teneub bun diyok dilen. ²² Anĩ ere, ĩ, Akelaus ĩ mogo tama Herod fotokar Judia teneub lo fef ya anĩ karĩ ye fen, ĩ an ileyã nigin kumĩ yen. Imĩya bun weder iroun nigin, ĩ tokõ fel, Galili distrik ilen. ²³ Josef ilen, taun taka Nasaret dedig an ibodon. Anĩ bun, profet od eig de wogõ den anĩ kisi felen, “Ĩ Nasaret tamo douf.”

3

Jon Naan Igunẽdiya Tamo Naab Dodok Fenen

(Mak 1:1-8; Luk 3:1-18; Jon 1:19-28)

¹ Sain anĩ bun, Jon naan igunẽdiya tamo isin, gerere tuan Judia teneub bun biya od wogõ ye fen, ² iweig iron, “Wauĩ falei gei, ere nigin, saa tano mogo melsak.” ³ Tamo enĩ nigin profet Asaia eig ye wogõ yen, “Ait taka gerere tuan iweig iron, ‘Odug nẽ naab dodok gei, in naab madur gei.’ ”^{*}

[‡] 2:18: Jeremaia 31:15 ^{*} 3:3: Asaia 40:3

⁴ Jon ne gabar are kamel siwi, ï gaar gabar nem lû diwan anim luwa gu fedig. Yogon saaf totobi nin te ado. ⁵ Tamo kayau Jon wagen guru difen, idi Jerusalem, Judia teneub ganan, Jordan naan kalilî fiya anî adok bun temeleid. ⁶ Idi neid mosor yaor difele di, Jon Jordan naan igunēdin.

⁷ Anî ere, ï naan iguneïd mog, Farisia tamo, Sadusia tamo geid musei disi di, ileid fen, ï idi irokenēdin, “Ā, gogour sane gere tar! Didi isiyouf anî wal ge fen, uyagauf nigin aim irokenein? ⁸ Wauï falei gef are, age fiya gen faat biya ù gouf. ⁹ Ā aug nigin kisi to eig ye irōf, ‘Abraham nemã tamamã.’ Aya arokeneik, meein eneidi bun Negur sã irō di, Abraham gere tar wowã douf. ¹⁰ Safor aayũ gariyan mogo ibodok, aayũ ganan faat biya to yuk, are itu ira ken, yã malan irãf.

¹¹ “Wauï falei gef nigin, aya naan nem naan aguneik, anî ere, taka ï aya dumeun isiyouf, ï megeir barikã aya wal fiya, ayam yogon ye su inukeis kenēya kisi feleya sã.† ï Awa Uur Fateul yã ado nem naan iguneïf. ¹² ï susu fiya nē fok iman ado, ï yogon susu fiya nē mayã waï fouf, yogon wit biya are wit fō bun kuruf fen, wit ido yã mala faimud bun an irãf.”

Jon Jesus Naan Igunen

(Mak 1:9-11; Luk 3:21, 22)

¹³ Anî bure fele di, Jesus Jonem naan igunēf nigin Galili tamal Jordan naanũ isin. ¹⁴ Anî ere, Jon Jesus gudũ fiye ken, iron, “Onom aya naan igunaya, ere nigin aya garan usif?”

¹⁵ Jesus aiten yalen, “Arokonok nem ago. Negur nē madur bagai anî ganan kisi falauf nigin ada age tafouf, are biya.” Age ye di, Jon dōf age fen.

† **3:11:** Juda neid tobonunã anî, sain tamo yana ado isi di, idi neid kabî tamo in ye su nē malũ biru difedig.

¹⁶ Jesus naan yale bure fel fen, kaisã bagai ï naanũ tamal fã yen. Agef mog bagai, saa ilun bobog kã fele di, ï lof mog, Negur nẽ Awa Uur, ninã kuburir gen Jesus muduren isi, lalan ifenen. ¹⁷ Ait taka saa ilun iweig iron, “Eï neu Kesu, ï nigin aya wau laa fedig, ï nigin aya wau kulĩ yedig.”

4

Satan Jesus Kisi Fiyen

(Mak 1:12, 13; Luk 4:1-13)

¹ Anĩ bure fele di, Awa Uur Jesus itonẽ di, gerere tuan ile, Satanem kisi fiyen. ² Ì kuri ibodon, naa foti bõ foti bure fele di, ï naũ fen. ³ Kisi fiyẽya tamo Satan, ï bun wõ ye fen, irokenen, “Õ Negur Naal ouf are, meein enidi urõ di, bret falei fediyouf.”

⁴ Jesus Satan aiten yalen, “Negur nẽ Itotoya bun eig ye irok, ‘Tamo bretem dogol to mata ifenẽf, sã, od ganan Negur sigor bun isif anim mata ifenẽf.’* ”

⁵ Age fe di, Satan Jesus yale irou, fateul taun Jerusalem irou iselen, an tempel fõ soko ilun bagai inenẽ ifaren.

⁶ Satan iron, “Õ Negur Naal ouf are, ogo ufũ urã. Ere nigin, Negur nẽ Itotoya bun eig ye irok,

“ ‘Negur õ nigin yogon engel ari fedì di,

idi õ imedim ololon daleyõf,

age dife di, õ yẽ meein takam to itutu ouf.’† ”

⁷ Jesus Satan aiten yale iron, “Negur nẽ Itotoya taka buneg eig ye irok, ‘Odug ogon Negur kisi fiya bun to unenẽf.’‡ ”

⁸ Baban, Satan Jesus yale irou, arei odug ilun biya isel fen, teneub enei nẽ tano ganan, nedi biya fiya adok

* **4:4:** Diuteronomi 8:3 † **4:6:** Sam 91:11, 12 ‡ **4:7:** Diuteronomi 6:16

ifelnen. ⁹ Satan iron, “Enidi ganan aya afonōf, ò wageun bobou wo, selu wabiyouf are.”

¹⁰ Jesus Satan irokenen, “Satan, utorna ule! Ere nigin, Negur nē Itotoya bun eig ye irok, ‘Odug ogon Negur seli wabi fen, ï dogol aruna walouf.’§ ”

¹¹ Age ye di, Satan Jesus itornē ile di, engel disi Jesus aruna dalen.

Jesus Biya Od Wogōya Gariya Inon

(Mak 1:14, 15; Luk 4:14, 15)

¹² Jesus mogo, Jon kalabus ibodon anī karī ye fen, kel Galili distrik ilen. ¹³ Jesus Nasaret taun itor ile, Kapenaum taun ibodon, Kapenaum are Galili daliyou sirin, Sebulun Naptali ado idi neid teneub akor bun ibodon. ¹⁴ Od profet Asaia eig ye wogō yen anī kisi falauf nigin, agef wō yen,

¹⁵ “Sebulun nē teneub, Naptali nē teneub,

are naab maaīwō ileyen, Jordan naan sitakā,

Galili distrik haiden Israel sā anidi dibodok nē,

¹⁶ tamo kayau gugum bun difaren,

idi lalan odug dilen,

tamo kayau laa teneub ado laa nē buri bun dibodon

idi bun lalan iran.”*

¹⁷ Sain anī bunem ilen anī, Jesus biya od wogōya gariya inon, “Wauī falei gei, ere nigin, saa tano mogo melsak.”

Jesus In Dō Fiya Tar Uyulil Iweignēdin

(Mak 1:16-20; Luk 5:1-11)

¹⁸ Jesus Galili daliyou yeri iyok isil fen, mala iran uru tura ado ileidin, Simon yana taka Pita, yogon tura Endru ado. Idi maaī daliyou kakāg diran, ere nigin, idi gau yaleya tamo. ¹⁹ Jesus iron, “Usig, aya dō wiyag len, aya ā tamo gei fiya tamo aneneif.” ²⁰ Kaisā bagai, idi neid kakāg folō difel fen, Jesus dō difen.

§ 4:10: Diuteronomi 6:13 * 4:16: Asaia 9:1, 2

²¹ Anenem iyok ile fen, Jesus baban mala iran uru tura ado ileidin, Jems Sebedi ne naal, yogon tura Jon ado. Idi waag bun nedi temeid Sebedi geid kakāg madur difedif dibodon. Jesus disiyouf nigin iweignēdin. ²² Kaisā bagai, temeid waag ado ditor ken, Jesus dō difen.

Jesus Dagi Adodo El Fedin

(Luk 6:17-19)

²³ Jesus Galili distrik akor anī adok iyo ken, Juda neid uub fō bun od ifelneid, saa tano ne biya od anī wogō fedin, agef fen, tamo kayau atun dagi fire fire ado ilōyabidiya adok el fedin. ²⁴ Ī nigin od anī, Siria teneub ganan bun iyokelen, age fe di, tamo kayau idi, dagi taka taka adodo anidi ganan Jesus wagen guri difeid, disin, idi darau odug biya adodo, idi kaa sesen adodo, idi mir adodo, idi bouweid ilolaisidiya anī, Jesus el fedin. ²⁵ Guru fiya odug, Galili temeleid, Dekapolis† temeleid, Jerusalem temeleid, Judia teneub ado Jordan naan sitakā teneub akor anī ganan tamo kayau Jesus dō difen.

5

Jesus Arein Biya Od Wogō Yen

(Luk 6:20-23)

¹ Gama tamo kayau musei guru dife di, Jesus ileid fen, arei wala bun isel ibodon. Yogon dō fiya tar Jesus wagen disin. ² Jesus gariya ino ifelneid fen, iron,
³ “Aib idi uur nigin maleg dibodok, gama idi el fedif,
 ere nigin, saa tano are idi neid.
⁴ Aib idi waud gudū fedif, gama idi el fedif,
 ere nigin, idi waud yo fediyouf.
⁵ Aib idi molol dibodok, gama idi el fedif,
 ere nigin, idi teneub akor adouf.

† 4:25: Anī nē gariya, Ten Taun.

- ⁶ Aib idi Negur nē madur bagai nigin naũ fedif, naan ail fedif, gama idi el fedif, ere nigin, idi weit fediyouf.
- ⁷ Aib idi waud ifenēdif, gama idi el fedif, ere nigin, idi wau ifenēya dalouf.
- ⁸ Aib idi waud bun karētut, gama idi el fedif, ere nigin, idi Negur dilouf.
- ⁹ Aib idi maur gudū difedig, gama idi el fedif, ere nigin, idi Negur gere tar difediyouf.
- ¹⁰ Aib idi Negur nē madur bagai nigin darau dalef, gama idi el fedif, ere nigin, saa tano are idi neid.

¹¹ “Aib ā aya nigin tamo kayau idi kono diyeik, darau difeneik, idegēya bun od sane ganān ā bun dirarak, gama ā nigin el yeik. ¹² Wauī kulīg fen, sereg, ere nigin, āgenei mala solo saa tano bun odug, profet idi ket dibodoneg kulu darau age fiya bagai dalen.

Sol Lalan Ado
(Mak 9:50; Luk 14:34, 35)

¹³ “Ā teneub enī nē sol, anī ere, sol in kai sa kalauf are, ere naig fe di, baban kai adouf? Ī baban ereb kabī taka ifenēya kisi feleya sā, diraile di, tamo anī teten dilef, disi difouf dogol.

¹⁴ “Ā teneub enī nē lalan. Taun taka uya bun ibodok anī inokeleya kisi feleya sā. ¹⁵ Age fiya gen, tamo kayau lam tō de fen, beī kur to dinouf. Age fiya ban, idi yoki bun dis-eginnē di, anī lalan tamo ganān fō anī bun ifenēdif. ¹⁶ Age fiya bagai, āgenei fula fiya tamo kayau lalan ifenēdiyof, ago ge di, tamo kayau idi āgenei tobonuneī biya anī dile fen, āgenei Temeī saa ilun ibodok anī seli dabiyof.

Lo Od Kisi Fel Age Fen

¹⁷ “Aya asin anĩ, Moses nẽ Lo, profet neid od ado alelauf nigin asin to gouf, aya anĩ yaleleya nigin to asin, anĩ kisi afalauf nigin asin. ¹⁸ Aya momoi bagai arokeneik, sain saa teneub ado iminkeleya sã mog, sifa naal bagai, pen togo fiya anĩ Lo bun taka to fitol yale iminkalauf, idi anĩ ganan dibod mog, erob erob ganan kisi falauf. ¹⁹ Aibem taka, itãfiya enĩ nẽ tekelei naal bagai anĩ to dõf fen, tamo tunĩ ĩ dõ difiyẽ age difouf nigin ifelnẽdiyof are, ĩ saa tanon yana naal bagai youf, anĩ ere, aib taka itãfiya eneidi dõf agef kisi fel ifelnẽdiyof, saa tanon yana odug yalouf. ²⁰ Anĩ aya arokeneik, ãgenei madur bagai anim, Farisia tamo ado lo ifelnẽdiya tamo neid madur bagai to wal gouf are, ã saa tanon iley a nigin kisi feleya sã bagai.

Seyeya Nigin Ifelnẽya

(Luk 12:58, 59)

²¹ “Tamo itãfiya kulu eig den anĩ karĩ gen, ‘Õ tamo to ukeis, taka ne tã yukesif are, es fiya bun ifarauf.’* ²² Anĩ ere, aya ã arokeneik, aibem taka tura seye ifenek are, ĩ es fiya bun ifarauf. Baban, aib taka tura irokenek, ‘Daku,’ ĩ kot bun ifarauf. Takag, aibem irok, ‘Õ neneya!’ age youf, hel nẽ yã uruwa dõya kelẽ fiyek.

²³ “Anĩ nigin, õ Negur bun sesewi wou fenẽ kisi wale, alta garan safina urou ule fen, õ turã õ bun nauseir ado anĩ õ weder fokõ fouf are, ²⁴ safina an alta garan utor yen, kel ule turã ado komo weleg fen, gama usi, Negur safina wenẽ, sesewi wouf.

²⁵ “Aib õ kot bun irouleyõya nigin, ã uruwom naab luwe uleg fen, on kiwai tamo ado kaisã komo gouf. Sãf, ĩ õ es fiya tamo bun inenõf. Age fe di, es fiya tamo õ irouyõ polis imeid bun ino di, idim õ kalabus bun dirãyõf.

* 5:21: Eksodas 20:13

²⁶ Aya momoi arokonok, ò kalabus bun kutû yesiya sã mog, wareg ganan unolauf.

Seseirã To Inoyauf Nigin Ifelnẽya

²⁷ “Tamo ãtãfiya eig den anĩ karĩ gen, ‘Õ seseirã to uno.’†

²⁸ Anĩ ere, aya ã arokeneik, taka ã malam kayau lof fen, mala yũ yalef, ã mogo wau bun kayau anĩ bun seseirã inol.

²⁹ Õ malã biyalem mosor bun inenõf are, ubodol uraile. Õ boũ adok hel bun irãya anĩ fotokar, ò boũ tunĩ taka iminkalauf, are deuf. ³⁰ Õ imã biyalem mosor bun inenõf are, gudũ uraile. Õ boũ adok hel bun irãya anĩ fotokar, ò boũ tunĩ taka iminkalauf, are deuf.

*Tamo Kayau Ado Bagu Fiya To Fara Fiyauf Nigin Ifelnẽya
(Matyu 19:9; Mak 10:11, 12; Luk 16:18)*

³¹ “ãtãfiya eig fe yenen, ‘Aibem taka yogon aiwa iruwau fenẽ, kayau ado bagu fiya anĩ fara fiya nẽ pepa ifen ken, bagu fiya fara fouf.’‡ ³² Anĩ ere, aya ã arokeneik, aibem taka, yogon kayau ã tamo taka ado to seseirã dino mog, iruf are, ã kayau anĩ seseirã naab bun inenek. Anĩ aibem taka kayau anĩ yalef, tamo anĩ mogo seseirã inof.

Wau Kuturoleya Od Nigin Ifelnẽya

³³ “Takag, tamo ãtãfiya kulu eig den anĩ karĩ gen, ‘Ã wau kuturoleya od anĩ to waleleg. Ã wau kuturoleya od, Odug mala bun unogen anĩ kulatun gouf.’ ³⁴ Anĩ ere, aya arokeneik, od megeir ifenẽya bun, saa mala bun to bagai wouf, ere nigin, saa are Negur nẽ ibodõya modoũ. ³⁵ Oo teneub mala buneg to wouf, ere nigin, teneub are Negur ye inoya nẽ sawa. Oo Jerusalemeg mala bun to wouf, ere nigin, are King Odug in taun yana. ³⁶ Õ muduremeg anĩ nigin megeir to unouf, ere nigin, ò ogon fatiya age fe di,

† 5:27: Eksodas 20:14 ‡ 5:31: Diuteronomi 24:1

lalau be karos be taka wōya kisi feleya sã. ³⁷ ã nigin yo yeya are yo gouf, sã de sã gouf dogol, od enĩ wal fe fen, tobol fiya are Satan bunem isif.

Sane Solo Fiya Nigin Ifelnēya

(Luk 6:29, 30)

³⁸ “Tamo ãtãfiya eig den anĩ karĩ gen, ‘Mala fagã difouf, mala solo abag mala fagã wo. Waila are waila tura.’[§] ³⁹ Anĩ ere, aya arokeneik, tamo sane mala solo to wenē. Tamo taka ogon walã biyalē fakã fouf are, falei wel len, walã sitakãg fakã fouf. ⁴⁰ Tamo taka ogon kolos yalouf nigin kot yō fenē, malakaĩ ogon saket anĩg utorken. ⁴¹ Tamo taka mail tekelei ileya nigin nugo yōf, malakaĩ uruwom mail uru ulagauf. ⁴² Aibem ereb taka nigin to yok, are wenēf. Aibem ereb taka wareg õ bun yalou fenēf, õ to dudum wiyē.

Kiwai Nigin Wau Laa Fiya

(Luk 6:27, 28, 32-36)

⁴³ “Tamo ãtãfiya eig den anĩ karĩ gen, ‘Õ nē tã nigin waũ laaf fen, on kiwai anĩ kiwai wenē.’^{*} ⁴⁴ Anĩ ere, aya arokeneik, ãgenei kiwai nigin wauĩ laaf fen, tunĩ darau difeneik idi nigineg kosē gouf. ⁴⁵ Ago gouf are, ã Temeĩ saa ilun ibodok gere tar wowã gouf. Ĩ yogon gaa sur fef, tamo sane, tamo biya adok daledig, taka uyēg sur fef, tamo madur, tamo madur sã adok ifenēdidig. ⁴⁶ Idi ã nigin orodidig anidi nigin dogol wauĩ laa fouf are, ere mala solo anĩ ã walogouf? Are takis yaleya tamog to age difedig de? ⁴⁷ ã tureĩ tar dogol aan wiyēdigouf are, ere anĩ tunĩ wal fediya ago gef? Haiden are idig, anĩ to age difedig de? ⁴⁸ Anĩ nigin, Temeĩ saa ilun ibodok ĩ madur bagai gen, ãg de madur bagai agog.

§ 5:38: Eksodas 21:24; Levitikas 24:20; Diuteronomi 19:21
Levitikas 19:18

* 5:43:

6

Maleg Isennēya

¹ “Ā lo welegei, āgenei tobonuneī madur anī seluma kulō difouf ge mā, anī tamo kayau meleid bun yaau to du wog. Ā ago gouf, Temeī saa ilun ibodok mala solo to ifeneīf.

² “Sain ō maleg tamo usennēdiyou fenē, ō anī taur to fū fen, ait bagauf, mala yaleya tamo Juda neid uub fō bun ado naabur, tamo idi seluma kulō difouf de fen, age difedig gen. Aya momoi arokeneik, idi anī nē mala solo adok mogo dalen. ³ Anī ō maleg tamo usennēdif, on imā kilē to keleī mog, imā biya melē age fouf, ⁴ anī ō iminēyan dor walef. Ago di, on Tamā, ō iminēyan agol, ile fen, mala solo ifonōf.

*Kosēya**(Luk 11:2-4)*

⁵ “Sain ā kosē gouf bun, ā mala yaleya tamo age difedig gen to agog. Idi tamo dilemāf de fen, Juda neid uub fō namen ado naab kaleyan difar fen, kosēya orodidig. Aya momoi arokeneik, idi anī nē mala solo adok mogo dalen. ⁶ Sain ō kosē wou fenē, ō ogon aabē ule, sukar unol fen, Tamā Negur, ī iminēyan ibodok, kosē wiyē. Anī on Tamā ō iminēyan agol, ile fen, mala solo ifonōf. ⁷ Sain ā kosē gouf, haiden age difedig gen, od musei to dīg, ere nigin, idi neid kisi, nemā od musei nigin karī famāf de fen, idi od musei biya wogō dedig. ⁸ Ā, idi age difedig gen, to agog, Negur āgenei Temeī ī ereb ā lau gef anī mogo keleī mog, dum ī to wiyēgedig.

⁹ “Kosē gou fenē, ā eig wog urōgouf:

“ Ō nemā Dei ō saa ilun ubodok,
ō yanā fateul ibodōf,

¹⁰ ogon tano isiyouf,

ogon oroyok saa ilun age fef gen,
tenebur eineg age fouf.

¹¹ Saaf naa enī nē wanamāf.

¹² Ō amā nemā mosor nigin wederē tu kalauf,
are idi amā bun mosor dinof, amāg idi neid mosor
nigin wederamā tu kelef gen.

¹³ Kisi famāya bun to uroulemāf,

sesen anī bun tamal amā walelnamāf.*

¹⁴ Tamo idi ā bun mosor dinoyeif, ā idi neid mosor nigin
wedereī tu kalauf are, āgenei Temeī saa ilun ibodok, īg
āgenei mosor nigin weder tu kalauf. ¹⁵ Anī ere, ā tamo idi
neid mosor nigin wedereī to tu kalauf are, āgenei Temeī,
īg āgenei mosor nigin weder to tu kalauf.

Kuriya Nigin Ifelnēya

¹⁶ “Sain ā kuri gouf, mala yaleya tamo sēya nē neweid
age difedig gen to ago gei, ago gouf, tamo anī dile fen kuri
def douf. Aya momoi arokeneik, anī nē mala solo adok
mogo dalen. ¹⁷ Anī ere, sain ō kuri wouf, fatiyā moul u ken,
nawā usurūf. ¹⁸ Anī bunem, ō kuri bek oo sā be, tamo idi ō
nigin to keleī youf. Ogon Tamā, Negur iminēyan ibodok, ī
yogo dogol keleī youf, anī ogon Tamā ō iminēyan ereb ago
wouf ile fen, mala solo ifonōf.

Safina Biya Bagai Saa Ilun

(Luk 11:34-36; 12:33, 34; 16:13)

¹⁹ “Aug nigin safina biya biya tenebur ein to kuru wog.
An dedek yāf, maat te yūf, bē tamog narī de, bē dalouf.
²⁰ Ā aug nigin safina biya biya saa ilun kuru wog. An
dedek to yāf, maat te to yūf, bē tamog to narī de, bē
dalouf. ²¹ Ogon safina biya biya ibodok nē an, ogon waūg
an yenēf.

* **6:13:** Itotoya tunī agef yenek: walelnamāf. Anī tano, megeir ado, fula fiya medeīya faimud ogon ibodōf. Momoi.

²² “Mala are bouwa nē yal. Õ malã biyauf are, ogon bouwã ganan lalan lauf. ²³ Anĩ ere, õ malã sane lauf are, ogon bouwã ganan gugum kalauf. Lalan õ ado anĩ gugum kalauf, gugum are odug bagai!

²⁴ “Aib taka ĩ yogon marau uru bun kabĩ to yalouf. Anĩ taka kiwai ifen ken, taka anĩ nigin wau laa fouf. ĩ taka anĩ dõf fen, taka anĩ mala irim fouf. Anĩ nigin, ã uru to aruneid walogouf, Negur ado moni.

To Osig

(Luk 12:22-31)

²⁵ “Age fiya nigin, aya ã arokeneik, ã ãgenei bouweĩ mata ibodõf nigin to osig fen, ere saaf tãf, ere naan tãf gouf. ã ãgenei bouweĩ nigin to osig fen, ere gabar tafilaĩf gouf. Mata anĩ saaf wal fiya, bouwa anĩ gabar wal fiya sã de? ²⁶ Saa ilun ã ninã uledigouf, idi saaf to ditenēdig, idi saaf u de fen, kin to dinodig, anĩ ere, ãgenei Temeĩ saa ilun yogo ifoutnēdidig. ã idi anĩ wal fediya sã de? ²⁷ ã takam yogon mata nigin osi ye fen, aua tekelei tobol fiya kisi feleya de?

²⁸ “Ere nigin ã gabar nigin osi gef? Dubur aa munĩ, naig fe odugedig anĩ ulogouf. Idi kabĩ to daledig, to diwadig. ²⁹ Anĩ ere, aya ã arokeneik, kulu King Solomoneg, yogon saki gegē biya biya ifonun anim, aa munĩ eig fediya taka to wal fen. ³⁰ Anĩ ere, Negur, dubur aa munĩ gama dogol ifarau, nile di, yã irãf anĩ, agef naki fediyouf are, ã bun idi wal fediya bagai Negur ifounneĩf, age fiya sã de, ã momoiya naal bagai ado? ³¹ Anĩ nigin, to osi wog urõgouf, ‘Ere saaf ada tãf?’ oo ‘Ere naan ada tãf?’ oo ‘Ere gabar ada tafilaĩf?’ ³² Haiden idi enĩ ganan nigin meleid dimirēdig. ãgenei Temeĩ saa ilun lau gef anĩ ganan keleĩ. ³³ Anĩ ere, Negur nē tano ado yogon madur bagai ketem umirēg, ago ge di, safina eneidig ganan ifeneĩf. ³⁴ Age fiya nigin, naa

nil nē anī nigin to osi wog, nil nē are yogo nigin osi youf. Naa mugu mugu nē morō are idi dogo dalouf.

7

Tunī Es Fediya

(Luk 6:37, 38, 41, 42)

¹ “Taka to es wiyēg, ago gouf, āg es yeif. ² Anī nigin, tunī es wedigef gen, āg agef es yeif. Āgenei es fiya nē naab de tekelei bun āg agef es yeif.

³ “Ō ere nigin turā mala teteur lo fen, ō ogon aa masak malā bun ibodok anī to ulef? ⁴ Aa masak ogon malā bun ibod mog, naig fe di, turā nigin dogol urokenek, ‘Utor len, aya ogon malā teteur alelkonōf’? ⁵ Ō mala yaleya tamo, ō ogon malā bun ketem aa masak walel kelē wol fen, dum turā bun mala teteur walelauf.

⁶ “Ereb fateul anī gaū to urakenēdig. Āgenei maaī tuwa meli bagai pel anī bor to urakenēdig. Ā ago gouf, yedim lalai difouf. Age de fen, falei del, ā serek de fisik diyeif.

To Wouf, Umirēf, Godu Wouf

(Luk 11:9-13)

⁷ “To gouf, agef ā ifeneif; umirēgouf, ā gurug gouf; godugodu gouf, ā sukar kā feneif. ⁸ Aibem taka to fef, yalouf; aibem taka imirek, gurug fouf; aibem taka godugodu fef, sukar kā fel kenēf.

⁹ “Ā anī takam, ī naal bret nigin to fef, ī meein ifenēf de? ¹⁰ Takag, ī gau nigin to fef, ī gogour ifenēf de? ¹¹ Seseneī bagai ā, āgenei kesu safina biya biya anī ifenēdiya ā keleī bagai, age fiyauf are, Temeī saa ilun ibodok, safina biya biya aib idi to difiyek, āgenei wenēdigedig anī wal fiya, idi ifenēdiyof! ¹² Anī nigin, erēb erēb ganān bun, erēb taka idim age diyeif anī oroyeik anī, āg idi nigin ago gouf. Od enī Lo od ado Profet od neid kaū.

*Bobog Kidō Bobog Bilalā Fiya Ado**(Luk 13:24)*

¹³ “Bobog kidō bun usorug ulagauf. Ere nigin, daū fiya bun ileya nigin bobog bilalā fiya, naab odug. Tamo kayau musei naab odug anī diledig. ¹⁴ Anī ere, mata tano bun ileya nigin bobog kidō, naab naal. Anī nigin, tamo kayau teke tekeleim dogol, anī fata difedig.

*Aayū Yogon Faat Ado**(Luk 6:43, 44; 13:25-27)*

¹⁵ “Idegēya profet anidi lo weledigei. Idi ege sipsip siwi difoun ken, ā garan disif, anī ere, idi namedin gaū kuī sane ado. ¹⁶ Idi neid faat yūf bun, ā idi dogo anibo be biya be ulogouf. Tamo kayau idi wei biya barik bun, gira udum bun daledig de? ¹⁷ Age fiya gen, aayū biya are faat biya yūdig, aayū anibo are faat anibo yūdig. ¹⁸ Aayū biya ī, faat sane yūya kisi feleya sā, aayū anibo are faat biya imaya kisi feleya sā. ¹⁹ Aayū ganān faat biya to imaf are, ditu dale yā malān dirāf. ²⁰ Age fiya nigin, idi neid faat yūdig bunem, ā idi nigin yaor keleī youf.

²¹ “Idi aya ‘Odug, Odug’ de fen dirokanadig, idi ganān saa tanon to dilauf. Aibem ī, neu Dei saa ilun ibodok in oroya dōf age fef anim dogol ilauf. ²² Naa anī bun, musei aya dirokanauf, ‘Odug, Odug, amā ō yanā nem profet od wogō maun, amā ō yanā nem kaa sesen maruid fen, ō yanā nem memelik musei manodin!’ ²³ Age de di, aya yaor arokenēdiyof, ‘Aya ā keleī sā. Ā sane gide gedig, uyaleleg!’

*Fō Inoya Nē Keleī Tamo Neneya Tamo Ado**(Luk 6:47-49)*

²⁴ “Age fiya nigin, taka ī neu od eneidi karī ye fen, dōf age fef, ī keleī tamo yogon fō meein teten inon gen. ²⁵ Sain uyē burabura isin, kuwei odug ile, solalā fel fen, yau odug

fã ye fen, fõ yoũ fe di, to kubũ yen, ere nigin, tor gariya meein teten inon. ²⁶ Anĩ ere, aib taka ã neu od eneidi karĩ ye fen, to dõf age fef, ã neneya tamo yogon fõ subusir teten inon gen. ²⁷ Sain uyẽ burabura isin, kuwei odug ile, solalã fel fen, yau odug fã ye fen, fõ yoũ fe di, kubũ ye narĩf irailen.”

²⁸ Od ganan Jesus wogõ ye idikele di, tamo kayau in od ifelnẽdin anĩ nigin terẽ den, ²⁹ ere nigin, Jesus ifelnẽdin are, taka ã yana adom gen age fiya od wogõ fedin, idi neid lo ifelnẽdiya tamo age difedig gen sã.

8

Tamo Lepra Dagi Ado

(Mak 1:40-45; Luk 5:12-16)

¹ Jesus arein tamal kutũ yesi di, tamo kayau musei dõ difiyen. ² Tamo lepra dagi ado isi, Jesus wagen ibor bobou fe fen, irokenen, “Odug, õ waũ irom are, aya el fiyaya nigin kisi feleyam.”

³ Jesus ima iran, tamo anĩ kobũf fen, iron, “Aya wau irok, bouwã biyaf.” Age ye di, kaisã bagai yogon lepra dagi sa kelen. ⁴ Jesus irokenen, “Õ aib taka to urokenẽf. Õ ogo pris wagen ule, bouwã ufelne ken, Moses nẽ od dõ fen, safina sesewi wo, anĩ bunem õ biya lel anĩ, tamo kayau dilouf.”

Kusĩ Tamo Neid Orowa Nẽ Momoiya

(Luk 7:1-10)

⁵ Jesus Kapenaum taun wõ ye di, Rom kusĩ tamo neid orowa Jesus wagen isi fen, isennẽf nigin to fiyen. ⁶ Ì iron, “Odug, neu kabĩ tamo fõ bun darau odug ado ilolaisin yenek.”

⁷ Jesus irokenen, “Aya ele, el afiyẽf.”

⁸ Age ye di, kusĩ orowa aiten yale iron, “Odug, aya to biya nigin aya kisi afef, õ neu fõ bun to usiyouf. Malakaĩ, õ

od dogol urō di, anī neu kabī tamo dagi sa kalauf. ⁹ Aya yug nigin age fiya, ayag neu odug anī farumen abodok, kusī tamo idig aya farumeun dibodok. Aya taka enī arokenek, ‘Ule’ afiyek, ī ilauf. Aya taka arokenek, ‘Ō usi’ au di, ī isidig. Neu kabī tamo enī ago afiyek, ī agef age fedig.”

¹⁰ Od anī kusī orowa age irō di, Jesus od anī karī ye, terē ye fen, tamo kayau dō difiyen anidi irokenēdin, “Aya ā momoi arokeneik, aya Israel bun āgenei momoiya odug eig fiya taka to ailen. ¹¹ Aya arokeneik, musei fau gaa iseyan gaa ileyan temeledim disiyouf, idim modoū dalel fen, saa tano nē tar odug bun, Abraham, Isak, Jakop geid saa tanon dibodōf. ¹² Anī ere, Israel tamo kayau musei Negurem idi nigin saa tano dodok fe kenēdin anidi, fau dumeitur gugum bē mayarē irarāf, an inā odug ado firi de fen, goboreid kikokō youf.”

¹³ Jesus age wogō yel fen, kusī orowa irokenen, “Kel ule! Ō ogon momoiya kilei bagai, ō nigin dōf agef ifonōf.” Sain anī wogō ye mog bagai, yogon kabī tamo dagi sa kelen.

Jesus Dagi Tamo Kayau Musei El Fedin

(Mak 1:29-34; Luk 4:38-41)

¹⁴ Jesus Pita nē fō bun ilen, Pita nē mam bouwa uruwa odug ado fatarē yen mog, ilen. ¹⁵ Jesus kayau ima anī kobū fe di, bouwa uruwa fara fiye kele di, kaisā bagai kayau fā yale, Jesus aruna yalen.

¹⁶ Gugum mog, tamo kayau kaa sesen adodo musei guri difeid, Jesus wagen disin. Age dife di, Jesus od nem kaa sesen iruid fen, dagi adodo ganan el fedin. ¹⁷ Jesus enī ganan age fen, are Negur ī, profet Asaia bunem od eig ye wogō yen anī kisi falauf nigin:

“Ī yogo neda ilōyabiya yales,
neda dagi faali fen.”*

* 8:17: Asaia 53:4

Jesus Dō Fiyēya Bun Kafī Fiya Fire Fire
(Luk 9:57-60)

¹⁸ Sain anī Jesus mala iran, tamo kayau musei kalilī difiyē di, daliyou sitakā dibal dilauf nigin in dō fiya tar irokenēdin. ¹⁹ Age fiyeīd mog, lo ifelnēdiya tamo taka wagen isi fen, irokenen, “Tise, õ narib ulauf are, aya õ dō ayōf.”

²⁰ Jesus aiten yale iron, “Gaū kuī idi yenēya nē modoū ku ado, ninā lalo bun diyok idi uru ado, anī ere, Tamo Naal ī mudur inoya nē modoū sã.”

²¹ In dō fiya taka irokenen, “Odug, fau de, folō wiya len, aya ele fen, neu dei mū afel fen.”

²² Anī ere, Jesus ī irokenen, “Õ aya dō wiya, laa tamo idi, laa tutur abob mumã difouf.”

Jesus Uyē Yau Ado Irokenēdi Di, Kee Delen
(Mak 4:36-41; Luk 8:22-25)

²³ Jesus waag owor isile di, in dō fiya tar ī geid dilen. ²⁴ Idi keleī sã mog, maaī daliyoun yau total fã yen. Agef mog, maaī odug fã ye, waag yū di, waag anī naanū imutkesilau fenē age fen. Anī ere, Jesus mulã yenen. ²⁵ In dō fiya tar dilen, turī difiyē, diron, “Odug, usennamã! Amã mogo naanū mamutatã gare mausiyou fenē!”

²⁶ Jesus aitedin yalen, “Āgenei momoiya naal bagai, ere nigin ā fatuk kumī gef?” Age ye fen, ī fã ye, maaī yau ado ou fiyēdi di, oditekei kee delen.

²⁷ Tamo idi terē de fen, to difen, “Tamo eī naig fiya bagai? Maaī yau ado karī difiye ken, dō difef!”

Tamo Uru Kaa Sesen Adodo El Fedin
(Mak 5:1-17; Luk 8:26-37)

²⁸ Jesus Gadara neid teneub bun daliyou sitakā ilen, kaa sesen adodo tamo uru matmat bunem dile fen, Jesus tarabã difen. Tamo uru kuī bagai diledin nigin, tamo

ganan naab anĩ to diyōdig. ²⁹ Anĩ idi diweig fen, diron, “Negur Naal, õ amã nigin ere naig wamãf? Õ naa wenen anĩ fau mog, gama bagai daig wamã fenẽ ein usif de?”

³⁰ Idi difaren sitakã gerõ nuwa an, bor musei saaf doko diyon. ³¹ Kaa sesen idi Jesus digonen, “Õ tamo eneidi bun tamal urumã fenẽf are, amã bor musei namedin sur wamãf.”

³² Jesus kaa sesen irokenẽdin, “Uleleg!” Idi ulolõ deis fen, diselen bor namedin dilelen. Bor ganan gududu de bebeigir disil, daliyoun naanũ gare desin. ³³ Bor lo fiya tamo diya, taun disil fen, Jesus kaa sesen irudi di, bor gare den anĩ ganan wogõ den. Age de fen, idi ereb tamo uru kaa sesen adodo bun wõ yen anĩ nigineg wogõ den. ³⁴ Age de di, tamo kayau taun temeleid adok, Jesus ileyã nigin dilen. Idi Jesus dile fen, idi neid fonõ anĩ itor ilauf nigin digonen.

9

Jesus Tamo Bouwa Ilolaisin Anĩ El Fiyen

(Mak 2:1-12; Luk 5:17-26)

¹ Jesus waag taka sõ ye, daliyou ibal fen, yogon taun ilen.

² Tamo tunĩ tamo bouwa ilolaisin gabgab bun yen mog, Jesus wagen diroulen. Idi neid momoiya Jesus ile fen, Jesus tamo bouwa ilolaisin irokenen, “Kesu, waũ unois, ogon mosor alelkonok.”

³ Anĩ karĩ de fen, lo ifelnẽdiya tamo tunĩ, idi neid kisi bun diron, “Tamo eĩ Negur kono fiyek!”

⁴ Idi neid kisi kelei ken, Jesus iron, “Ã ere nigin wauĩ bun kisi sane agef wõ yef? ⁵ Nanĩ anĩ irõya nigin karika: ‘Ogon mosor alelkonok,’ de? Oo ‘Fã, ufar uyok ule’? ⁶ Anĩ ere, Tamo Naal ï tenebur ein mosor yaleleyã nigin yana ado anĩ ã kelei youf nigin...” Age ye fen, tamo bouwa ilolaisin irokenen, “Fã ufar, ogon gabgab wale urou, fonõ ule.” ⁷ Age ye di, tamo fã yale, fonõ ilen. ⁸ Tamo kayau

guru difen ganan anĩ meledim dile fen, terẽ de kumĩ den. Negur yogo tamo yana enĩ ifenẽdin anĩ nigin, idi Negur yana dalesen.

Jesus Matyu Iweignen

(Mak 2:13-17; Luk 5:27-32)

⁹ Jesus an tamal iyok ile fen, mala irakelen, tamo yana Matyu takis yaleya fõ bun ibod mog, ilen. Jesus ã irokenen, “Aya dõ wiya.” Age ye di, Matyu fã yale, Jesus dõ fen.

¹⁰ Jesus Matyu nẽ fõ bun bõ saaf yõ mog, takis yaleya tamo, mosor ado tamo kayau musei disi fen, Jesus in dõ fiya tar geid weim saaf don. ¹¹ Farisia tamo idi anĩ dile fen, idi Jesus nẽ dõ fiya tar to difedin, “Ere nigin ãgenei tise, takis yaleya tamo, mosor ado tamo kayau geid saaf doko?”

¹² Od anĩ Jesus karĩ ye fen, iron, “Idi bouweid biya bagai, dokta gein ileyã nigin to waud yenẽdig, tamo dagi ado idim dogol, dokta gein ileyã nigin waud yenẽdig. ¹³ Uleg fen, od enĩ dir ge fen, kaũ ere yeĩf anĩ keleĩ youf, ‘Aya wau ifenẽya anĩ orouf, sesewi fiya sã.’* Anĩ nigin, aya tamo madur anidi iweignẽdiya nigin to asin, aya mosor adodo anidi iweignẽdiya nigin asin.”

Kuri Nigin Jesus To Difiyen

(Mak 2:18-22; Luk 5:33-39)

¹⁴ Age ye mog, Jon naan igunẽdiya tamo nẽ dõ fiya tar disin, Jesus to difiyen, “Naig fe di, amã Farisia tamo geid kuri mau di, ogon dõ fiya tar idi kuriya sak?”

¹⁵ Jesus aitedin yalen, “Tamo, kayau yalou fenẽ tar bun, ne tã tar disennek idi fau weim dibod ken, naig ã nigin waud gudũ fouf? Dum sain wõ ye di, an ne tã tar bun tamal yalelnẽf bun anĩ, idi gama kuri douf.

* **9:13:** Hosia 6:6

¹⁶ “Tamo taka, gabar masak mata, gabar tubu ado baguf fen, to iwauf. Anī age fouf, gabar masak matam gabar tubu dī fe di, tubu kudef, awa kanouf. ¹⁷ Takag, tamo idi wain mata anī meme gabar† tubu anī bun to ditinēf. Age difouf, meme gabar kude fele di, wain oho yalauf. Meme gabar sane lauf. Age fiya sã, idi wain mata are meme gabar mata bun ditinēf. Age fe di, uru idi kabī ifenēdiya nigin biya difarauf.”

Kayau Naal Laa Fen, Dagi Kayau Taka Ado

(Mak 5:22-43; Luk 8:41-56)

¹⁸ Od enī Jesus fau wogō ye mog, Juda neid uub fō nē uyu irouya taka isin, Jesus wagen ibor bobou fe fen, iron, “Gama bagai neu barai laa fel. Ō uma fen, imã teten uno di, kayau naal baban kel mata ibodōf.” ¹⁹ Jesus fã yale, uruwom dile di, yogon dō fiya tar idig dilen.

²⁰ Dile mog, kayau taka ogō dagi faimud ado yar tuwelf iyon anī, Jesus dume dume isi fen, Jesus nē kolos iri kobū fen. ²¹ Kayau anī yogon kisi iron, “Aya de yogon kolos dogol kobū afouf, anī aya neu dagi sa kalauf.”

²² Jesus falei yelen, kayau anī ile fen, iron, “Nau barai, waū unois, ogon momoiya anim dagi sa kel konok.” Age ye mog bagai, kayau in dagi sa kelen.

²³ Jesus uyu irouya nē fō bun isour ilen, mala iran, tamo kayau musei kokū de, i de mog, iledin. ²⁴ Jesus iron, “Uyaleleg, kayau naal enī laa fiya sã, mulã yenek.” Age ye di, idi kasã difiyen. ²⁵ Tamo kayau mayarē irud laisi fen, Jesus aab namen ilen, kayau naal ima yale iron. Age fe di, kayau naal fã yen. ²⁶ Nenerī anī wogō de di, teneub anī ganan bun iyokelen.

† 9:17: Juda neid tobonunã, idi meme gabar nem darum diwadig.

Jesus Tamo Towo El Fedin, Uru Meleid Ifofakeleya Ado Taka Ait Ifokeleya

²⁷ Jesus modoũ anĩ itor ken, iyok ile mog, tamo uru meleid ifofakeleya Jesus dõ difiyen, diweig diron, “Dawid Naal, amã nigin waũ inõ!”

²⁸ Jesus fõ aaben ile di, tamo uru meleid ifofakeleya wagen dilen, Jesus idi to fedin, “Ã momoi gef, aya ã meleĩ el afe di, lo gouf nigin kisi feleya?”

Idi aiten dalen, “Ao, Odug.”

²⁹ Age de di, Jesus imam meleid kobũ feid fen, iron, “Momoi gef kilei, ã nigin age feneĩf.” ³⁰ Idi neid meleid gama kelẽ delen. Jesus total bagai katũ feid fen, iron, “Enĩ nigin taka to urokenẽgouf.” ³¹ Anĩ ere, idi kututũ deis dile fen, Jesus age fen anĩ, teneub anĩ nẽ akor ganan bun od dinof diyon.

³² Idi Jesus ditornẽ dile mog, tamo taka kaa sanem ait ifokelen anĩ Jesus wagen dirousin. ³³ Kaa sane iru di, iyan, tamo ait ifokeleya wogõ yen. Tamo kayau guru difen ganan terẽ de fen, diron, “Kulu nem isi gama, Israel bun eig fiya taka to tailen.”

³⁴ Anĩ ere, Farisia tamo idi diron, “Are kaa sane neid mudur yana bunem, ï kaa sesen irudif.”

Kabĩ Tamo Musei Sã

³⁵ Jesus taun ganan fonõ fonõ ganan bun iyo ken, nedi uub fõ bun ifelneĩd, saa tano nẽ biya od wogõ feid fen, dagi gariya fire fire ganan el fedin. ³⁶ Sain Jesus mala iran, tamo kayau musei guru difen anĩ ileid fen, idi nigin wau yun, ere nigin, idi morõ adodo isennẽdiya sã, idi sipsip marau sã age fiya gen. ³⁷ Anĩ yogon dõ fiya tar irokenẽdin, “Kabier saaf musei biya ima bure felen, anĩ ere, kabĩ tamo musei sã. ³⁸ Age fiya nigin, kusu fiya marau, Odug to wiyẽg, kabĩ tamo susur fedi di, yogon kabier kusus fiya nigin dilauf.”

10

Jesus In Dō Fiya Tar Tuwelf Sur Fedin

(Mak 3:13-19; Luk 6:12-16)

¹ Jesus in dō fiya tar tuwelf iweignēdi di, wagen guru difen, kaa sesen irudiya, dagi gariya fire fire ganan el difediyouf nigin megeir ifenēdin.

² Eī aposel tuwelf yeneid, Simon (in yana Pita dedig), yogon tura Endru, Jems Sebedi naal, ne tura Jon, ³ Filip, Batolomyu, Tomas, taka Matyu takis yaleya tamo, Jems Alfeus naal, taka Tadeus, ⁴ Simon Selot,* taka Judas Iskariot, ī anī Jesus kiwai ifenen.

Jesus In Dō Fiya Tar Tuwelf Kabī Ifenēdin

(Mak 6:7-13; Luk 9:1-6)

⁵ Idi tuwelf enidi, Jesus fadim enī ado dō difouf nigin sur fedin: “Idi ibor fire Juda ibor sã wagedin to ulagauf, Samaria neid taun taka taka buneg to uleg. ⁶ Israel atun idi sipsip fō delen anidi bun dogol ulagauf. ⁷ Sain ā ulagauf, od enī anī wogō gef uyōg, ‘Saa tano mogo melsak.’ ⁸ Dagi el wedig, gare den turī wedig, lepra dagi ado el wedig, kaa sesen urudig. Megeir anī ā na yaleya sã ege walegen, anī nigin, ege luwa wenēdigouf. ⁹ Ā gol moni, silwa moni, kapa moni be, āgenei kodolē taka to bagai ufeg. ¹⁰ Delē uyōgou fenē, delē iyōya nē faa sã, gabar uru, sendel uru, manig uru agog to guri gouf, tamo kabī dalef, idi de mala ereb lau difef anī difenēdiyadidig.

¹¹ “Narib gouf, taun be, fonō taka be bun ulegef, ā meleī unog, tamo ā nigin sere yeīf, yogon fō bun ubodōg, dum utorōg uleg. ¹² Ā fō anī bun ulegef, āgenei wau inosiya nē aanya wenēdigouf. ¹³ Fō anī bun tamo kayau biya diyeyik, āgenei wau inosiya nē aanya an urofosisg, idi age fiya sãf,

* **10:4:** Juda neid kusī mala taka, idi Rom gawaman ado kusī dedig.

ãgenei wau inosiya nē aanya anī baban keg waleg. ¹⁴ Aib taka i ã nigin to sere yeif, ãgenei od to kari youf, ãgenei yei aasu tu weleg fen, fō be taun anī utorōg ulagauf. ¹⁵ Aya momoi arokeneik, Sodom Gomora ado darau dalen anī wal fiya, es fouf naa anī bun, taun anī in darau odug bagai yalouf.

Kafi Fiya Fire Fire Fau Isiyouf
(Mak 13:9-13; Luk 21:12-17)

¹⁶ “Aya ã sur ayeik are, sipsip gaũ kuĩ atun sur fiya gen. Anī nigin, ã gogour age fedig gen, kisi ed ge waleg fen, ago gouf, ninã kuburir gen, imatkesiya ubodōgouf. ¹⁷ ã tamo nigin lo walagauf, idi fau kaunsel imeid bun dineneĩ di, idi Juda neid uub fō bun wagagã diyeif. ¹⁸ Idi aya nigin de fen, ã guri diyeĩ diroule, gawaman mudur, king ado wagedin difarnei ken, ã idi geid fen, haiden Israel sã anidi meleid bun, aya nigin wogō gouf. ¹⁹ Anī ere, idi ã kot bun ifareya nigin gei diyeif, ã wauĩ to morō ken, ere od tarōf, naig ta tarōf anī nigin to kisi fatuk walogouf. Sain anī bun, ã erob od urōgouf nigin fau ifeneif. ²⁰ Are ãgem to urōgouf, ãgenei Temeĩ nē Awa Uur i yogo ã bunem wogō youf.

²¹ “Tura fã youf, tura nigin kiwai fen, idegē di, laa bun inenēf, tamag naal ado age difouf, kesu fã douf, idi neid sina tama nigin kiwai dino fen, idi dogo laa bun dinenēdiyof. ²² Tamo ganan idi, aya nigin fau kiwai difeneif, anī ere, aib taka megeir ino ifar ile idikeleya bun ouf, Negur isennēf. ²³ Teneub taka bun, ã darau odug difeneif are, uyu takã uyag uleg. Aya momoi arokeneik, ã fau Israel neid taun ganan bun to uyōg udikeleg mog, Tamo Naal kel isiyof.

²⁴ “Skul kesu i yogon tise to wal fouf, age fiya gen, ferfer i yogon marau to wal fouf. ²⁵ Skul kesu i yogon tise genēf, are de. Takag, kabĩ tamo i yogon orowa genēf, are de. Fō

anĩ tama yana dun Belsebub,[†] anĩ nigin, fõ anĩ tamo ganĩ be dibodok idi yeneid sane bagai dalef!

Negur Dogol Kumĩ Fiyēya

(Luk 12:2-7)

²⁶ “Age fiya nigin, ã idi to kumĩ wedig. Gama erab ein dede fiya yenek, are fau lelek falauf, gama erab iminēyan yenek, are dum fau keleĩ youf. ²⁷ Gama erab aya gugum bun wogõ ayeik, are fau gaa lalan bun wogõ gouf bagai; gama erab kosesēyam karĩ gef, dum fau fõ agaran ufareg fen, uweigig urõgouf bagai. ²⁸ Idi bouwa dukesif, anĩ ere, malakanon yukesiya kisin sã anĩ to kumĩg. Anĩ ere, taka ã malakanon bouwa ado yũ orok fe, hel bun irāya kisi feleya anĩ dogol kumĩ gouf. ²⁹ Fisisir uru ten toea nem na nigin sur gedig. Anĩ ere, āgenei Temeĩ yogon wau to irõ mog, taka tenebur to kubũ youf. ³⁰ Āgenei mudureĩ bun fatiyeĩg ganan iwes yalen. ³¹ Age fiya nigin, to kumĩg, ã Negur mala bun safina odug bagai, fisisir musei wal fediya.

Kristus Nigin Kurõ Fesiya Ado Wa Fiya

(Luk 12:8, 9)

³² “Aibem taka aya nigin tamo meleid bun kurõ falaisiyouf, ayag ã nigin neu Dei saa ilun ibodok wagen kurõ afalaisiyouf. ³³ Anĩ ere, aibem taka aya nigin tamo meleid bun wa fouf, ayag ã nigin neu Dei saa ilun ibodok wagen wa afouf.

Wau Inosiya Sã, Anĩ Ere, Soworu

(Luk 12:51-53; 14:26, 27)

³⁴ “Ā to kisi eig wog, aya tenebur ein wau inosiya irou isiya nigin asin gouf. Aya wau inosiya irou isiya nigin to asin, anĩ ere, aya soworu irou isiya nigin asin. ³⁵ Anĩ nigin, aya tubi kobõ fiya nigin asin,

[†] 10:25: Belsebub are Satan nē yana taka.

“Tamo ï tama nigin kiwai inouf,
ne barai yogon sina nigin kiwai inouf,
yanawau ï sina yana nigin kiwai inouf.

³⁶ Tamo nē kiwai are, de tamo anī nē ibor bun tamalem fã de fen, kiwai difenēf’

³⁷ “Aibem taka ï, yogon tama sina nigin wau fatuk ifen ken, aya nigin to age fef, ï aya dō fiya nigin to kisi falauf. Aibem taka ï, yogon naal be, ne barai be wau fatuk ifen ken, aya nigin to age fef, ï aya dō fiya nigin to kisi falauf.

³⁸ Aibem taka ï, yogon aa tetek orowa to sef fen, aya dō fiyaf, areg aya dō fiya nigin to kisi falauf. ³⁹ Aib taka tenebur ein nē mata alouf ye fen imirek, yogon mata fō yalauf. Aib taka yogon mata aya nigin iraillef, yogon mata kel yalouf.

Mala Solo
(Mak 9:41)

⁴⁰ “Tamo aibem ã yaleyeik, are aya yaleyaf, tamo aibem aya yaleyaf, are aib ï aya sur fiyan ï yalef. ⁴¹ Aibem taka ï, ï profet nigin ye fen, profet taka yalef, ï profet mala yalouf, aibem taka ï, ï madur tamo nigin ye fen, madur tamo taka yalef, ï madur tamo nē mala yalouf. ⁴² Aibem taka, naan medir kap tekelei, tamo yeneid sã anī taka ifen yãf, ere nigin, ï neu dō fiya tamo, aya ã momoi arokeneik, ï yogon mala solo to bagai wal fiyēf.”

11

Jesus, Jon Naan Igunēdiya Tamo Ado
(Luk 7:18-35)

¹ Jesus yogon dō fiya tamo tuwelf tai feid bure fel fen, anenem tokō fel, Galili taun taka taka bun ifelneid fen, biya od wogō fediyouf nigin ilen.

² Age fe di, Jon naan igunēdiya tamo kalabus bun ibod ken, Kristus kabī agef yalef de di, od anī karī yen, Jon

yogon dô fiya tar Jesus to difiyēf nigin ³ sur fedī di, dilen, to difiyen, “Tamo isiyouf den, ô ogo yeir de? Oo amã fau taka nigin tari mafouf?”

⁴ Jesus aitedin yalen, “Kekug uleg fen, ã wedereim karī gel, meleim ulegel anī Jon wogō wiyēg, ⁵ meleid ifofakelen kelē def, to diyon mogo diyok, lepra dagi adon mogo el fedin, wedereid daabun od karī def, gare den turī fedif, maleg bun biya od wogō fedif. ⁶ Tamo aya nigin wau to firagagaũ fef, Negur ī el fiyek.”

⁷ Jon nē dô fiya tamo ditornē dilele di, Jesus, tamo kayau guru difen anidi, Jon nigin irokenēdiya anī gariya inon, “Ã ere bagai anī ulogouf nigin, gerere tuan ulegen? Ã unin yaum walala fe di, ulogouf nigin ulegen de? ⁸ Anī sãf are, ere bagai ã ulogou fenē, ulegen? Tamo taka kolos biya bagai ifonun de? Sã, idi kolos biya bagai difonuk age fiya are, king nē fō bun dibodok. ⁹ Ba, ere bagai anī ã ulogou fenē, ulegen? Profet taka de? Are de yeir, aya ã arokeneik, ī profet wal fediya. ¹⁰ Tamo anī, ī nigin Negur nē Itotoya bun eig ye itoton:

“Aya neu arũ tamo sur afe di, ī ket uyu ilauf,
im uyulil ogon naab dodok fouf.”*

¹¹ Aya ã momoi arokeneik, kayau onoudi kesu dalen idi atun an, taka nem Jon naan igunēdiya tamo to wal difiyen, anī ere, aib taka saa tanon yana naal bagai ado ī Jon wal fiya. ¹² Jon naan igunēdiya tamo in sain bunem isi gama, saa tano, megeir ado bilalaũ fedig, megeir ado tamom saa tano anī irou irouledig. ¹³ Profet ganam Moses nē Lo ado, saa tano nigin profet od wogō def disin, isi Jon bun daun. ¹⁴ ã walogou fenē wauī oroīf are, ī Eliya, ī fau isif ya anī. ¹⁵ Aib ī weder adouf, karī youf.

* **11:10:** Malakai 3:1

¹⁶ “Tamo kayau sain enei bun, idi nigin ere bunem aya kisi afouf? Idi simom maket modoũ bun dibod ken, abob diweignēdidig gen:

¹⁷ “ ‘Amã ã nigin kelel maun,
anĩ ere, ã to kui gen;

amã kanon seg malen,
anĩ ere, ã to wauĩ gudũ fen.’

¹⁸ Anĩ Jon isin, saaf to yon, wain to yon, idi dirōdig, ‘ĩ kaa sane ado.’ ¹⁹ Tamo Naal isin, saaf yon, wain yon, idi dirōdig, ‘Eĩ saaf wan, wainei yedig, dobu irāya tamal, ĩ, takis yaleya tamo, mosor tamo ado geid nigal difedig.’ Anĩ ere, kisi biya ĩ in tobonunã anĩ bunem, biya yaoref.”

Taun Tunĩ Waud Faleiya Sã Nigin Isisnēdin
(Luk 10:13-15)

²⁰ Jesus ĩ, taun tunĩ bun memelik musei inodin, anĩ ere, idi waud to falei den, anĩ nigin, Jesus ou fiyēdin.

²¹ “Korasin taun, õ malalon ado! Betsaida, õ malalon ado! ã bun memelik musei anodin, age fiya gen anĩ Taia taun Saidon taun ado bun wõ yem are, mogo kulu waud falei de fen, wau gudũ fiya nē gabar difoun ken, aasur dibodom.

²² Anĩ ere, aya ã arokeneik, es fiya sain bun, morõ Taia taun Saidon taun ado dalouf anĩ wal fiya, ã walogouf. ²³ Õ Kapenaum, õ yanã anĩ saa ilun iselauf de? Sã bagai, õ laa neid modoũ bun usilauf. Memelik õ bun wõ yen anĩ age fiya, Sodom taun an wõ yem are, ĩ gamag eig fe di, ibodom.

²⁴ Anĩ ere, aya ã arokeneik, es fiya sain bun, morõ Sodom yalouf anĩ wal fiya, õ walouf.”

Morõ Ado Aya Bun Usi, Waũ Unois
(Luk 10:21, 22)

²⁵ Sain anĩ bun, Jesus iron, “Dei, saa ado teneub nē Odug, aya õ yanã alesef, ere nigin, safina eneidi, kisi biya ado keleĩ adodo to dilouf nigin õ unokon, ago fen, simõ

dibodon anidi bun yaor won. ²⁶ Ariya, Dei, enĩ are ogon waũ filolõ fiya biya bunem agon.

²⁷ “Ereb ererb ganan, neu Dei ĩ aya bun inon. Taka nem Naal keleĩ sã, Dei yogo dogol. Taka nem Dei keleĩ sã, Naal yogo, tunĩ idi Naalum Dei ifelnẽdiyof nigin igirnẽdif anidim dogol keleĩ.

²⁸ “Ã ganan morõ yei ken, sii yeik, wageun usig, ago ge di, aya wau inosiya afeneif. ²⁹ Neu sũ waleg, oroweĩ seg fen, aya bun keleĩ walogouf, ere nigin, aya molol fen, aya imatkesiya. Ago gouf, meleĩkanon siwo inoya gurug fouf. ³⁰ Ere nigin, neu sũ karika fen, neu morõ yal bagai.”

12

Jesus, ĩ Sabat Naa Nẽ Odug (Mak 2:23-28; Luk 6:1-5)

¹ Sain anĩ Juda neid Sabat naa* bun, Jesus wit kabĩ atu atu iyok ilen. Jesus in dõ fiya tar naũ feid fen, wit tunĩ gei fiya gariya dino fen, don. ² Farisia tamo idi anĩ dileid fen, idi Jesus dirokenen, “Ulef! On dõ fiya tamo tar idi, ĩtãfiya difodul ken, Sabat naa bun oug difef.”

³ Jesus aitedin yalen, “Dawid in kusĩ tamo anidi geid naũ fedid di, Dawid age fen anĩ, ã Negur nẽ Itotoya bun to uwesegen de? ⁴ ĩ Negur nẽ fõ namen ilen, agef fen, ĩ in kusĩ tamo anidi geid, bret fateul anĩ don, anĩ idi age fiya kisi feleya sã, anĩ idi ĩtãfiya difodul ken, age difen anĩ, prisem sã age difoũ nẽ anĩ. ⁵ Oo ã Lo od anĩ to be uwesegen de? Are Sabat naa bun, pris tempel namen kabĩ dalef bunem naa anĩ didodok, anĩ ere, anĩ mosor sã. ⁶ Aya ã arokeneik, tekelei ĩ tempel wal fiya anĩ, are yeir. ⁷ ã od enĩ, ‘Aya wau ifenẽya anĩ orouf, sesewi fiya sã,’† anĩ nẽ gariya keleim

* 12:1: Sabat naa anĩ, Juda neid uub nẽ naa. † 12:7: Hosia 6:6

are, ã tamo morõ sã ege mosor ado to wiyẽdigem. ⁸ Ere nigin, Tamo Naal yogo dogol Sabat naa nẽ Odug.”

Tamo Taka Ima Sitakã Gege Fefu Fiya

(Mak 3:1-6; Luk 6:6-11)

⁹ Jesus modoũ anĩ itor ken, iyok ile, Juda neid uub fõ namen ilen, ¹⁰ tamo taka ima sitakã gege fefu fen, ã an ibodon. Idi Jesus bouwa bun od dinou fenẽ nigin naab dimir ken, abugã to difiyen, “Sabat naa bun tamo madur fiya anĩ idodõya sã de?”

¹¹ Jesus idi irokenẽdin, “Ã anĩ taka, ã atun ã sipsip taka ado anĩ Sabat naa bun mekur isilau, ã to uleg walesseg unenẽgouf de? ¹² Tamo ã sipsip wal fiya bagai! Anĩ nigin, biya anĩ Sabat naa bun age tafef, are idodõya sã.”

¹³ Age ye fen, ã tamo anĩ irokenen, “Imã fara wol.” Age ye di, ã ima fara fele di, oditekei ima madur len, age fe di, ima sitakã gen wõ yen. ¹⁴ Anĩ ere, Farisia tamo idi dilelel fen, Jesus yukesiya nigin katõ difen.

Kabĩ Tamo Negurem Igirnen

¹⁵ Idi neid kisi kelei ken, Jesus modoũ anĩ itoron. Tamo kayau musei ã dõ difiyẽ di, ã idi neid dagi ganan el fedin, ¹⁶ tamo kayau ganan wedereid iroun, ã aib yeya anĩ to yaor difouf nigin. ¹⁷ Enĩ Negur, profet Asaia bunem eig ye wogõ yen anĩ kisi falauf nigin, agef wõ yen:

¹⁸ “Eĩ neu kabĩ tamo ayam agirnen,

ã nigin aya wau laa fedig, ã nigin aya wau kulĩ yedig;
aya neu Awa Uur ã bun anouf,

ã anĩ teneub ganan haiden bun Negur nẽ madur bagai
anĩ kurõ fesiyouf.

¹⁹ ã to seye ye fen, ait bagam to iweig irõf;
takam in ait naabur to karĩ youf.

²⁰ Werĩ felu reya ã to were fouf,
takag, lalan komomor fe mog, ã to gare falauf,

agef mog, Negur nē madur bagai anim ganan wal fouf.

²¹ In yana bun, teneub ganan haiden, idi neid waud an yenēf.”‡

Jesus Belsebub Ado Difiyen

(Mak 3:20-30; Luk 11:14-23)

²² Tamo taka kaa sanem irou di, mala sigor ado ifofaken, idi anī dirousi di, Jesus ī el fiyen. Age fe di, ī mala kelē ye fen, od wogō yen. ²³ Tamo kayau adok waud bun terē de fen, diron. “Enī anī Dawid Naal de?”

²⁴ Anī ere, Farisia tamo idi karī de fen, diron, “Are kaa sane neid mudur Belsebub yana bunem dogol, tamo enī kaa sesen irudif.”

²⁵ Jesus idi neid kisi kelei ken, idi irokenēdin, “Tano ganan yogo kiwai ifen ken, fara fouf, are sane lauf, taun ganan bun be, fō ganan bun be, idi dogo fara difouf, idi to difarauf. ²⁶ Satan ī yogo Satan iruf, ī yogo nigin faraf, yogo kiwai ifenek, naig fe fen, anī yogon tano ifarauf? ²⁷ Are aya Belsebub yana bunem kaa sesen arudif, ere bunem āgenei tamo kayau kaa sesen dirudidig? Anī nigin, idim ā es diyeif. ²⁸ Anī ere, aya Negur nē Awa Uur bunem kaa sesen arudif are, Negur nē tano mogo ā bun isil.

²⁹ “Takag, taka megeir ado nē fō bun ile, in safina bē yalou fenē, are ī tamo megeir ado anī ket ifokel fen, gama ī in safina fō bun bē yalouf.

³⁰ “Taka ī aya to fedē fiyaf, ī neu kiwai, takag, taka ī aya ado to guru mafef are, ī firagagaū fef. ³¹ Anī nigin, aya ā arokeneik, mosor kono fiya ado ganan tamo bun wō yef, are yalelauf, anī ere, Awa Uur kono fiyek, are mosor to yalelauf. ³² Taka ī Tamo Naal nigin kiwai ifen ken, kobu yef are, in mosor yalelauf. Ani ere, taka ī Awa Uur Fateul nigin kiwai ifen ken, kobu yef are, in mosor to yalelauf, gama sain enī bun ado dumen isiyouf buneg to yalelauf.

‡ 12:21: Asaia 42:1-4

*Aa Taka Yogon Faat Ado
(Luk 6:43-45)*

³³ “Aa biya are faat biya yūdig, aa sane are faat sane yūdig, anī nigin, aa ganan faat bunem keleiyadig. ³⁴ ã, gogour sane gere tar, naig fe di, ã sane anim ã biya nigin wogō gouf? Ereb ã namein isokosef, are sigoreim kaaresi gef. ³⁵ Tamo biya, safina biya ã bun kuru fef anī irou isidig, age fe di, tamo sane, safina sane ã bun kuru fef anī irou isidig. ³⁶ Anī ere, aya ã arokeneik, tamo idi od kisi sā wogō den anī ganan, fau es fiya sain bun, idi fau dogo Negur mala bun, mugu mugu kurō difesiyouf. ³⁷ Anī nigin, ogon od bunem ò mosor sā yōf, ogon od bunem ò mosor ado yōf.”

*Jona Nē Uris
(Mak 8:11, 12; Luk 11:29-32)*

³⁸ Age fe di, Farisia tamo tunī, lo ifelnēdiya tamo tunī geid, idi Jesus dirokenen, “Tise, amā ò bun memelik nē uris taka mailau fenē.”

³⁹ Jesus aitedin yalen, “Sane seseirã ibor, sain enei nē tamo kayau anī, memelik nigin to difef! Anī ere, taka to ifelneif, de profet Jona nē uris anim dogol ifelneif. ⁴⁰ Ere nigin, Jona naa towo bō towo, gau odug namen ibodon, age fiya gen, Tamo Naal naa towo bō towo, teneub akor ilon yenēf. ⁴¹ Niniwe tamo kayau fã de fen, es fiya naa bun, ibor enī, sain enei nē tamo kayau sane difiyēdiyof, ere nigin, idi mogo Jona wogō ye di, waud falei den, gama taka Jona wal fiya are yeir. ⁴² Kuin Saut tamal fã ye fen, es fiya naa bun, ibor enī, sain enei nē tamo kayau sane fiyēdiyof, ere nigin, kayau anī, King Solomon nē keleī biya karī youf nigin teneub idiyen tamal isin, gama taka King Solomon wal fiya are yeir.

*Kaa Sane Kel Isiya Gen**(Luk 11:24-26)*

⁴³ “Sain kaa sane tamo bun tamal ulō yeis fen, gerere tuan ile, si inoya modoū imirek ile to fotou fef. ⁴⁴ Agef fen, ī irok, ‘Aya fō atoron anī bun baban kelauf? Sain ī kel isif, fō ani daku, waī difel fen, madur difen anī ilef. ⁴⁵ Anī nigin, ī ile fen, baban kaa sesen ī wal fiya sewen anī geif irou isif, age de fen, idi namen dile, an difaref. Age dife di, tamo anī gai sane bagai lef, uruwa bun ne tobonunā anī wal fiya. Age fiya bagai, sain enei nē tamo kayau, ibor sane enī gama difaref, idi tobonunā anī adouf.”

*Jesus Sina, Tura Tar Geid**(Mak 3:31-35; Luk 8:19-21)*

⁴⁶ Sain Jesus tamo kayau wogō feid mog, in sina tura tar geid serē difar fen, ī geid od wogō douf nigin orodin. ⁴⁷ Takam ī irokenen, “Ogon sinā turā tar geid serē difaref, idi ō geid od wogō dou fenē orodif.”

⁴⁸ Jesus aiten yalen, “Ai anī neu naai, ai anī neu turau tar?” ⁴⁹ In dō fiya tar bun imam ifelneīd fen, ī iron, “Enidi anī neu naai, neu turau tar. ⁵⁰ Taka ī, neu Dei saa ilun ibodok anī nē oroya dōf age fef anī ī, neu turau, neu mainou, neu naai.”

13*Faat Irarāya Tamo Nē Yaab Od**(Mak 4:1-12; Luk 8:4-10)*

¹ Naa de anī bun, Jesus aaben tamal kutū yeis ile, daliyou sirin ibodon. ² Guru fiya odug kalilī difiyē di, tamo kayau adok ubun difar mog, ī waag namen isil ibodon. ³ Agef fen, erēb erēb musei yaab od nem irokeneīd fen, iron, “Kabī marau taka, faat irarāf nigin ilen. ⁴ Sain ī irarak ile mog, tunī naab luwen kuku ren, are ninā disi dakasin. ⁵ Tunī meein tuar kuku ren, an teneub badagar. Are kaisā bagai

fokū den, ere nigin, teneub are badagar bagai. ⁶ Anī ere, sain gaa ise di, bali are ilala di, laasi yedin, ere nigin, idi warumutei sã. ⁷ Faat tunī malū duri atun kuku ren, are malū duri anī fã ye fen, bali sile feledin. ⁸ Faat tunī teneub biya bun kuku ren, are idi biya imadin, taka biya handred, taka biya siksti, taka biya teti age fef ilauf. ⁹ Aib ī weder adouf, karī youf.”

¹⁰ In dō fiya tar ī wagen disī to difiyen, “Ere nigin ò yaab od nem tamo kayau urokenēdif?”

¹¹ Jesus aitedin yalen, “Saa tano nē waa keleī youf nigin are mogo ā ifenein, anī ere, tamo kayau to ifenēdin.

¹² Ereb taka aib ī ado are, anī wal fiya ifenēf, anī ī musei adouf. Ereb taka aib ī sã, ereb ereb ī ado areg ī bun yalelauf. ¹³ Anī nigin, aya yaab od nem arokenēdif, ere nigin,

“Idi meledim diledig, anī ere, idi meleid fokōya sã,
idi wederedim karī dedig, anī ere, idi wedereid
fokōya sã, to keleik.

¹⁴ Idi bun, Asaia nē profet od kisi felef:

“Ā wedereim karī gouf, anī ere, wedereī to fokō youf,
ā meleim ulogouf, anī ere, meleī to fokō youf.

¹⁵ Ere nigin, tamo kayau enei, idi waud katī felen,

idi wederedim karīya malai bagai,
age de fen, idi meleid difofakelen,

age fiya sam are, idi meledim dilem,

wederedim karī dem ado,
idi waud fokō ye fen,

falei de di, aya idi el afedim.’*

¹⁶ Anī ere, āgenei meleī nigin el fedif, ere nigin, ā ulegef, āgenei wedereī nigin el fedif, ere nigin, ā karī gef. ¹⁷ Anī aya ā momoi arokeneik, profet musei, madur tamo geid, ā ulegef anī dilou fenē nigin waud yenen, anī ere, idi

* 13:15: Asaia 6:9, 10

meledim to dilen, takag, karīya ã karī gef anī karī dou fenē nigin waud yenen, anī ere, idi wederedim to karī den.

Jesus Faat Irarāya Tamo Nē Yaab Od Faded Fen

(*Mak 4:13-20; Luk 8:11-15*)

¹⁸ “Yaab od bun, faat irarāya tamo nē gariya anī karīg:
¹⁹ Taka ĩ, saa tanon nē od karī ye fen, ĩ weder to fokō yef, sane taka isi, faat yogon wau bun iraran anī son fiyek. Are faat naab luwen iraran anī age fiya. ²⁰ Takag, faat meein tuar kubū yen are, tamo ĩ od karī ye fen, kaisā bagai ĩ od anī yale fen, wau bun kulī yef. ²¹ Anī ere, ĩ warumutei sã, anī nigin, ĩ sain meluk to ibodōf. Sain, biya od nigin morō be, kafī fiya be isif, ĩ kaisā bagai irofosif. ²² Takag, faat taka malū duri atun kubū yen are, tamo ĩ od karī yef, anī ere, tenebur mata ibodōya nē sii fiya, safina ado ibodōya nē kisi fiya anidim, biya od sile fe di, anim biya to yūf. ²³ Takag, faat teneub biya bun kubū yen are, tamo ĩ od karī ye fen, fokō yef, are ĩ biya yūf, taka biya handred, taka biya siksti, taka biya teti agef imauf.”

Lili Nē Yaab Od

²⁴ Jesus yaab od taka irokenēdin, “Saa tano ĩ, tamo taka yogon kabī bun, wit faat biya iraran gen. ²⁵ Anī ere, tamo adok mulaĩ den mog, yogon kiwai isin, lili wit kabier irara ken, agef yen ilen. ²⁶ Sain wit bali fokū ye fen, biya olili den, agef mog, lilig wowā den.

²⁷ “Marau nē kabī tamo, ĩ wagen disin diron, ‘Tamo biya, õ faat biya on kabier to uraran de? Lili anī nainenem disin?’

²⁸ “Ī aitedin yalen, ‘Kiwai takam age fen.’

“Ne kabī tamom to difiyen, ‘Amã mele anī kususu mafelauf anī õ oroyok de?’

²⁹ “Ī aitedin yalen, ‘Sã, ere nigin, lili kususu ge mã, ã wit ado kususu gouf. ³⁰ Malakaĩ, weim difar mog, fau

kusu fiya sain bun. Sain anī bun, aya kususu fiya tamo arokenēdiyof: Lili ketem kurug fen, ufafāg, dum yakur feid isaikalauf nigin; agog fen, wit kurug, neu kin gurig uleg.’”

Masted Faat Yis Ado Nē Yaab Od
(Mak 4:30-32; Luk 13:18-21)

³¹ Jesus yaab od taka irokenēdin: “Saa tano ī, masted faat tamo takam yale fen, yogon kabier itenen gen. ³² Anī ī faat ganam nigin naal bagai, anī ere, ī odugouf, ī kabier saaf ganam wal fediya aa wō youf. Age fe di, ninā ilun temeleid disi, were bun dibodōf.”

³³ Jesus baban yaab od taka irokenēdin: “Saa tano ī, yis kayau takam yale fen, flawa odug ado falei fe di, ganam gē yedig gen.”

³⁴ Jesus od enī ganam, yaab od nem tamo kayau wogō fiyēdin. Ī od ganam to kurō falaisi irokenēdin, yaab od nem dogol. ³⁵ Anī bunem, Negur profet bunem eig ye wogō yen anī, agef kisi felen:

“Aya yaab od bunem sigoroum kurō afesiyof,
gariya bun teneub ino fen, ereb ereb inokakan anī
aya yaor afouf.”†

Jesus Lili Nē Yaab Od Faded Fen

³⁶ Jesus tamo kayau itorneīd fen, fō namen ilen. In dō fiya tar ī wagen disi fen, diron, “Kabier lili nē yaab od anī, amā faded wamā.”

³⁷ Jesus aitedin yalen, “Tamo tekelei faat biya iraran, are Tamo Naal. ³⁸ Kabī are tenebur tamo kayau, faat biya anī, are Negur nē tano nē gere tar, lili are Satan nē gere tar, ³⁹ kiwaim lili iraran, are Satan. Kusu fiya are saa teneub ado idiyēf bun, kususu fiya tamo are idi engel.

† 13:35: Sam 78:2

⁴⁰ “Anĩ nigin, lili kususu feid, yã yakur feid isaikalauf, age fiya gen, saa teneub ado idiyẽf bun, age foug. ⁴¹ Tamo Naal ĩ, yogon engel sur fediyouf, idi yogon tano bun ereb ereb ganan mosor dinodig ado, tamo kayau ganan sane age difedig gei difeid fen, dalelnẽdiyof. ⁴² Idi yã mala bobo rouf bun dirarãf, an inã odug ado firi de fen, goboreid kikokõ youf. ⁴³ Age fe di, madur tamo idi, gaa gen nedi Temeid nẽ tanon fula difoug. Aib ĩ weder adouf, karĩ youf.

Safina Biya Bagai Inokon Ado Maaĩ Tuwa Meli Bagai Pel Nẽ Yaab Od

⁴⁴ “Saa tano ĩ, safina biya bagai kabier inokon gen. Tamo taka fotou fe fen, baban kabier inokon. Agef fen, wau al fef ile, safina adok ĩ ado anĩ, na nigin sur fe fen, akor anĩ na yalen.

⁴⁵ “Takag, saa tano ĩ, na yaleya tamo, maaĩ tuwa meli bagai pel biya, na nigin imirek gen. ⁴⁶ ĩ meein medeĩa taka moni odug nẽ anĩ fotou fe fen, ile, safina adok ĩ ado anĩ na nigin sur fe fen, meein medeĩa anĩ na yalen.

Kakãg Nẽ Yaab Od

⁴⁷ “Takag, saa tano ĩ, kakãg daliyou bun gau bou fire fire gei fiya nigin dirãdig gen. ⁴⁸ Sain kakãg isokose di, gau yaleya tamo dĩ dife, ubun ise di, anĩ idi dibod ken, gau biya gei de, karam namen difeid fen, sesen anĩ are dirarailen. ⁴⁹ Age fiya bagai, saa teneub ado idikalauf bun eig foug. Engel idi disi fen, idi madur tamo atun sesen anidi gei de dale, ⁵⁰ yã mala bobo ref bun dirarãf, an inã odug ado firi de fen, goboreid kikokõ youf.”

⁵¹ Jesus to fedin, “Ã od enĩ ganan wedereĩ fokõ yef de?”
Idi diron, “Yo, amã karĩ mauf.”

⁵² Jesus idi irokenēdin, “Anī nigin, lo ifelnēdiya tamo ganan saa tano nigin ifelnēdin are, idi fō tama gen, ī safina biya nē aaben tamal safina mata tubu ado irou isidig.”

Profet Yana Sā Gen

(Mak 6:1-6; Luk 4:16-30)

⁵³ Jesus yaab od eneidi bure fel fen, anenem iyok ilen. ⁵⁴ In fō gariyan isi fen, ī an tamo kayau dogo neid uub fō bun ifelnēdin, age fe di, idi terē den. Idi to difen, “Tamo eī, kisi biya ado memelik nē total enei, nain yalen? ⁵⁵ Ī kapenta naal sā de? In sina Maria sā de? In tura tar Jems, Josef, Simon, Judas ado sā de? ⁵⁶ In main tar ganan, ada weim to tabodok de? Tamo enī enei ganan nain yalen?” ⁵⁷ Age de fen, idi ī kiwai difenen.

Anī ere, Jesus idi irokenēdin, “Profet taka ī, in fō gariyan ado in fō bun dogol, ī yana sā.”

⁵⁸ Ī an memelik musei to inon, ere nigin, idi to momoi den.

14

Jon Naan Igunēdiya Tamo Ula Gudū Fen

(Mak 6:14-29; Luk 9:7-9)

¹ Sain anī bun, Galili nē uyu irouya Herod Jesus nigin od karī ye fen, ² in kabī tamo irokenēdin, “Enī Jon naan igunēdiya tamo, ī laa fen anī kel fā yen! Anī nigin, memelik nē total ī bun kabī yalef.”

³ Kulu Herod, in tura Filip nē aiwa, Herodias nigin, Jon yale ifō, kalabus bun inenen. ⁴ Ere nigin, Jon ī irokenēdig, “Ō itāfiya ufodul ken, turā nē kayau walen.” ⁵ Herod Jon yukesiya nigin wau yenen, anī ere, tamo kayau kumī fedin, ere nigin, idi ī profet taka dedig.

⁶ Herod sina gō fen anī nē naa bun, Herodias nē barai seg kui ye fen, dole kenēdi di, Herod wau al bagai fen.

⁷ Age fe di, ï wau adok kuturol fen, ne barai ereb taka nigin to foug, de anï bagai ifenēf yen. ⁸ In sinam weder te yabi di, ï iron, “Beï taka bun Jon naan igunēdiya tamo mudur uno fen, ein wanauf.” ⁹ King ï wau togun, anï ere, wau kuturol fen, tamo kayau meleid bun kurō fesin anï nigin, in oroya dōf anï bagai ifenēf nigin wogō ye fen, tamo sur fe di, ¹⁰ Jon kalabus bun ula gudū fen. ¹¹ In mudur beï bun dino diroule, ne barai difenē di, ï sina gein irou ilen. ¹² Jon nē dō fiya tar disi, in bouwa buru dale mū difen. Age de fen, idi dilen, Jesus dirokenen.

Jesus Faif Tausen Tamo Saaf Ifenēdin
(Mak 6:30-44; Luk 9:10-17; Jon 6:1-14)

¹³ Jesus, Herod Jon ula gudū fen anï karī ye fen, ï mugu bagai waag bun moilin ilen. Tamo kayau idi anï karī de fen, taun temeleid yedim dō difen. ¹⁴ Sain Jesus kutū yeis fen, mala iran, tamo kayau musei ileidin, ï idi nigin wau yu ken, idi neid dagi el fiyēdin.

¹⁵ Mogo bok isi di, in dō fiya tar Jesus wagen disi diron, “Eï gerere tuan, sain mogo sa kelef. Tamo kayau susur wo di, dilalauf, ago di, idi fonō fonō dile fen, dogo neid saaf na dalouf.”

¹⁶ Jesus irokenēdin, “Idi ileyā nigin kisi to yenēf. Saaf yōya nigin āgem wenēdigouf.”

¹⁷ Idi dirokenen, “Amā ein bret faif, gau uru ado dogol.”

¹⁸ ï iron, “Wageun gurig urousig.” ¹⁹ Tamo kayau fisir bun dibodadāf nigin Jesus irokenēdin. Bret faif gau uru ado, imam yale, saa ilun itad fen, ï Negur de fiye ken, bret mumā fen. Agef fen, in dō fiya tar ifenēdi di, idim tamo kayau difenēdin. ²⁰ Idi ganān don anï kisi felen. Age fe di, in dō fiya tar, tamo kayau bret dokon, tunī ditoraran anï fito difen, karam tuwēlf eweid gere fen. ²¹ Tamo bret don anï, idi faif tausen age fiya, kayau kesu geid iwesediya sã.

*Jesus Naan Teteatu Iyon
(Mak 6:45-52; Jon 6:15-21)*

²² Kaisã bagai, Jesus, in dō fiya tar waag bun idi ketem sitakã dilauf nigin sur fedin. Age de mog, ï tamo kayau irudin. ²³ Jesus idi irud le fen, ï yogo arein kosē youf nigin iselen. Ï an mugu ibod mog, bõ irou isin. ²⁴ Anĩ ere, waag mogo teneub itoron gerõ ifaren, yau odug fã ye di, moloun wĩ ye fen, waag yũ di, ilef isif fen.

²⁵ Wef mog, Jesus daliyou teteatu idi gedin iyok ilen. ²⁶ Sain in dō fiya tar meleid diran, daliyou teteatu iyõ mog, dile fen, idi tererẽ den. Idi diron, “Eĩ baraũ,” kumĩ de fen, ui guru den.

²⁷ Anĩ ere, kaisã bagai Jesus irokenẽdin, “Totol ufareg! Are ayam. To kumĩ wog.”

²⁸ Pita solof iron, “Odug, onom ouf are, urokana len, naan teteatu õ garan asiyouf.”

²⁹ Jesus iron, “Usi.”

Age fiyẽ di, Pita waag bun kutũ yeis, naan teteatu Jesus wagen iyok ilen. ³⁰ Anĩ ere, ï yau ile fen, kumĩ ye di, gamai imutuk isil fen, iweig iron, “Odug, usenna!”

³¹ Kaisã bagai, Jesus ima iran, yalesne ken, irokenen, “Õ momoiya naal, ere nigin õ waũ uru ado?”

³² Age ye fen, idi uru waag namen sosõ de di, yau kee relen. ³³ Anĩ dile fen, idi waag namen difaren, Jesus nigin seli dabi diron, “Momoi bagai, õ anĩ Negur Naal.”

*Jesus Genesaret Oun Dagi Adodo El Fedin
(Mak 6:53-56)*

³⁴ Sain idi daliyou sitakã dibal dilen, Genesaret teneub bun wõ den. ³⁵ Tamo kayau fonõ anĩ bun temeleid, Jesus kelei ken, idi fonõ anĩ kalilĩ fiya fõ fõ ganan od dinon. Fonõ fonõ idi neid dagi tamo guri difeid, Jesus wagen disi fen, ³⁶ idi dagi tamo yogon gabar irig kobũ difouf nigin, Jesus digonen. Ganan idi ï kobũ difen, dagi fara feledin.

15

Amuyē Sā Ado Amuyē Ado
(*Mak 7:1-23*)

¹ Sain anī bun, Farisia tamo tunī, lo ifelnēdiya tamo tunī geid, Jesus garan Jerusalem temeleid disi to difiyen,
² “Ere nigin on dō fiya tar, mudur ado neid tobonunā wal difedig? Idi neid imeid kulo fiya sā, saaf dōdig!”

³ Jesus solof irokenēdin, “Ere nigin ā āgenei tobonuneī dōg fen, Negur nē itāfiya wal gedig? ⁴ Ere nigin, Negur iron, ‘Ō sinā tamā yeneid wales,’* ‘Aibem taka sina be tama be gelu fiyēf, ī laa bun dinenēf bagai.’† ⁵ Anī ere, ā urōgedig, ‘Tamo taka, sina be, tama be idi bun irōf, “Ereb taka ō isennōya nigin ayam ifonōya anī, ayam Negur afenem,” ⁶ ī age fef anī bunem in tama yana seli kulō fiya nigin to age fouf, gedig. Āgenei tobonunā age fiya bunem Negur nē od to dō gedig. ⁷ Ā mala yaleya tamo! Asaia ī, ā nigin profet od eig ye wogō yen in od tutuk:

⁸ “Tamo kayau enidi, nedi sigoredim aya selu kulō difedig,
anī ere, idi neid waud aya nigin gerō ifaref.

⁹ Idi aya yanau dalesedig, are ege.

Idi neid ifelnēdiya are tamo nē keleī dogol dō difedig.‡ ”

¹⁰ Jesus tamo kayau iweig laisi, irokeneīd fen, iron, “Karīg fen, wedereī fokōf. ¹¹ Ereb taka mayarem tamo awa kurē isilef anim, ī amuyē to ifenēdig, anī ere, ereb taka namenem awa kurem ulō yesif anim, ī amuyē ifenēdig.”

* **15:4:** Eksodas 20:12; Diuteronomi 5:16 † **15:4:** Eksodas 21:17; Levitikas 20:9 ‡ **15:9:** Asaia 29:13

¹² Age ye di, in dō fiya tar ĩ garan disu to difiyen, “Farisia tamo idi od enī karī de fen, waud ò nigin to biyaf anī, ò karī wof de?”

¹³ Jesus aitedin yalen, “Aayũ ganan, neu Dei saa ilun tamal im to itenanan, are warumutei ado kususufouf. ¹⁴ Utornēdig; idi uyu irouya nigin meleid ifofakelen. Mala ifofakeleya tamo taka, mala ifofakeleya taka gim fiyēf are, idi uruwom mekur kuku douf.”

¹⁵ Pita iron, “Yaab od enī nē gariya faded wo urokanamā.”

¹⁶ Jesus to fedin, “Ā fau nene gef de? ¹⁷ Ā to ulegedig de? Ereb taka awa gerinem te namen isilef are te ado iledig.

¹⁸ Anī ere, ereb taka awa bun wō yef are wauda bunem isedig anim, tamo amuyē ifenēdig. ¹⁹ Ere nigin, wauda bun tamal wō yef, are kisi sesen, tamo yukesiya, seseirā inoya, noli tobonunā, bē, kot bun idegēya od bou bun yūya, dumen od wogōya. ²⁰ Enī ganan anī tamo amuyē ifenēdig, anī ere, ima kulo fiya sā saaf doko anim, tamo amuyē to ifenēdig.”

Kanan Kayau Nē Momoiya

(Mak 7:24-30)

²¹ Jesus modoũ anī itor ken, Taia Saidon ado neid teneub akoron ilen. ²² Haiden kayau Kanan tamal taka, melsā an tamal Jesus wagen isin iweig iron, “Odug, Dawid Naal, aya nigin malalon yō! Neu barai kaa sanem irou di, to biya bagai yenek.”

²³ Anī ere, Jesus od taka to solo fenen. Anī nigin, in dō fiya tar Jesus wagen disu, total bagai dirokenen, “Kayau sur wo di, ile, ere nigin, ĩ iweig fen, iweig fen, dō fadaf.”

²⁴ Jesus kayau aiten yalen, “Negur aya sur fiyan are, sipsip Israel atun fō delen anidi bun dogol.”

²⁵ Kayau anī isin, wagen ibor bobou fe fen, ĩ iron, “Odug, aya usenna!”

²⁶ Jesus aiten yalen, “Kesu nanaal neid saaf yale fen, gaũ irarak kenēdiya are to biya.”

²⁷ Kayau anī iron, “Odug, are momoi, anī ere, gaũ idig moroid tar tebol bun saaf dō di, momout kuku re di, dōdig.”

²⁸ Age ye di, Jesus aiten yalen, “Kayau, ō momoiya odug ado! Ogon waũ irok agef ifonok.” Sain anī bun bagai, ī ne barai el felen.

Jesus Fo Tausen Tamo Saaf Ifenēdin

(Mak 8:1-10)

²⁹ Jesus an itor ken, Galili maaī yeri dō fen. Agef fen, ī arein isel ibodon. ³⁰ Tamo kayau musei wagen disin, yeid kirorōya, meleid ifofakelen, iborodim gogo dedig, aiteid ifofakelen, dagi fire fire museig, Jesus ye gariyan guri dife dirou disin di, ī el fedin. ³¹ Aiteid ifofakelen od wogō den, iborodim gogo dedig madur feid difaren, yeid kirorōya diyon, meleid ifofakelen lo difen, anī ganam tamo kayau dile fen, terē den. Age fe di, idi Israel nē Negur yana dalesen.

³² Jesus, in dō fiya tar iweignēdi di, wagen disin di, irokenēdin, “Aya tamo kayau enidi nigin waud inaf, idi mogo aya geid naa towo dibodon, anī ere, gama ereb taka yōya sā. Aya, idi naũ susur afedi di, dilauf anī to orouf, age afouf are, idi luwen kuku douf.”

³³ In dō fiya tar dirokenen, “Amã gerere tuan ein bret kisi feleya nain male fen, musei enī weit mafediyouf?”

³⁴ Jesus to fedin, “Bret ganī ã ado?”

Idi diron, “Bret sewen, gau nanaal teke tekelei ado.”

³⁵ Jesus tamo kayau tenebur dibodadāf nigin irokenēdin. ³⁶ Agef fen, Jesus, bret sewen gau ado, imam yale iron, ī Negur de fiye ken, bret anī mumã feid fen, in dō fiya tar ifenēdi di, idi bagam tamo kayau difenēdin. ³⁷ Idi ganam don anī kisi felen. Dumen in dō fiya tar, tamo kayau

bret dokon, tunĩ ditoraran anĩ fito difen, karam sewen eweid gere fen. ³⁸ Tamo bret don anĩ idi fo tausen, kayau kesu geid iwesediya sã. ³⁹ Jesus tamo kayau susur feid, dilele di, ĩ waag bun sō ye, Magadan akoron ilen.

16

Farisia Tamo Sadusia Tamo Geid, Saa Ilun Nē Uris Nigin To Difen

(Mak 8:11-13; Luk 12:54-56)

¹ Farisia tamo Sadusia tamo geid, Jesus wagen disi, kisi difiye ken, saa ilun nē memelik taka meledin inouf nigin to difiyen.

² Jesus aitedin yalen, “Sain aragau isi di, ã urōgedig, ‘Sain biyau fenē, ere nigin, saa giri yef,’ ³ bonimeidi, ã urōgedig, ‘Gama uyē yau ado fouf, ere nigin, saa giri ye fen, budū iyokelef.’ Ā saa bun es fiya nigin keleĩ bagai, anĩ ere, ã ereb sain nē uris es fiya nigin kisi feleya sã. ⁴ Sain enei nē tamo kayau, ibor sane seseirã inoya nē anĩ, memelik nē uris dimirēdig, anĩ ere, taka to ifenēdiyof, de Jona nē uris dogol ifenēdiyof.” Age ye fen, Jesus idi itorneid ilen.

Farisia Tamo Ado Sadusia Tamo Neid Yis

(Mak 8:14-21)

⁵ Sain idi daliyou sitakã dibal dilen, in dō fiya tar bret yaleya nigin wedereid tu kelen. ⁶ Jesus idi irokenēdin, “Lo welegei! Farisia tamo ado Sadusia tamo neid yis nigin, ã lo welegei.”

⁷ In dō fiya tar idi dogo dogol katō de fen, diron, “Ī agef irok, ere nigin, ada bret to tarousil nigin.”

⁸ Idi neid wogōya Jesus keleidi ken, to fedin, “Ā momoiya naal bagai, ere nigin ã bret sã ge fen, aug tutur wogō gef? ⁹ Ā wedereĩ fau to fokō yef de? Ā to karĩ welegef, bret faif anĩ faif tausen don, age fe di, karam ganĩ ã kuru ge di,

eweid gere fen? ¹⁰ Takag, bret sewen anĩ fo tausenem don, age fe di, karam ganĩ ã kuru ge di, eweid gere fen? ¹¹ ã naig fe di, wedereĩ to fokõ yef, aya bret nigin ã to arokeneim de? Anĩ ere, ã lo welegei, Farisia tamo ado Sadusia tamo neid yis nigin.” ¹² Age ye di, idi mogo wedereid fokõ yen, ã yis bret bun dinodig anĩ nigin to wogõ fedin, ã Farisia tamo ado Sadusia tamo neid ifelnẽdiya anĩ nigin wogõ fedin.

Pita Kristus Nigin Kurõ Fesin

(Mak 8:27-30; Luk 9:18-21)

¹³ Sain Jesus Sisaria Filipai nediwon isi fen, in dõ fiya tar to fiyẽdin, “Tamo kayau Tamo Naal nigin ai dedig?”

¹⁴ Idi dirokenen, “Tunĩ dirok, õ Jon naan igunẽdiya tamo, tunĩ dirok, õ Eliya, tunĩ dirok, õ Jeremaia oo profet taka be.”

¹⁵ Jesus to fedin, “Ba ã uleg? Aya nigin ã ai gef?”

¹⁶ Simon Pita aiten yalen, “Õ anĩ Kristus, Õ mata ibodõya Negur Naal.”

¹⁷ Jesus solof iron, “El fiya õ ado, Simon Jona nẽ naal, ere nigin, on keleĩ are tamo nẽ keleĩ bunem sã, are neu Dei saa ilun tamal in keleĩ bunem. ¹⁸ Anĩ nigin, aya õ arokonok, õ Pita, * meein enĩ teten neu sios anouf, laa nẽ megeir anim sios to wal fiyẽf. ¹⁹ Aya saa tano nẽ ki õ afonõf, erab õ tenebur ein ufok, are saa ilun ouneg ifõf, erab õ tenebur ein biru wof, are saa ilun ouneg biru fouf.” ²⁰ Age ye fen, Jesus ã Kristus yeya anĩ, aib taka to dirokenẽf nigin, in dõ fiya tar wedereid iron.

Jesus Busuk Bun Laaf Fen, Mata Kel Fã Youf Yen

(Mak 8:31-9:1; Luk 9:22-27)

²¹ Sain anĩ bunem ilauf bun, Jesus yogo nigin in dõ fiya tar yaor fe irokenẽdin, ã Jerusalem ilauf bagai, an darau musei, mudur adodo, pris odudug, lo ifelnẽdiya tamo

* **16:18:** Pita, ani nẽ gariya, meein.

imeid bun yalouf, an ï dukesiyouf, naa towo bure fele di, mata kel fã youf.

²² Pita Jesus yale, yerin irou ile ou fiyen, ï iron, “Odug, sã bagai! Enï ganan õ nigin to bagai wõ youf!”

²³ Jesus falei yel, Pita irokenen, “Satan, dumeun ule! Õ aya naaburau gudũ wof; on kisi are Negur nẽ sã, on kisi tamo nẽ dogol.”

²⁴ Age ye fen, Jesus in dõ fiya tar irokenẽdin, “Aib taka aya dõ fiyau fenẽ, ï yogon oroya lai fesil fen, ï yogon aa tetek faali fe fen, anï aya dõ fiyau. ²⁵ Ere nigin, aib taka yogon mata isennẽf nigin oro fef are, fõ yalauf, aib taka yogon mata, aya nigin irailauf are, mata anï gurug fouf. ²⁶ Tamo taka ï, teneub enï ganan kakarai fe fen, akorou yef, anï are, ï yogon malakanon irailauf, ere biya ï yalouf? Takag, tamo taka yogon malakanon nigin ere mala solof fen, ï kel yalouf? ²⁷ Tamo Naal, in Tama nẽ fula fiya medeïya ado in engel geid disiyouf, agef fen, tamo mugu mugu ereb age fef anï kilei, ï mala solo age fiya bagai ifenẽdiyouf. ²⁸ Aya momoi arokeneik, tunï ein difaref fau to gare de mog, idi Tamo Naal in tano bun isi di, dilouf.”

17

Jesus Bouwa Falei Fen

(Mak 9:2-13; Luk 9:28-36)

¹ Naa sigis bure fele di, Jesus, Pita, Jems, taka Jon Jems nẽ tura geif fen, idi mugu arei odug ilun diselen. ² An Jesus idi meleid bun bouwa falei felen. In nawa gaa gen fula felen, in kolos lalau fen, yal gen lalanen. ³ Agef mog, an idi meleid bun Moses, Eliya ado wõ de fen, Jesus weim wogõ den.

⁴ Pita Jesus irokenen, “Odug, ada ein ibodõya nigin biya bagai. Õ oroyõf are, aya salafat towo anouf, taka ogon, taka Moses nẽ, taka Eliya nẽ.”

⁵ Pita fau wogõ ye mog, lalo lalau bagai idi kerub fedin, ait taka lalo namen iron, “Eĩ neu Kesu, ĩ nigin aya wau laa fedig, ĩ nigin aya wau kulĩ yedig. ĩ karĩ wiyẽg!”

⁶ Anĩ in dõ fiya tar karĩ den, idi neweid kususur de fen, tenebur gurorõ de tererẽ den. ⁷ Anĩ ere, Jesus isin, kobũ feid fen, ĩ iron, “Fafãg, to kumĩg.” ⁸ Idi ditadsen, taka to dilen, Jesus dogol.

⁹ Idi arei bun diyok disi fen, Jesus idi irokenẽdin, “Ã er eb ulegel enĩ, aib taka to urokenẽg, fau Tamo Naal laa bun tamal kel fã ye di.”

¹⁰ In dõ fiya tar Jesus to difiyen, “Ere nigin lo ifelnẽdiya tamo dirõdig, ‘Eliya ĩ ketem isiyouf bagai’ dedig?”

¹¹ Jesus aitedin yalen, “Momoĩ bagai, Eliya isi fen, er eb er eb ganan madur fediyouf. ¹² Anĩ ere, aya ã arokeneik, Eliya mogo isi bure felen, idi anĩ ĩ nigin to kelei ken, er eb er eb ganan idi waud iron kilei, ĩ nigin mogo age difen. Age fiya gen, Tamo Naal idi imeid bun darau yalouf.” ¹³ Jesus age wogõ ye di, in dõ fiya tar idi wedereid fokõ yen, Jon naan igunẽdiya tamo nigin irok den.

Jesus Kesu Kaa Sane Ado El Fiyen

(Mak 9:14-29; Luk 9:37-42)

¹⁴ Sain idi tamo kayau gedin disin, tamo taka Jesus wagen isi fen, ibor bobou fen. ¹⁵ ĩ iron, “Odu g, neu kesu nigin malalon yõ. ĩ mir yuk sain, sane bagai firi ye fen, sain musei yãg iledig, naanũg iledig. ¹⁶ Aya, ĩ, on dõ fiya tar wagedin arou elen, anĩ ere, idi el fiyẽya kisi feleya sã.”

¹⁷ Jesus solof iron, “Sain enei nẽ tamo kayau, ibor enĩ, sane, momoiya sã, sain ganĩ aya ã geid tabodõf? Sain ganĩ aya ã nigin wau aukesilauf? Kesu wageun ein urousig.”

¹⁸ Jesus kaa sane ou fiyẽ di, kesu bun tamal ulõ yeis ile mog, kesu ĩ bou karika len.

¹⁹ Age fe di, in dō fiya tar mugun Jesus wagen disi to difiyen. “Ere nigin amā kaa sane iruya kisi feleya san?”

²⁰ Jesus irokenēdin, “Ere nigin, āgenei momoiya naal bagai nigin. Aya momoi arokeneik, ā momoiya naal masted faat age fiya adouf are, ā arei enī urokenēgouf, ‘Ein tamal godo urou ule, oun ufar,’ ago ge di, ī dōf age fouf. Ereb ereb ganān ā age fiya kisi feleya.”*

Jesus Baban In Laa Nigin Iron

(Mak 9:30-32; Luk 9:43-45)

²² Sain idi disi, Galili guru difen, Jesus idi irokenēdin, “Tamo Naal ī fau tamo imeid bun dinouf. ²³ Idi fau ī dukesiyouf, anī ere, naa towo bure fele di, ī fau baban mata kel fā youf.” Age ye di, in dō fiya tar waud morō gudū fesin.

Tempel Nē Takis

²⁴ Jesus in dō fiya tar geid, Kapenaum taun disi di, tempel takis yaleya tamo, Pita wagen disi to difiyen, “Āgenei tise tempel nē takis to inodig de?”

²⁵ Pita iron, “Ariya, ī takis inodig.”

Sain Pita fō namen isi di, Jesus ket wogō yen, “Simon, ō ere kisi wof? Ai bunem tenebur nē king anidi takis daledig, idi neid kesu bunem de, oo tamo tunī bunem?”

²⁶ Pita solof iron, “Tamo tunī bunem.”

Jesus ī irokenen, “Anī nigin, kesu idi bunem sã. ²⁷ Anī ere, adam idi waud saneya to tafenēdiyof nigin, ō daliyoun ule, on mū urāf. Gau uruwa walouf anī awa gede fen, an silwa koin moni ulouf, wale fen, takis ogon ado neu nigin wenēdiyof.”

* **17:20:** Itotoya tunī eig de ditoton: kisi feleya. 21 Anī ere, kaa sane eig fiya ege to ulō yeis ilauf, kurig fen, kosē ge di.

18

Saa Tanon Odug Ibodōya Nigin (Mak 9:33-37; Luk 9:46-48)

¹ Sain anī bun, in dō fiya tar Jesus wagen disi, to difiyen, “Aim saa tanon odug bagai ibodok?”

² Ī kesu naal taka iweignē isi di, idi atun ifarnen. ³ Agef fen, ĩ iron, “Aya momoi arokeneik, ā kesu nanaal gen falei gouf anī dogol, age fiya sāf are, ā saa tanon to bagai ulagauf. ⁴ Anī nigin, aib taka yogo nigin kuru kel fen, kesu enī genēf are, ĩ saa tanon odug bagai ibodok.

⁵ “Takag, aib taka kesu naal eig fiya, aya yanau nem yalef are, ĩ aya yaleyaf. ⁶ Anī ere, aibem taka age fe di, kesu aya nigin momoi def enidi taka, mosor bun kubū youf are, tamo anī meein odug guyutu bun ifo ken, maaīwō irāya nigin biya.

⁷ “Teneubur tamo kayau idi meleidlōn ado, ere nigin, ereb to biya anī age fe di, tamo mosor bun dilalauf. Tobonunā age fiya bagai wō youf, anī ere, tamo nanī be bunem isif, ĩ malalon ado! ⁸ Ogon imam be, yem be mosor bun ineyōf are, gudū fen uraile. Ō imā tobega be, yē tobega ado mata bun ileyā nigin biya bagai, ere nigin, imā totoū be, yē totoū adouf are, yā faimud ibodkeleya anī bun an dirāyōf. ⁹ Age fiya bagai, ogon malam mosor bun ineyōf are, ubodol uraile. Ō malā tekelei ado mata bun ileyā nigin biya bagai, ere nigin, malā totoū adouf are, hel nē yā mala bun dirāyōf.

Sipsip Fō Yeleya Nē Yaab Od (Luk 15:3-7)

¹⁰ “Ä lo welegei, kesu nanaal enidi taka to meleĩ irim gouf. Ere nigin, aya ä arokeneik, idi neid engel saa ilun dibodok, sain ganan neu Dei saa ilun ibodok no diledig.*

¹² “Ä ere kisi ado? Tamo taka ĩ wan handred sipsip ado, tekelei idi atun fõ yalauƒ are, marau ĩ nainti-nain sipsip uya bun itorneĩd fen, ile, tekelei fõ yelen anĩ to imirēf de?

¹³ Aya ä momoi arokeneik, ĩ fata fouf are, ĩ sipsip tekelei anĩ nigin wau kulĩya odug, sipsip nainti-nain to fõ delen nigin anĩ nē kulĩya wal fiya. ¹⁴ Age fiya bagai, ägenei Temeĩ saa ilun ibodok, kesu nanaal enidi taka fõ yeleya nigin to orodig.

Turã Taka Mosor Inoyõf

¹⁵ “Ogon turã taka mosor inoyõf, ule ä uruwom atun dogol in kũ fenēya ufelnēf. ĩ õ karĩ yõf, õ ogon turã mogo kel walel. ¹⁶ Anĩ ere, ĩ to karĩ yõf, baban tekelei be uru age fiya õ geid fen, ulagauf, ago di, ‘od ganan isennēya uruwom be, towom sigoredim kurõ difesiyouf anĩ megeir gouf.’† ¹⁷ ĩ idi karĩ fediya nigin itorõf, sios urokenēf. ĩ sioseg karĩ fiyēya nigin itorõf are, ĩ haiden be takis yaleya tamo sane gen unenēf.

¹⁸ “Aya ä momoi arokeneik, erab taka ä tenebur ein ufokalagauf, are saa iluneg ifokalauf, erab taka ä tenebur ein biru walagauf, are saa iluneg biru falauf.

¹⁹ “Baban, aya ä arokeneik, tenebur ein ä uruwom erab taka nigin wauĩ tekelei fen, to gouf, neu Dei saa ilun ibodok, ĩ döf ä nigin age fouf. ²⁰ Ere nigin, uruwom be, towom be, aya yanau nem guru difef, aya an idi geid mabodok.”

Kabĩ Tamo Wau To Yũdig Nē Yaab Od

* **18:10:** Itotoya tunĩ eig de ditoton: diledig. **11** Fõ delen anĩ kel yaleya nigin Tamo Naal isin. † **18:16:** Diuteronomi 19:15

²¹ Age ye di, Pita Jesus wagen isi, to fen, “Odug, neu turau aya nigin mosor inouf, sain ganĩ neu turau nē mosor nigin wederou tu kalauf? Wederou tu kelef ile, sewen daũ de?”

²² Jesus aiten yalen, “Aya ò arokonok, ò sewen dogol to agouf, sewenti anĩ are sewenem tobol wouf.

²³ “Anĩ nigin, saa tano ĩ, king taka, ne ferfer geid in wareg madur fiya nigin oron gen. ²⁴ King ĩ wareg madur fiya nigin gariya inon, tamo taka ĩ bun ten milion kina yalen anĩ, ĩ wagen dirou disin. ²⁵ ĩ wareg anĩ yukesiya kisi feleya sã nigin marau iron, ĩ yogo ado in aiwa, in gere tar ado in safina ganan na nigin sur fedu di, in wareg anĩ yukesiya kisi falauf yen.

²⁶ “Kabĩ tamo, marau wagen ibor bobou fe fen, igonen, ‘Ò aya nigin waũ unois fen, sain wana len, aya wareg anĩ ganan kisi afelkonõf.’ ²⁷ Kabĩ tamo anĩ nē marau, ĩ nigin wau yu ken, wareg anĩ ganan lai fesil fen, itornē di, ilen.

²⁸ “Anĩ ere, kabĩ tamo anĩ oreis ile fen, ĩ yogon kabĩ tura taka fotou fen, ĩ bun wareg wan hundred kina ado. ĩ ka fe, ula irou fen, iron, ‘Ò aya bun wareg walen anĩ kel wana!’

²⁹ “In kabĩ tura kubũ ye, ibor bobou fe fen, igonen, ‘Ò aya nigin waũ unois fen, sain wana len, aya wareg anĩ mala kela afonõf.’

³⁰ “Anĩ ere, ĩ to karĩ fiyen. ĩ tamo yale irou, kalabus bun iran, are de wareg inouf anĩ dogol. ³¹ Anĩ kabĩ tura tar tunĩ, ĩ age fen anĩ dile fen, idi waud odug sanen, anĩ nigin, dile, idi neid marau ereb age fen anĩ ganan wogõ difiyen.

³² “Age de di, marau tamo, kabĩ tamo anĩ iweignē isi di, ĩ irokenen, ‘Ò kabĩ tamo sane. Aya ogon wareg ganan lai afonon, ere nigin, ò aya ugonan. ³³ Aya ò nigin wau inan gen, ò ogon kabĩ tura nigin waũ inõya san de?’ ³⁴ In marau tamo name ise fen, darau ifenēya nigin kalabus lo

fiya tamo imeid bun inenen, are de wareg ganan inouf anī dogol.

³⁵ “Age fiya bagai, neu Dei saa ilun ibodok, ā atun tureī tar neid mosor nigin wauī bun wedereī to tu kalauf are, āg age yeīf.”

19

Tamo Kayau Ado Bagu Fiya Anī Fara Fiya (Mak 10:1-12)

¹ Jesus od enidi wogō ye bure fel fen, Galili distrik itor ken, Judia distrik ilen, Jordan naan sitakā. ² Tamo kayau musei dō difiyē di, ī an idi dagi el fedin.

³ Farisia tamo tunī ī wagen disi, kisi difiye ken, idi to difiyen, “Tamo taka, yogon kayau gariya fire fire bun iruf anī, lo dō fiya de?”

⁴ Jesus aitedin yalen, “Ā Negur nē Itotoya to uweseg ulegen de? Gariya bun, Negur ererb ererb kare fedin ī, ‘tamo ino kayau ino fen,’* ⁵ Negur iron, ‘Anī nigin, tamo ī in sina tama itorneīd fen, in kayau ado bagu difouf, idi uruwom bouweid tekelei.’† ⁶ Age difef, idi uru sã, idi tekelei. Anī nigin, Negur tamo kayau ado bagu fedin anī, tamom to fara fouf.”

⁷ Idi to difiyen, “Age fiyauf are, ere nigin Moses iron, tamo taka in kayau fara fiya nē pepa ifen ken, iru di, ilauf yen?”

⁸ Jesus idi irokenēdin, “Moses ī āgenei wauī total anī ile fen, āgenei kayau iruya nigin to katū yein. Anī ere, gariya bun age fiya sã. ⁹ Aya ā arokeneik, aib taka in kayau seseirã inoya sã mog, kayau iru fen, kayau taka yalef are, ī seseirã inof.”

* 19:4: Genesis 1:27 † 19:5: Genesis 2:24

¹⁰ In dō fiya tar Jesus dirokenen, “Tamo kayau atun morō agef yenek nigin, ï kayau to yalouf are biya bagai.”

¹¹ Jesus irokenēdin, “Tamo ganan od enī dō fiya kisi feleya sã, teke tekeleim Negurem age fedif anidi dogol.

¹² Tunī idi, sineid namenem, bouweid kesu irouya nigin tutuk sã gō fedidig, tunī are tamom korō difedidig, tunī saa tano nigin kisi de fen, kayau to daledig. Tamo taka kisi enī dō fiya nigin kisi falauf, dōf age fouf.”

Jesus Kesu Nanaal El Fiya Ifenēdin

(Mak 10:13-16; Luk 18:15-17)

¹³ Jesus ima tetedin ino fen, kosē fiyēdiyof nigin, kesu nanaal ï wagen guri de dirousin. Anī ere, in dō fiya tar, idi guri de dirousin anidi ou difiyēdin.

¹⁴ Jesus iron, “Utornēdig len, kesu nanaal aya wageun disiyof, idi to katū wedig, ere nigin, saa tano are eig fediya neid.” ¹⁵ Age ye fen, ï ima tetedin inol fen, an tamal tokō fel ilen.

Tamo Gaū Safina Musei Ado

(Mak 10:17-31; Luk 18:18-30)

¹⁶ Tamo taka Jesus wagen isi to fiyen, “Tise, ere biya anī aya age afe fen, mata ibodkeleya alouf?”

¹⁷ Jesus aiten yalen, “Õ ere nigin ereb biya nigin aya to wiyaf? Tekelei ï dogol biya. Mata ibodkeleya bun ulau fenē, õ ïtäfiya dō woid.”

¹⁸ Tamo Jesus irokenen, “Ïtäfiya nanī bagai?”

Jesus iron, “ Õ tamo taka to ukesiyof, seseirã to unouf, to bē walouf, õ taka nigin idegēya od to urōf, ¹⁹ ogon sinã tamã yeneid walesauf, † õ ogo nigin waū laa fef gen, nē tã nigineg ago.’§ ”

† 19:19: Eksodas 20:12-16; Diuteronomi 5:16-20 § 19:19: Levitikas 19:18

²⁰ Tamo gaũ iron, “Anĩ ganan aya dõ afen, ere taka anĩ aya fau dõ fiya sã?”

²¹ Jesus ĩ irokenen, “Õ madur bagai you fenēf, ule, ogon safina ganan na nigin sur wo fen, maleg tamo wenēdiyof, agouf, õ saa ilun safina biya adouf. Agol fen, usi, aya dõ wiya.”

²² Od enĩ tamo gaũ karĩ ye fen, ĩ wau morõ fe di, itor ilen, ere nigin, ĩ safina musei ado.

²³ Age fe di, Jesus in dõ fiya tar irokenēdin, “Aya ã momoi arokeneik, safina musei ado tamo, saa tanon ileya nigin malai bagai. ²⁴ Baban aya ã arokeneik, kamel ĩ gabar iwaya nē nil ku bun ileya nigin karika bagai, safina musei ado tamo, Negur nē tano bun ileya nigin malai bagai.”

²⁵ Od enĩ in dõ fiya tar karĩ den, idi fatuk terē de fen, to difen, “Age fiyauf are, aim anĩ mata ibodkeleya yaleya kisi feleya?”

²⁶ Jesus idi lo feid fen, iron, “Tamo yogo bun age fiya kisi feleya sã, anĩ ere, Negur yogo bun ereb ereb ganan age fiya kisi feleya.”

²⁷ Pita Jesus aiten yalen, “Amã ereb ereb ganan mator ken, õ dõ mayok! Ere anĩ amã nemã mala solo malouf?”

²⁸ Jesus idi irokenēdin, “Aya ã momoi arokeneik, ereb ereb ganan mata falei fouf sain anĩ bun, Tamo Naal ĩ yogon king nē sia bun fula fiya medeīya ado ibodōf, ã aya dõ wiyagef, āg king nē sia tuwelf bun ubodōg fen, Israel ibor tuwelf es wedigouf. ²⁹ Taka fõ be, tura tar be, main tar be, tama, sina, gere tar, kabĩ, aya yanau nigin itoron, idi ganan mala solo wan handred wal fiya dalouf, mata faimud ibodkeleya anĩ dalouf. ³⁰ Anĩ ere, musei malabag dibodok, idi dumen dibodōf, musei dumen dibodok, idi malabag dibodōf.

20

Wain Kabī Tamo Neid Yaab Od

¹ “Saa tano nē tobonunā are, teneub marau taka ī, bonimeī bagai ile fen, yogon wain kabier kabī dalouf nigin tamo oroi yaledin age fiya gen. ² Kabī marau naa tekelei nigin ten kina afeneīf ye di, idi ganan anī yo de di, in wain kabier sur fedin.

³ “Nain kilok bonimeī age fiya, ī ilen, tamo tunī maket modoū bun ege difar mog, ile din. ⁴ Ī idi irokenēdin, ‘Āg uleg, neu wain kabier kabī waleg, ago gouf, mala de afeneīf.’ ⁵ Age ye di, idi dilen.

“Ī baban gaa atun ado aragau tri kilok age fiya ile feneg, de age fen. ⁶ Aragau faif kilok age fiya, ī ilen, tunīg fau difar mog, ile din. Ī idi to fiyēdin, ‘Ere nigin ā ege bagai gaa ganan ein ufaregel?’

⁷ “Idi aiten dalen, ‘Ere nigin, taka nem amā to oroi yalemam.’

“Ī idi irokenēdin, ‘Āg uleg, neu wain kabier kabī waleg.’

⁸ “Sain aragau di, wain kabī marau in kabī tamo neid orowa irokenen, ‘Kabī tamo uweigneīd fen, dogo neid mala wenēdiyof, dumen disil idi bun gariya uno fen, ule, uyu disil bun ouf.’

⁹ “Kabī tamo aragau faif kilok age fiya kabī dalen disi fen, mugu mugu ten kina dalen. ¹⁰ Sain idi bonimeī nem ket iweigneīdin anidi disin, idi kisi difen, amā idi wal fiya malouf den, anī ere, idig mugu mugu ten kina dalen. ¹¹ Sain idi moni dalel fen, idi teneub marau nigin nauseir den. ¹² Idi diron, ‘Tamo enidi dum bagai uweigneīdi di, aua tekelei dogol kabī dalel, anī ere, amā, naa enī ganan bonimeī nem isi, gama yeiref, kabī total malel, gaa uruwa dō famam, anī ere, ō amā idi geid ten kina dede wanamam.’

¹³ “Anĩ ere, kabĩ marau ĩ, idi neid taka solof irokenen, ‘Mou, aya õ sane to ayok. Õ ten kina nigin ada uruwom sigoroda to tekeleil de? ¹⁴ Ogon kabĩ mala wale fen, ule. Aya õ afonom age fiya, tamo dum bagai oroi aleyen anĩ, de age fiya afenēf nigin wau irok. ¹⁵ Aya neu safina ereb taka age fiya nigin wau irok anĩ, aya to age afouf de? Aya neu biya age afef nigin, õ aya kiyēĩ wanaf de?”

¹⁶ “Anĩ nigin, idi dumen dibodok anidi malabag dibodōf, idi malabag dibodok anidi dumen dibodōf.”

Jesus In Laa Nigin Irõ, Towo Fen

(Mak 10:32-34; Luk 18:31-34)

¹⁷ Jesus Jerusalem iselau fenē, ĩ in dõ fiya tar tuwelf mugu bagai gei feid fen, irokenēdin, ¹⁸ “Ada Jerusalem teselef, an Tamo Naal ĩ pris odudug, lo ifelnēdiya tamo imeid bun dinenēf. Idi ĩ laa fouf nigin bou bun od dūf. ¹⁹ Age de fen, idi ĩ haiden Juda sã anidi imeid bun dino di, kono difiyē, wagĩ difiye ken, aa tetek bun dukesiyouf. Naa towo bun, ĩ mata kel fã youf!”

Jems Jon Ado Neid Sineid, Ne Wau Iron Anĩ Jesus To Fiyen

(Mak 10:35-45)

²⁰ Age fe di, Sebedi nē kesu uru, sineid geid Jesus wagen disin. Idi neid sineid ibor bobou fe fen, wau irok anĩ Jesus to fiyen.

²¹ Jesus to fiyen, “Ere anĩ õ orok?”

Kayau iron, “Õ urōf, neu kesu uru enĩ, ogon tano bun taka ima biyalē ibodōf, taka ima kilē ibodōf.”

²² Jesus idi irokenēdin, “Ã ereb to gef anĩ nē gariya, ã keleĩ sã, naan aya ãf anĩ ã yōya kisi feleya de?”

Idi aiten dalen, “Amã kisi feleya.”

²³ Jesus idi irokenēdin, “Ã momoi neu kap bun naan are wāgauf, anĩ ere, imau biyalē ibodōya be, kilē ibodōya are,

ayam ifenēya kisi feleya sã. Modoũ anidi are, neu Dei idi nigin dodok fen anidi neid.”

²⁴ In dõ fiya tar ten, od anĩ karĩ de fen, uru tura ado nigin seye den. ²⁵ Jesus idi iweig laisi fen, iron, “Ã keleĩ, haiden idi dogo neid uyu irouya, tamo kayau lo fiya nigin total dinodig, idi dogo neid odudug, tamo kayau nigin megeir yaor difedig. ²⁶ Anĩ ere, ã bun kisi to agef yenēf, ã atun aib taka odug ibodõf nigin orof, ã ģenei kabĩ tamo ibodõf. ²⁷ ã atun aib taka uyun ibodõf nigin orof, ã ģenei ferfer ibodõf. ²⁸ Age fiya gen, Tamo Naal ã disennēf nigin to isin, anĩ ere, ã tamo kayau isenneĩd fen, tamo kayau musei idi neid mosor anĩ fotokar yogon mata ifenēdiyof nigin isin.”

Tamo Uru Meleid Ifofakelen Anĩ Meleid Birikã Felen

(Mak 10:46-52; Luk 18:35-43)

²⁹ Jesus in dõ fiya tar geid Jeriko ditor dile mog, tamo kayau musei dõ difiyen. ³⁰ Tamo uru meleid ifofakelen naab yerin dibodon. Sain idi Jesus isi ilef yeya karĩ de fen, diweig diron, “Odug, Dawid Naal, amã nigin malalon yõ!”

³¹ Tamo kayau idi ou difiyeĩd fen, foro dalauf nigin dirokenēdin, anĩ ere, idi wade bagai diweig diron, “Odug, Dawid Naal, amã nigin malalon yõ!”

³² Jesus dē yel fen, idi iweigneĩd fen, ã to fedin, “Ere naig ayēif nigin ã oroyeik?”

³³ Idi aiten dalen, “Odug, amã malamã fara wol kanamãf nigin oromak.”

³⁴ Jesus idi nigin meleidlon fe fen, idi meleid kobũ fedin. Kaisã bagai, idi meleid fara fele di, sã lo dife fen, idi Jesus dõ difen.

21

Jesus Tamo Yana Ado Gen Jerusalem Namen Ilen

(Mak 11:1-11; Luk 19:28-40; Jon 12:12-19)

¹ Idi Jerusalem kelē difiye ken, Moul Arei bun Betfage fonō wō den, Jesus in dō fiya tar uru sur feid fen, ² ĩ idi irokenēdin, “Fonō wagein ifaref tokō weleg, ulō wesig fen, kaisā bagai donki ifōya naal ado uledigouf. Idi biru weledig fen, wageun gurig usig. ³ Taka nem ā ereb yeif, ĩ urokenēgouf, Odug ĩ kabī ifenēdiyou fenē orof, ago ge di, kaisā bagai sur fediyouf.”

⁴ Profet eig ye wogō yen anī kisi falauf nigin agef wō yen:

⁵ “Saion nē tamo kayau urokenēgouf,
‘Ulef, ogon king ō garan isif,
imatkeis fen, donki bun ibodok,
donki naal teten.’”*

⁶ In dō fiya tar dilen, Jesus iron kilei age difen. ⁷ Idi donki naal ado dirousi di, tetedin idi neid gabar du difedi di, Jesus anī tetedin ibodon. ⁸ Tamo kayau musei, idi neid gabar naabur du difedin, tunī idi aa were kokour dife, naabur du difedin. ⁹ Tamo kayau uyu dilen ado, dume dō difen diweig diron,

“Hosiana,† Dawid Naal bun!”

“Odug yana bunem isif, ĩ el fiya ado!”‡

“Hosiana, saa ilun bagai!”

¹⁰ Sain Jesus Jerusalem ulō yesi di, taun anī bun tamo kayau ganan terē de fen, toti difen, “Tamo eĩ aim?”

¹¹ Tamo kayau diron, “Eĩ Jesus, profet Nasaret taun Galili teneub bun tamal.”

Jesus Tempel Bun

(Mak 11:15-19; Luk 19:45-48; Jon 2:13-22)

¹² Jesus tempel modoū bun ile, wō ye fen, na dale dile disi dife mog, an tamo kayau adok irudidin. ĩ moni solo

* **21:5:** Sekaraia 9:9 † **21:9:** Anī nē gariya, ‘Usennamā!’ Od anī tamo kayau Negur yana yaleseya nigin wogō dedig.

‡ **21:9:** Sam 118:26

fediya neid tebol ado kuburir na sur fediya neid fatar eleg feledin. ¹³ Jesus idi irokenēdin, “Negur nē Itotoya irok, ‘Neu fō ī kosē nē fō douf;’[§] anī ere, ā ‘bē tamo neid iminēya fō’* unogen.”

¹⁴ Meleid ifofakeleya, yeid kirorōya, Jesus wagen tempel bun disi di, ī el fedin. ¹⁵ Anī ere, Jesus ereb biya bagai age fe di, kesu nanaal tempel modoū bun diweig diron, “Hosiana, Dawid Naal bun,” age de di, pris odudug, lo ifelnēdiya tamo geid, idi anī dileid fen, seye den.

¹⁶ Idi Jesus to difiyen, “Kesu nanaal enidi ereb def, ō karī wof de?”

Jesus aitedin yalen, “Ariya, ā Negur nē Itotoya to uwesegen de?”

“Kesu momou kesu nanaal geid sigoreid bun

selu kulō fiya nigin Negur idi mogo saika fedin.’[†] ”

¹⁷ Agef fen, Jesus an tamal idi itorneīd, taun anī itor ken, Betani fonō ilen, an bō tekelei ibodon.

Aa Fig Gariri Kelen

(Mak 11:12-14, 20-24)

¹⁸ Bonimeī bagai, Jesus Jerusalem kel ile fen, naab luwen naū fen. ¹⁹ Mala irakelen, aa fig naab yerin ilen, Jesus iyok iselen fele fen, aa fig biya sā ege aarau dogol. Jesus aa fig irokenen, “Ō baban to bagai umauf!” Kaisā bagai, aa fig gariri kelen.

²⁰ In dō fiya tar anī dile mā, idi terē de kulō de fen, diron, “Naig fe di, aa fig kaisā bagai gariri kelen?”

²¹ Jesus aitedin yale iron, “Aya ā momoi arokeneik, ā wauī momoi ge mā, wauī to ilef isi foug, ā aa fig enī bun age afel dogol to ago gouf, sā arei enīg urokenēgouf, ‘Kusu fen, maaīwō irāyōf,’ are ī dōf age foug. ²² Ā momoi gouf are, ereb taka nigin tog fen, kosē gouf, ā walogouf.”

§ 21:13: Asaia 56:7 * 21:13: Jeremaia 7:11 † 21:16: Sam 8:2

*Jesus Aim Igirnen Anĩ To Difiyen**(Mak 11:27-33; Luk 20:1-8)*

²³ Jesus tempel modoũ namen ulõ yeis fen, an tamo kayau od ifelneĩd mog, pris odudug, tamo kayau neid mudur adodo, ĩ wagen disi to difen, “Ere igiriya bunem õ erab erab enĩ ago wof? Aim õ igiriya enĩ ifonon?”

²⁴ Jesus aitedin yale iron, “Ayag to fiya tekelei afeneĩf. ã solog urokanagauf are, erab igiriya bunem erab erab enĩ age afef, aya ã arokeneĩf. ²⁵ Jon nẽ naan igunẽdin, are nainenem isin? Are saa ilun tamal de, tamo bunem?”

Idi dogo dogol katõ de fen, diron, “Ada ‘Ĩ saa ilun tamal, tauf, ĩ irõf, ‘Ba anĩ, ere nigin ã ĩ nigin to momoi wiyẽgen?”

²⁶ Anĩ ere, ada ‘Tamo bunem’ tauf, ada tamo kayau nigin kumĩ tafedif, ere nigin, tamo kayau idi ganan Jon nigin profet taka dedig.”

²⁷ Anĩ nigin, idi Jesus ait solo de diron, “Amã keleĩ sã.”

Age de di, Jesus iron, “Ago gouf are, ayag, ere igiriya bunem erab erab enĩ age afef anĩ to arokeneĩf.

Kesu Uru Bun Yaab Od

²⁸ “Ã ere kisi gef? Tamo taka ĩ naal uru adon. Tama ĩ kesu matu garan ile iron, ‘Neu kesu, gama wain kabier ule, kabĩ walouf.’

²⁹ “Ĩ aiten yalen, ‘Aya tuwauf,’ dum ĩ in kisi falei ye fen, ilen.

³⁰ “Agef fen, tama kesu taka garan ile, od tekelei anĩ irokenen. Kesu aiten yalen, ‘Dei, aya age afouf,’ anĩ ere, ĩ ileya sã.

³¹ “Idi uru atun, aim anĩ tama oron anĩ age fen?”

Idi aiten dalen, “Matum.”

Jesus idi irokenẽdin, “Aya ã momoi arokeneik, takis yaleya tamo, kayau bouweid na nẽ sur difedig geid, ã atun, idi ketem Negur nẽ tano bun uyu dilauf. ³² Ere nigin, Jon naan igunẽdiya tamo ĩ, madur ibodõya nẽ naab ifelneĩf

nigin ã garan isin, ã ï nigin to momoi gen, anï ere, takis yaleya tamo, kayau bouweid na nẽ sur difedig geid, idi momoi den. ã ï ulegeneg, ã wauï to falei ge fen, ï to momoi wiyẽgen.

Tamo Kabï Lo Difedig Nẽ Yaab Od
(Mak 12:1-12; Luk 20:9-19)

³³ “Yaab od taka nigin wedereï unog. Teneub marau taka ï yogon kabier aa wain itenen, ï kau ifõ kalï felen, wain sumin asi fiya nigin ku yalen, kabï lo fiya nẽ fõ inon. Agef fen, ï mala solo yalouf nigin wain kabï, kabï lo difedig tamo tunï imeid bun ino fen, uyu takã ilen. ³⁴ Sain biya bure fele di, teneub marau wain biya fito fiya nigin in ferfer susur fe di, kabï lo difedig tamo garan dilen.

³⁵ “Kabï lo difedig tamo, teneub marau nẽ ferfer dirouneïd fen, taka dun, taka dukesin, taka meein tulu difen. ³⁶ Age dife di, teneub marau ferfer tunï sur fedin, are idi musei uyulil sur fedin wal fiya. Age fe di, kabï lo difedig tamo uruwa age difen gen, baban yogon ferfer bun age difedin. ³⁷ Dum bagai, teneub marau yogon naal idi garan sur fiyen. ï iron, ‘Idi neu kesu nigin fau karï difiyẽf.’

³⁸ “Anï ere, kabï lo difedig tamo, naal anï dile fen, idi abob dirokenen, ‘Eï inim wain kabï akorouf. Usig, ada ï taukeis fen, yogon akor talouf.’ ³⁹ Age de fen, idi ï dale, wain kabï mayarẽ dira ken, dukesin.

⁴⁰ “Age fiya nigin, sain wain kabï nẽ marau isiyouf, ï kabï lo difedig tamo ere naig fediyouf?”

⁴¹ Idi Jesus aiten dalen, “Teneub marau, idi sane bagai sane ye fen, idenkesiyouf, ï wain kabï anï, kabï lo difedig tamo tunï imeid bun ino fen, na yaledi di, idi wain mayof sain bun fito de fen, yogon biya difenẽf.”

⁴² Jesus idi irokenẽdin, “ã od Negur nẽ Itotoya bun yenek anï to uwesegen de?”

“Meein are fõ inoya tamom sane de fen, ditoron anĩ,
 gama monog tor wõ yen,
 anĩ Odug yogo age fe di,
 malamã yun.’‡

⁴³ “Anĩ nigin, aya ã arokeneik, Negur nẽ tano ã bun tamal son yeĩ yale, tamo kayau idi aayũ faat biya yũf anidi ifenẽdiyof. ⁴⁴ Aib taka meein anĩ teten kubũ youf, mered fe fisik fouf, takag, aib taka meein anĩ ã teten kubũ youf, ã danĩf aas lauf.”§

⁴⁵ Sain pris odudug, Farisia tamo geid, Jesus nẽ yaab od karĩ den, idi kelein, Jesus idi nigin wogõ yen. ⁴⁶ Idi Jesus ironẽya nigin naab dimiren, anĩ ere, idi tamo kayau nigin kumĩ den, ere nigin, tamo kayau idi Jesus nigin profet taka dedig.

22

Tamo Kayau Yalouf Bun Tar Nẽ Yaab Od *(Luk 14:15-24)*

¹ Jesus yaab od nem baban irokeneid fen, iron: ² “Saa tano ã, king taka, ã naal kayau yalouf nigin tar dodok fen age fiya gen. ³ ã yogon ferfer sur fedid di, tamo iweignẽdin yogon tar bun disiyof nigin dirokenẽdin, anĩ ere, idi isiya ditoron.

⁴ “ã baban ferfer tuni sur feid fen, iron, ‘Idi aya aweignẽdin anĩ urokenẽdig: Aya tar mogo saika afel. Aya bulmakau yaro biya biya ado adenen, erab erab ganan mogo dodok afelel. Bagu fiya tar bun usig.’

⁵ “Anĩ ere, idi to karĩ difiyẽdin, idi diyalelen, taka yogon kabier ilen, taka ã yogon bisnis kabĩ yalen. ⁶ Tunĩ idi ferfer dirouneid fen, tadũ difiyeid didenkesin. ⁷ Anĩ nigin, king

‡ 21:42: Sam 118:22, 23 § 21:44: Itotoya tuni bun, itotoya 44 to ibodok.

name odug sane fen, yogon kusī tamo sur fedī di, dilen, ferfer didenen anidī didenkeis fen, nedī taun yā dinon.

⁸ “Agef fen, king, ne ferfer irokenēdin, ‘Bagu fiya nē tar mogo dodok afelel, aya tamo aweigneīd fen, naa afenēdin anidī, dogo sane age difen nigin, isiya kisi feleya sā. ⁹ Anī nigin, ā ulagauf, naab kaleyan aib aib uledigouf are, urokenēdig len, idi tar bun disiyouf.’ ¹⁰ Age ye di, ferfer dilelen, naab naab diyo ken, tamo kayau dileid fen, biya ado sane ganan gou difedin, age dife di, tamo kayau ado bagu difedidig nē guru fiya modoū bun tamo kayau isokosen.

¹¹ “Age dife di, king namen isin, tamo kayau fele fedin, an ī tamo taka kolos biya ifonūya sā fotou fen. ¹² King ī to fiyen, ‘Mou, naig fe di, ō bagu fiya nē naki sā anī guru fiya enī namen usil?’ Tamo ī od sā ibodon.

¹³ “Age fe di, king yogon kabī tamo irokenēdin, ‘Ima ye ado ufōg, mayarē gugum bun urāg, an are wifirig ye fen, gobora kikokō yediyouf.’

¹⁴ “Anī nigin, tamo kayau musei iweignēdif, anī ere, teke tekelei igirnēdif.”

Sisa Bun Takis Inoya

(Mak 12:13-17; Luk 20:20-26)

¹⁵ Age fe di, Farisia tamo dilen, Jesus in od bun naig fe mog, talouf de fen, od katō difen. ¹⁶ Age de fen, Farisia tamo, idi neid dō fiya tar, Herod nē tamo tar geid, Jesus wagen sur difedi di, dilen, idi Jesus dirokenen, “Tise, amā keleī, ō momoi wogōya nē tamo, anī ō Negur nē naab momoi bagai ufelnēdidig, ō tamom to wewu diyōdig, ere nigin, ō idi yana ado be sā anī to es wedig. ¹⁷ Anī amā urokanamā, ogon kisi ere wof? Sisa* takis ifenēya nigin biya de, sā?”

* 22:17: Rom neid king odug.

¹⁸ Anĩ ere, Jesus idi neid namedin kisi sane kelei ken, iron, “Ã meleid yaleya tamo, ere nigin ã aya kisi wiyagef? ¹⁹ Takis ifeněya nigin koin moni ufelnag.” Idi koin moni taka wagen diroule di, ²⁰ Jesus idi to fedin, “Eĩ ai nawa nē malakanon? Eĩ ai yana nē itotoya?”

²¹ Idi aiten dalen, “Sisa nē.”

Age de di, ĩ idi irokenēdin, “Ereb Sisa nē are Sisa wenēg, erab Negur nē are Negur wenēg.”

²² Od enĩ idi karĩ de fen, terē den. Age de fen, idi Jesus ditornē diya dilelen.

Kel Fāya Bun Ai Nē Kayau Ibodōf?

(Mak 12:18-27; Luk 20:27-40)

²³ Naa de tekelei anĩ bun, Sadusia tamo idi dirōdig anĩ, laa bun tamal to ke de fā dedig, dedig anidim, Jesus wagen diso to difiyen. ²⁴ Idi diron, “Tise, Moses iron, tamo taka kesu sã mog laa fef, in tura waab yale fen, tura fotokar kesu iroukenēf. ²⁵ Amã atun, tura tura sewen dibodon. Matu ĩ kayau yalen laa fen, ĩ kesu sã, anĩ nigin, ĩ, in kayau, ne tura itorkenen. ²⁶ Age fiya bagai, tura dō fiya ĩg age fen, anĩ dō fiya tri ĩg agef ile sewen adoken. ²⁷ Idikeleya bun, kayau ĩg laa fen. ²⁸ Anĩ nigin, kel fāya bun, idi sewen anĩ atun, ĩ ai nē kayau bagai ibodōf? Ere nigin, idi ganan kayau anĩ dalen.”

²⁹ Jesus aitedin yale irokenēdin, “Ã od kũ wenēgef, ere nigin, ã Negur nē Itotoya ado Negur nē megeir keleĩ sã.

³⁰ Laa bun tamal kel fāya bun, an tamo kayau ado abob yalef ya sã, idi engel saa ilun difaref gen dibodōf. ³¹ Anĩ ere, laa bun tamal kel fāya nigin, Negur ã irokenein anĩ, ã to uwesegen de? ³² Negur iron, ‘Aya Abraham nē Negur, Isak nē Negur, Jakop nē Negur.’† ĩ laa neid Negur sã, ĩ mata ibodōya neid Negur.”

† 22:32: Eksodas 3:6

³³ Anĩ tamo kayau od enĩ karĩ de fen, ĩ agef ifelnēdin anĩ nigin terē den.

Ītāfiya Odug Bagai Ganan Wal Fiya
(Mak 12:28-34; Luk 10:25-28)

³⁴ Jesus ĩ Sadusia tamo od bun sigoreid ifokelen anĩ karĩ de fen, Farisia tamo idi guru difen. ³⁵ Idi atun, lo keleĩ tamo takam Jesus kisi fiye ken, eig fiyē to fiyen,

³⁶ “Tise, ĩtāfiya nanĩ anĩ, ganan wal fiya odug bagai Lo bun irok?” ³⁷ Jesus irokenen, “ ‘Ō, Odug ogon Negur waũ adok, malākanon adok, kisi adok bunem, ĩ nigin waũ laaf.’[‡] ³⁸ Ītāfiya enĩ ĩ matu, Lo bun ganan wal fiya odug bagai irok. ³⁹ Anĩ dō fiya are eig fiya, ‘Ō ogo nigin waũ laa fef gen, nē tã nigineg ago waũ laaf.’[§] ⁴⁰ Lo ado Profet neid od ganan, ĩtāfiya uru enĩ teten difaref.”

Ai Nē Naal Anĩ Kristus?
(Mak 12:35-37; Luk 20:41-44)

⁴¹ Sain Farisia tamo idi guru difesi di, Jesus idi to fedin, ⁴² “Kristus nigin ã kisi ai gef? Ai nē naal anĩ Kristus?”

Idi aiten dalen, “Dawid naal.”

⁴³ Jesus idi irokenēdin, “Dawid naig fe di, anĩ Awa Uurem irokenen, ĩ nigin ‘Odug’ yen?” Ī nigin Dawid iron,

⁴⁴ “ ‘Negur neu Odug irokenen:

“Imau biya melem ubod mog,
ogon kiwai tar

on yē farume gō afalauf.”^{*}

⁴⁵ Dawid ĩ nigin ‘Odug’ yen ouf are, naig fe di, Kristus ĩ Dawid naal ouf?” ⁴⁶ Taka nem, ĩ aiten yale solof irōya kisi feleya san, naa anĩ bunem ilen ganan, takam baban ĩ to fiyēya nigin kumĩ den.

[‡] 22:37: Diuteronomi 6:5 [§] 22:39: Levitikas 19:18 ^{*} 22:44: Sam 110:1

23

*Jesus Farisia Tamo Ado Lo Ifelnēdiya Tamo Ketē Fiyēdin
(Mak 12:38-40; Luk 11:39-52; 20:45-47)*

¹ Dum Jesus, tamo kayau in dō fiya tar geid irokenēdin,
² “Lo ifelnēdiya tamo, Farisia tamo geid, Moses nē sia bun dibodōdig. ³ Anī nigin, ā idi karī wiyēdig fen, ereb idi ā ago gei de di, ā ago gouf. Anī ere, ereb idi age difef anī, ā to agog, ere nigin, idi dirōdig anī to dō de age difedig. ⁴ Idi morō odudug difofa ken, tamo kayau oroweid se difedig, anī ere, idi dogo bagai, morō enei dalesauf nigin imeid gege tekelei bagai gebeya nigin to orodidig.

⁵ “Idi ereb ereb ganan age difedig, are ege tamo meleid yaleya: Age de fen, idi tamo meleid yaleya nigin, lo itāfiya bokis naal odudug nuwa bun difeid fen, demeid bun ado imeid dā bun difofādīg, idi neid kolos nē malū meluluk adodo dinodidig. ⁶ Idi, saaf odudug bun ado Juda neid uub fō bun, modoū malabag ibodōya anī orodidig. ⁷ Idi maket modoū bun, tamo kayau idim sere difiyeīd fen, ‘O tise’ difediyouf anī orodidig.

⁸ “Anī ere, ā tise to diyeīf, ere nigin, ā Tise tekelei dogol ado, ā adok tura tura. ⁹ Ā tenebur ein aib taka to dei gouf, ere nigin, ā Temeī tekelei dogol ado, ī saa ilun ibodok. ¹⁰ Ā mudur ado to diyeīf, ere nigin, ā Mudur Ado tekelei dogol, are Kristus. ¹¹ Ā atun, aib taka ganan wal fiya wō you fenē, ī āgenei kabī tamo ibodōf. ¹² Ere nigin, aib taka ī yogo yana yalesef, ī lai fesilauf, aib taka ī yogo nigin lai fesilauf, ī yana adouf.

¹³ “Lo ifelnēdiya tamo, Farisia tamo geid, ā meleid yaleya tamo, ā nigin meleīlon ado! Ā tamo kayau meleid

bun saa tano nigin sukar unogedig. Æ aug namen to ulegedig, idi dilau fenē age difef, ã katī welegedig.*

¹⁵ “Lo ifelnēdiya tamo, Farisia tamo geid, ã meleid yaleya tamo, ã nigin meleilon ado! Æ, tamo tekelei waleg fen, ï āgenei dō fiya unenēgouf nigin, teneub bun uyokeleg fen, maaī naab bun uyōgefeg ago gedig, agog fen, tamo ï anī ufelnēge di, ï āgenei dō fiya wō yef are, ï ã hel nē gere tar ubodōgef wal yeīya sane bagai wō yef.

¹⁶ “Mala ifofakeleya uyu irouya, ã nigin meleilon ado! Æ urōgedig, ‘Aib taka tempel yana bunem in od isen ken, total od irok, are ege, anī ere, aib taka tempel nē gol bunem in od isen ken, total od irok, ï dōf age fouf.’ ¹⁷ Æ neneya, meleī ifofakeleya! Ere anī odug, gol de, oo tempel gol fateul ifenēdig anī? ¹⁸ Takag ã urōgedig, ‘Aib taka alta yana nem in od isen ken, total od irok, are ege, anī ere, aib taka sesewi fiya nē safina alta bun ifaref anī yana nem in od isen ken, total od irok, ï dōf age fouf.’ ¹⁹ Æ, mala ifofakeleya tamo! Ere anī odug, safina de, oo alta sesewi fiya fateul ifenēdig anī? ²⁰ Anī nigin, aib taka alta yana nem in od isen ken, total od irok, ï alta ado safina ganana alta teten ifaref anim in od isen ken, total od irok. ²¹ Taka ï tempel yana nem in od isen ken, total od irok, ï tempel ado, Negur tempel namen ibodok anim in od isen ken, total od irok. ²² Taka ï saa yana nem in od isen ken, total od irok, ï Negur nē king sia ado, Negur ï an ibodok anim in od isen ken, total od irok.

²³ “Lo ifelnēdiya tamo, Farisia tamo geid, ã meleid yaleya tamo, ã nigin meleilon ado! Æ kabier tamal sako

* **23:13:** Itotoya tunī eig de ditoton: welegedig. ¹⁴ Lo ifelnēdiya tamo, Farisia tamo geid, ã meleid yaleya tamo, ã nigin meleilon ado! Æ waab neid fō sosoin wedig kuwesig fen, tamo kayau meleid yaleya kosē meluk ago gedig. Anī nigin, ã darau odug bagai walogouf.

nanaaleg farag fen, ten tekelei unogedig, anī ere, ā, lo nē odug, are safina wal fiya anidi nigin to kisi gedig, are lo nē madur fiya, wau ifenēya, wau momoiya. Ā anī adok to tai gedig. Ā teten nē anī dōg fen, dum nē anīg tai gem, are dem. ²⁴ Ā, mala ifofakeleya uyu irouya! Ā soloulā tar bun ibodok anī ulul nem yaleleya nigin kous gedig, anī ere, ā kamel tar bun ibodok anī utobogedig.

²⁵ “Lo ifelnēdiya tamo, Farisia tamo geid, ā meleid yaleya tamo, ā nigin meleīlon ado! Ā kap beī ado agara anī kulo gedig, anī ere, name bun amuyē isokos fen, taka nē safina yaleya nigin imeī su lai ge fen fe tetenem yaleya ado, akorou yeya aug naumeī nigin dogol yenek. ²⁶ Farisia tamo, mala ifofakeleya! Kap beī ado name ket kulo wedig, ago ge di, tetenēg fili youf.

²⁷ “Lo ifelnēdiya tamo, Farisia tamo geid, ā meleid yaleya tamo, ā nigin meleīlon ado! Ā aau lalau nem matmat sigor naki fiya gen, teten lo fiya nigin biya bagai, namen anī are tamo gare den tuweid ado erēb erēb ganan amuyē isokosen. ²⁸ Age fiya bagai, āg teten tamo kayau meleid bun madur tamo gen ubodōgedig, anī ere, nameneī mala yaleya ado sane bagai isokosen.

²⁹ “Lo ifelnēdiya tamo, Farisia tamo geid, ā meleid yaleya tamo, ā nigin meleīlon ado! Ā profet neid matmat unog fen, madur tamo neid matmat garab wiyēgedig. ³⁰ Ā urōgedig, ‘Ada tubuda tar dibodon sain bun, ada tabodom are, ada idi geid to bagu tafem, profet naudeid to filu fadam.’ ³¹ Anī nigin, ā aug nigin yaor gef, ere nigin, ā idi profet didenkesin anidi neid ibor tar. ³² Āgenei tubū tar neid mosor tobol ge di, isokosef!

³³ “Ā gogour bagai! Ā gogour sane gere tar! Ā naig ge fen, hel nē es fiyauf bun tamal uyagauf? ³⁴ Age fiya nigin, aya, profet, keleī biya tamo, tise ado ā bun sur afediyouf.

Idi tunĩ udenkesigouf, tunĩ aa tetek bun udenēdigouf, tunĩ āgenei uub fō bun wagagā gouf, fonō fonō idi darau wenēdig fen, urudigouf. ³⁵ Anĩ nigin, madur tamo Abel nē naud bun ile, Sekaraia Berekia naal, ĩ tempel alta ado atun ā ukesigen, in naud bun, madur tamo neid naudeid ganan teneub enĩ iroun nigin, anĩ nē mala solo sane ā bun isiyouf. ³⁶ Aya ā momoi arokeneik, mala solo kafĩ fiya enĩ ganan, tamo kayau sain enei bun dibodok anidi bun isiyouf.

Jesus Jerusalem Nigin Wau Laa Fen

(Luk 13:34, 35)

³⁷ “O Jerusalem, Jerusalem, ò profet udenkeis fen, ò bun sur fedig anidi meein meein wedidig, sain musei aya ò wau afon ken, ogon gerē tar kuru afedig, tataro sina momou waye farumen kuru fedig gen, anĩ ere, ā utorōgedig. ³⁸ Ulogouf, āgenei fō fonou lef. ³⁹ Anĩ nigin, aya ā arokeneik, ā aya baban to uleyagauf ile, ā fau urōgouf, ‘Odug yana bunem isif, ĩ el fiya ado,’† sain anĩ bun, ā aya uleyagauf.”

24

Idikeleya Sain Nē Uris

(Mak 13:1-31; Luk 21:5-33)

¹ Jesus tempel bun tamal kutū yeis, iyok ile mog, in dō fiya tar Jesus wagen disin, tempel fō tunĩ anĩ difelnen.

² Jesus to fedin, “Ā enĩ ganan ulegef de? Aya ā momoi arokeneik, meein enĩ taka, meein tura teten to yenēf, anĩ adok fau isog irailauf.”

³ Jesus Moul Arein* ibod mog, in dō fiya tar mugun wagen disin dirokenen, “Urokanamā, ere sain enĩ wō youf? Ere uris bagai anĩ, on isiya nē ado idikeleya nē?”

† 23:39: Sam 118:26 * 24:3: ‘Oliv Arei’ dedig.

⁴ Jesus aitedin yalen, “Takam to idegneif nigin lo weleg. ⁵ Ere nigin, musei aya yanau nem disi diröf, ‘Aya Kristus,’ age de fen, idi tamo kayau musei didegnēdiyof. ⁶ Ā kusī wōya karīg fen, tamo sigoredim kusī nigin wogō douf anī karī gouf, ā anī nigin to terē gei. Ereb ereb anī agef wō youf, anī ere, idikeleya sain fau dum isiyof. ⁷ Teneub taka fā ye fen, ī teneub taka nigin kiwai ifenēf, tano taka ī tano taka nigin kiwai ifenēf. Naū odug mimī ado, uyu taka taka bun wō youf. ⁸ Enei ganan, kayau kesu ibodōf nigin darau gariya inof gen.

⁹ “Sain age foun bun, ā idi imeid bun ulagauf, darau odug laa bun dineneif, teneub ganan bun tamo kayau ā nigin to orodiyof, ere nigin, aya yanau ā ado nigin. ¹⁰ Sain anī bun, musei momoiya dudum difouf, idi dogo tutur abob kiwai difenēf, idi abob to orodiyof. ¹¹ Agef mog, idegēya profet musei wowā douf, idi tamo kayau musei didegnēdiyof. ¹² Tobonunā sane anī fou yalauf nigin, tamo kayau musei wau laa fiya nigin folo rouf. ¹³ Anī ere, aib taka ī megeir ifar ile, idikeleya bun, Negur ī isennēf. ¹⁴ Saa tano nē biya od enī wogō difediyof anim, teneub ganan bun tamo kayau wedereid irou fen, uris gen ifenēdiyof, anī gama idikeleya isiyof.

¹⁵ “Sain ā log mog, ninir fonou inenēf,† are profet Daniel sigor bun wogō yen anī, Jerusalem fateul modoū bun ifarauf are (ani uweseg keleī youf), ¹⁶ idi Judia teneub bun dibodok, arein diya diselauf. ¹⁷ Taka ī yogon fō sokor ibodok, ī to kel isil, aaben ereb ereb gei foun. ¹⁸ Taka ī kabier ibodok, yogon gabar yalouf nigin to kel ilauf. ¹⁹ Naa anī bun, kayau bouweid ado, kayau kesu su ifenek ado, idi meleidlouf. ²⁰ Feluk sain Sabat naa bun ado, ā to uyagauf nigin Negur kosē gouf. ²¹ Sain anī bun, morō odug biya isiyof, morō age fiya gariya bun teneub

† 24:15: Daniel 9:27; 11:31; 12:11

inon isi gama, taka to wõ yen, dum buneg taka to wõ youf. ²² Negurem naa anĩ to godo falaisim are, taka to mata ibodom, tamo kayau igirnēdin idi nigin ye fen, naa anĩ godo falaisiyouf. ²³ Sain anĩ bun, taka ã irokeneif, ‘Ulegef, Kristus yeir!’ oo ‘Ī your!’ ã anĩ to momoi ge. ²⁴ Fau idegēya Kristus, idegēya profet ado wõ de fen, idi kisi falauf are, Negur igirnēdin anidig didegnēdiyof nigin uris odug memelik ado difelnēdiyof. ²⁵ Karig, aya tetunem ã arokenein.

²⁶ “Anĩ nigin, takam ã irokeneif, ‘Kristus ĩ your, gerere tuan,’ ã to ulagauf, ‘Kristus ĩ yeir, aab namen,’ ã anĩ to momoi ge. ²⁷ Gaa iseyanem kolimei fili ye di, ile, gaa ileyaneg iledig, age fiya bagai, Tamo Naal in isiyouf bun age fof. ²⁸ Nain be ereb bouwa buru waaif nē an, tum guru difouf.

²⁹ “Morõ sain anĩ bure fele di, kaisã bagai
 “ ‘gaa gugum kalauf,
 ogõ to lalan youf,
 saa ilun tamal barisa kuku rediyof,
 saa nē megeir guyoyõ douf.’

³⁰ “Sain anĩ bun, Tamo Naal nē uris saa bun wõ youf, teneub ganan bun tamo kayau waud gudũ fof. Idi Tamo Naal saa lalo bun, yogon fula fiya medeĩa barikã megeir ado isi mog, dilouf. ³¹ Agef fen, ĩ yogon engel, taur ait odug ado susur fedi di, idi, yogon tamo kayau igirnēdin anidi, teneub akor ganan bun, saa akor ganan bun ado kuru difedyouf.

³² “Gama ã, aa fig bun keleĩ walogouf: Susu bonuf fen, aarau inodif, ã keleĩ, saneya melsak. ³³ Age fiya nigin, ã anĩ ganan ulogouf are, ã keleĩ, in isiya mogo melsã, bobogē bagai ifaref. ³⁴ Aya ã momoi arokeneik, tamo kayau sain enei nē idi to sa kel mog, enĩ ganan wowã youf. ³⁵ Saa teneub ado sa kalauf, anĩ ere, neu od to bagai sa kalauf.

Naa Sain Ado Takam To Keleĩ
(Mak 13:32-37; Luk 17:26-30, 34-36)

³⁶ “Taka nem, anĩ nē naa sain ado to keleĩ, saa ilun engel idig sã, Naal ãg sã, Dei yogo dogol keleĩ. ³⁷ Noa nē sain bun age fen age fiya bagai, Tamo Naal isiyouf bun age fouf. ³⁸ Kuwei odug nē naa fau mog, tamo kayau saafei de fen, naanuei den, tamo kayau yalef, kayau tamo difenek difen, age de dile mog, Noa waag namen ilen. ³⁹ Idi erew wõ youf anĩ to keleĩ mog, kuwei isi, adok kuweir dilelen. Age fiya bagai, Tamo Naal ã isiyouf bun age fouf. ⁴⁰ Tamo uru idi kabier kabĩ dalef difarauf, tekelei yalouf, taka itornēf. ⁴¹ Kayau uru idi falawa falei dife mog, tekelei yalouf, taka itornēf.

⁴² “Age fiya nigin, meleĩ unog fen, log, ere nigin, ã keleĩ sã, naa nanĩ be bun ãgenei Odug isiyouf. ⁴³ ã keleĩ youf: Fõ marau, bõ erew sain, bē tamo isiyouf keleĩ youf are, ã mata ibod ken, bē tamo in fõ to narĩ fouf nigin ololo fouf. ⁴⁴ Age fiya nigin, ãg saika gouf, ere nigin, Tamo Naal ã fau sain to isiyouf gouf bun isiyouf.

Ferfer Biya Ado Ferfer Sane
(Luk 12:42-46)

⁴⁵ “Ferfer taka aim anĩ dõ fiya kisi biya ado de? ã yogon odugem, ã yogon odug nē fõ bun anidi neid saaf, dogo neid sain kilei dõf ifenēdiyof nigin ima bun inon anĩ. ⁴⁶ Sain tamo odug kelouf bun, ferfer biya bagai age fe di, ilouf, tamo odug ã nigin biya fiyēf. ⁴⁷ Aya ã momoi arokeneik, tamo odug ã, yogon safina ganan ferfer anĩ ima bun inouf. ⁴⁸ Anĩ ere, ferfer taka sane ã wau bun irõf, ‘Neu tamo odug ilen, sain meluk biya gerõ ibodok, ã kukula to isiyouf.’ ⁴⁹ Age ye fen, ã, in kabĩ tura tar idenēdiya gariya ino fen, gama ã yogo, saaf biya naan biya, aai sē fiya tamo geid dõdig. ⁵⁰ Ferfer anĩ nē tamo odug, in isiya nē naa, ferfer to isiyouf ye fen, kisif mog, in isiya sain, ã keleĩ sã mog,

isiyouf. ⁵¹ Tamo odug, ferfer anĩ gudũf fisik fe fen, mala yaleya tamo geid nedĩ modoũ bun inenẽf, an are wifirig ye fen, gobora kikokõ yediyouf.”

25

Kayau Taulei Ten Idi Bun Yaab Od

¹ Jesus tobol fe iron, “Sain anĩ bun, saa tano ã, kayau taulei ten, idi neid lam gei de diyok dilen, tamo mois tarabã difiyẽf age fiya gen. ² Faif idi kisi neneya ado di, faif idi kisi biya ado. ³ Kisi neneya ado, idi neid lam gei difen, anĩ ere, keresin to dalen. ⁴ Anĩ ere, kisi biya ado, keresin kulumã ado lam dalen. ⁵ Tamo mois kaisã to isin, idi adok mulã fedi di, denenan.

⁶ “Bõ atun ait taka iweig iron, ‘Ulegef, tamo mois mogo yeir, ulolõ wesig fen, fotou wiyẽg!’

⁷ “Kayau taulei ganam fafã de fen, lam wik koriri difeselen. ⁸ Kisi neneyam, kisi biya ado dirokenẽdin, ‘Ågenei keresin tunĩ wanamãg, amã nemã lam gare felediyou fenẽ.’

⁹ “Kisi biya adodom, kisi neneya dirokenẽdin, ‘Eo, keresin eĩ, ã ado amã ado to kisi falauf. Amam ifeneĩya ban, uleg, oun keresin na nẽ dinodig bun, aug nigin na waleg.’

¹⁰ “Kisi neneya idi, keresin na nigin dile mog, tamo mois mogo isin. Kayau taulei idi ololo difiyen, weim bagu fiya nẽ tar bun, aaben dilelen. Age dife di, sukar kotũ felen.

¹¹ “Dum, kisi neneya idig disin, idi diron, ‘Tamo odug, tamo odug, amã nigin sukar kã wo!’

¹² “Anĩ ere, tamo mois aitedin yalen, ‘Aya ã momoi arokeneik, aya ã keleĩ sã.’

¹³ “Age fiya nigin, ã lo weleg, ere nigin, naa kilok ado ã keleĩ sã.

Kabī Tamo Moni Gadō Fedin Nē Yaab Od
(Luk 19:11-27)

¹⁴ “Takag, saa tano ĩ, tamo taka ĩ, uyu takā gerō naab ilau fenē nigin, ĩ yogon ferfer iweigneĩd fen, yogon safina kulatun de kenēf nigin, imeid bun inon age fiya gen.

¹⁵ Taka ĩ faif tausen kina ifenen, taka tu tausen kina ifenen, taka wan tausen kina ifenen, idi dogo mugu mugu neid safina kulatun fiya nē keleĩ kilei kilei ifeneĩd fen, ĩ uyu takā gerō naab ilen. ¹⁶ Tamo faif tausen kina yalen, kaisā bagai ilen, moni kabī bun ino fen, baban faif tausen kina yalen. ¹⁷ Tamo tu tausen kina yalen, ĩg agef fen, baban tu tausen kina yalen. ¹⁸ Tamo wan tausen kina yalen, anĩ ere, ĩ ile, meku yale fen, tamo odug nē moni teneub kur inokelen.

¹⁹ “Sain meluk bure fele di, ferfer neid odug kel isi fen, moni ferfer mugu mugu ifenēdin anĩ, idi naig dife kabī difenen anĩ, fated de dirokenēf nigin ferfer ganan iweig laisin. ²⁰ Tamo faif tausen kina yalen, ĩ baban faif tausen kina taka ado irou isi fen, ĩ iron, ‘Tamo odug, õ aya faif tausen kina wanan, ulef, aya baban faif tausen kina taka ado.’

²¹ “In tamo odug ĩ irokenen, ‘Õ de agon, õ ferfer biya dō fiya biya bagai! Õ safina naal bun kulatun biya ubodon nigin, aya õ imã bun safina musei anouf. Usi fen, ogon tamo odug nē kulīya namen ubod!’

²² “Tamo tu tausen kina yalen, ĩg isi fen, ĩ iron, ‘Tamo odug, õ aya tu tausen kina wanan, ulef, aya baban tu tausen kina taka ado.’

²³ “In tamo odug ĩ irokenen, ‘Õ de agon, õ ferfer biya dō fiya biya bagai! Õ safina naal bun kulatun biya ubodon nigin, aya õ imã bun safina musei anouf. Usi fen, ogon tamo odug nē kulīya namen ubod!’

²⁴ “Age fe di, tamo wan tausen kina yalen, ĩ isi fen, iron, ‘Tamo odug, aya kelein, õ tamo totol ado, onom to utenen

anĩ kusu wodig, onom faat to uraran anĩ fito wodig. ²⁵ Anĩ nigin, aya õ nigin kumĩ au fen, ele, ogon moni teneub kur anokelen. Ulef, ogon safina yeir.’

²⁶ “In tamo odug ĩ irokenen, ‘Õ, ferfer sane fõ tamal! Õ kelein, ayam to atenen anĩ kusu afedig, ayam faat to araran anĩ fito afedig de? ²⁷ Õ kisi agom, neu moni benk bun uno di, benk im kabĩ yalekanam, ago wom, sain aya kelauf bun, moni kabĩ yalen anĩ nẽ mala ado, moni õ benk wenen anĩ bagu fiya kel isin ado alem. Anĩ õ to agon.’

²⁸ “Age ye fen, ĩ ari fedin, ‘Wan tausen kina ĩ bun son ge fen, tamo ten tausen kina ado anĩ wenẽg. ²⁹ Taka ĩ ereb ado, aya toru afouf, age fe di, ĩ musei adouf. Taka ĩ sã bagai, ereb taka ĩ adog, ĩ bun tamal son fouf. ³⁰ Ferfer sane anĩ mayarẽ gugum namen urãg, an are wifirig ye fen, gobora kikokõ yediyouf.’

Sipsip Meme Ado

³¹ “Sain Tamo Naal, yogon fula fiya medeĩya ado engel ganan geid disiyouf, ĩ in ibodõya modoũ fula fiya medeĩya bun ibodõf. ³² Teneub ganan bun, tamo kayau ĩ wagen kuru difediyouf, age dife di, ĩ tamo kayau foi fediyouf, sipsip lo fiya tamo, sipsip meme ado foi fedig gen age fouf. ³³ ĩ sipsip ima biyalẽ inoid fen, meme ima kilẽ inodiyouf.

³⁴ “Agef fen, King ĩ, idi ima biyalẽ anidi irokenẽdiyouf, ‘Neu Deim el yeik ã, usig, ãgenei akoreĩ waleg, gariya bun teneub inon bunem isi gama, tano ãgenei nigin saika fen anĩ. ³⁵ Ere nigin, aya naũ fiya mog, ã yõya nẽ safina wanagen, aya naan ail fiya mog, ã naan yõya nigin wanagen, aya yaũ tamo abod mog, ã aabẽ urou uleyagen. ³⁶ Aya gemũ abod mog, ã gabar ufilaĩnagen, aya dagi abod mog, ã kulatun wiyagen, aya kalabus bun abod mog, ã usig ki wiyagen.’

³⁷ “Age ye di, madur tamo kayau aiten dalen, ‘Oduḡ, ere sain ò naũ ubod mog, amã saaf mafonon, ò naan ail yõ mog, naan mafonon?’ ³⁸ Ere sain ò yaũ tamo mailiyo ken, amã nemã fõ bun maleyon, ò gemũ ubod mog, gabar mafilaĩnon?’ ³⁹ Ere sain ò dagi ubod mog, amã ò mailiyo, ò kalabus bun ubod mog, amã ki mayon?’

⁴⁰ “King aitedin yale irõf, ‘Aya ã momoi arokeneik, ã neu turau tar yeneid sã enidi taka el wiyẽgen, are aya el wiyagen.’

⁴¹ “Age ye fen, ï ima kilẽ anidig irokenẽdiyof, ‘Gelu yein ã, wageun uyag uleg, yã mala fitotoleya faimud, Satan in engel geid idi nigin dodok fen anĩ, an uleg. ⁴² Ere nigin, aya naũ abod mog, ã ereb taka to wanagen, aya naan ail fiya mog, ã naan to wanagen. ⁴³ Aya yaũ tamo abod mog, ã aabẽ to urou uleyagen, aya gemũ abod mog, ã gabar to ufilaĩnagen, aya dagi abodon, kalabus bun abod mog, ã to kulatun wiyagen.’

⁴⁴ “Idig aiten dale dirõf, ‘Oduḡ, ere sain ò naũ ubodon, naan sã ubodon, yaũ tamo ubodon, gabar sã ubodon, dagi ubodon, kalabus bun ubodon, amã ò to masennon?’

⁴⁵ “King aitedin yale irõf, ‘Aya ã momoi arokeneik, ã neu idi yeneid sã enidi taka to el wiyẽgen, are aya to el wiyagen.’

⁴⁶ “Age ye di, idi darau faimud ibodkeleya nẽ bun dilauf, madur tamo kayau idi mata faimud ibodkeleya nẽ bun dilauf.”

26

Jesus Yukesiya Nigin Naab Dimiren

(Mak 14:1, 2; Luk 22:1, 2; Jon 11:45-53)

¹ Jesus od enĩ ganan wogõ ye bure fel fen, ï in dõ fiya tar irokenẽdin, ² “Ã keleĩ, naa uru bure fele di, Pasa naa

isiyouf, age fe di, Tamo Naal idi imeid bun dino di, aa tetek bun dukesiyouf.”

³ Dum pris odudug, tamo kayau neid mudur adodo, pris mudur ado in yana Kaiafas in fō bun guru difen. ⁴ An idi Jesus idegēya naab bun dale fen, dukesiyouf nigin katō difen. ⁵ Idi diron, “Sifa inoya bun to age tafouf, age tafouf, tamo kayau idi seye de fen, kusī dalesauf.”

Betani An Kayau Taka Jesus Mudur Bun Moul Fi Felen
(Mak 14:3-9; Jon 12:1-8)

⁶ Jesus, Betani fonō an, Simon lepra dagi kulu adon in fō bun ibod mog, ⁷ kayau taka, Jesus wagen moul sumei biya bagai moni odug nem anī, moul ifeya nē gulub* ado irou isin anī, Jesus tebol bun saaf yoko ibod mog, ī mudur bun moul fi felen.

⁸ Anī in dō fiya tar dile mā, idi nameid sane fen, diron, “Ere nigin enī sekil fef? ⁹ Moul enei na odug nem sur fiyam are, moni anī yale maleg tamo ifenēdiyam.”

¹⁰ Anī Jesus kelei ken, idi irokenēdin, “Ā, ere nigin kayau enī wau morō wenēgef? Kayau enī aya bun biya bagai age fel. ¹¹ Maleg idi ā geid faimud ubodōgouf, anī ere, aya ā geid faimud to tabodōf. ¹² Sain kayau moul enī, neu bouwau bun fi felel are, mekur ainēf nigin dodok fiyal. ¹³ Aya ā momoi arokeneik, tenebur ein nain be biya od enī wogō douf, ereb kayau anī age fen anīg wogō douf. Age dife di, idi ī nigin dum dum wogō de fen, karī dalauf.”

Judas Jesus Kiwai Tamo Imeid Bun Inoya Nigin Yo Yen
(Mak 14:10, 11; Luk 22:3-6)

¹⁴ Agef fen, dō fiya tar tuwelf idi atun taka, yana Judas Iskariot tamal, pris odudug wagedin ile fen, ¹⁵ to fedin, “Sain aya ī imeī bun ano di, ere anī ā aya wanagauf nigin kisi gef?” Age ye di, idi teti silwa koin moni anī diweskene

* 26:7: Meein alabasta nem dinon.

ken, difenen. ¹⁶ De anenem, Judas ï Jesus kiwai tamo imeid bun inoya nigin naab imirek ilen.

Oduġ Nĕ Bō Saaf

(Mak 14:12-26; Luk 22:7-23; Jon 13:21-30; 1 Korin 11:23-25)

¹⁷ Bret yis sã sifa inoya naa matu anĭ bun, in dō fiya tar Jesus wagen disi to difiyen, “Ō amã nain anĭ Pasa saaf wãf nigin, amã dodok mafe konōf anĭ oroyok?”

¹⁸ Jesus iron, “Taun uleg, tamo taka wagen wōġ fen, urokenĕġ, ‘Tise irok: Aya neu naa mogo melsã. Aya, neu dō fiya tar geid, oġon fō bun Pasa saaf male fen, sigigi mafouf.’ ” ¹⁹ Anĭ nigin, in dō fiya tar, Jesus iron anĭ dō de fen, Pasa saaf nigin dodok difen.

²⁰ Aragau di, Jesus, in tuwelf geid, tebol bun saaf doko dibodon. ²¹ Idi saaf dokon, Jesus iron, “Aya ã momoi arokeneik, ã atun takam, aya kiwai tamo imeid bun ineyauf.”

²² Idi waud gudŭf fen, mugu mugu wogō fiyĕya nigin gariya dinon, “Oduġ, momoi bagai, aya sã?”

²³ Jesus aitedin yale iron, “Taka ï, amã uruwom imamã takai beĭ bun nu mafesil, im aya kiwai tamo imeid bun ineyauf. ²⁴ Tamo Naal, ï nigin Negur nĕ Itotoya irok kilei, agef bagai ilauf. Anĭ ere, tamo ï Tamo Naal kiwai tamo imeid bun inof, ï malalon ado! Ĭ sina to gō fem, are dem.”

²⁵ Age ye di, Judas, tamo ï Jesus kiwai tamo imeid bun inouf, iron, “Momoi bagai, aya sã, Rabi†?”

Jesus aiten yale iron, “Are ō oġo urok.”

²⁶ Idi saaf dokon, Jesus bret yale, Negur de fiye ken, bret anĭ mumãf, in dō fiya tar ifeneĭd fen, iron, “Bret enei waleġ fen, wōġ, eĭ neu bouwau.”

²⁷ Agef fen, ï kap yale, Negur de fiye ken, kap anĭ ifeneĭd fen, iron, “Ā ganan, enĭ bun wōġ. ²⁸ Eĭ neu naudou

† 26:25: Rabi, anĭ nĕ gariya, Juda neid tise.

bar itenēya nigin, are tamo kayau musei mosor yalel kenēdiyof nigin fi felef. ²⁹ Aya ã arokeneik, aya baban wain enĩ to ãf, gaman ile, aya ã geid, neu Dei nē tano bun, wain mata tãf anĩ bun.”

³⁰ Anĩ bure fele di, idi seg taka dalel fen, idi Moul Arei bun diselen.

Pitam Jesus Wa Fiyēf Nigin Jesus Iron

(Mak 14:27-31; Luk 22:31-34; Jon 13:36-38)

³¹ Jesus idi irokenēdin, “Bõ enĩ bun, ã ganan aya utornagauf, ere nigin, are Negur nē Itotoya irok kilei:

“Aya sipsip marau aukesi di,

sipsip ganan firagagaũ difouf:‡

³² Anĩ ere, aya, laa bun tamal kel fã au fen, aya ket Galili uyu alauf.”

³³ Pita, Jesus aiten yale iron, “Idi ganan õ ditornõfeg, aya are to bagai atornõf.”

³⁴ Jesus Pita irokenen, “Aya õ momoi arokonok, bõ enĩ bun tataro kokorok yeya sã mog, õ aya nigin wa towo wouf.”

³⁵ Anĩ ere, Pita Jesus irokenen, “Momoi ada uruwom gare tau mogoufeg, aya õ nigin to bagai wa afouf.” Age ye di, dõ fiya tar ganan, od tekelei anĩ diron.

Getsemane Oun

(Mak 14:32-42; Luk 22:39-46)

³⁶ Age de fen, Jesus in dõ fiya tar geid, modoũ taka yana Getsemane dilen. An, ï idi irokenēdin, “Aya oun ele, kosē au mog, ein ubodõgouf.” ³⁷ Jesus, Pita Sebedi gere tar uru gei feid fen, dile mã, ï wau gudũf fen, moro kalaisin. ³⁸ Age fe di, ï idi irokenēdin, “Neu malaukanon tobega le fen, wau morõ gudũ falaisi, laa nē daũ bun ifaref. Ein ufareg fen, ã aya geid lo tafalauf.”

‡ 26:31: Sekaraia 13:7

³⁹ Naal godof iroule fen, kubū ye, nawa tenebur kumokur fe fen, kosē yen, “Neu Dei, kisi falauf are, darau nē kap enī walel kanauf. Anī ere, neu oroya to dō wouf, on oroya anī dogol dō wo.”

⁴⁰ Age fel fen, Jesus in dō fiya tar gedin kel isin, mulā den mog, iledin, ī Pita to fiyen, “Tamo ā, aya geid aua tekelei lo fiya nigin to kisi feleya de? ⁴¹ Ā, lo weleg fen, kosē gouf, are ā kisi yeīya bun to kubū gouf nigin. Uur are orof, anī ere, bouwa anī malegef.”

⁴² Ī, anī dō fiya, baban kel ile, kosē yen, “Neu Dei, kap enī bun aya to āf are, ō kap enī yaleleya nigin kisi feleya sā, age fouf, ō ogon oroya dō wouf.”

⁴³ Ī kel isin, baban denena mog iledin, ere nigin, idi meleid morō gudū fesin. ⁴⁴ Agef fen, ī idi itorneid fen, baban kel ilen, kosē yen anim towo, od tekelei iron anī baban kosē yen.

⁴⁵ Agef fen, ī in dō fiya tar gedin kel ile, idi irokenēdin, “Ā fau si unog fen, yenēyai gef? Ulegef, sain mogo melsā, Tamo Naal mogo mosor tamo imeid bun ilef. ⁴⁶ Fafāg fen, teleg! Kiwai imeid bun inoya tamo yeir isif!”

Jesus Dirounen

(Mak 14:43-50; Luk 22:47-53; Jon 18:3-12)

⁴⁷ Jesus fau wogō ye mog, in dō fiya tar tuwelf idi anī atun taka, Judas isin. Tamo musei dimig adodo seburer adodo ī geid disin. Pris odudug, tamo kayau neid mudur adodo idim sur difedi di, disin. ⁴⁸ Gama Judas, Jesus kiwai tamon inoya tamo ī, Jesus yaor fiyēf nigin idi uris ifenēdin: “Tamo aya umā fiya bunem aan afiyēf anī, ī waleg.” ⁴⁹ Judas, kaisā bagai, Jesus wagen ile iron, “O Rabi, fel!” Age ye fen, ī umā fiyen.

⁵⁰ Jesus ī irokenen, “Mou, ereb wofon usif, are ago.”

Age ye mog, tamo Jesus wagen dile dirounen. ⁵¹ Age dife di, tamo Jesus weim difaren anidi takam, ima iran, dimig ul feis yalen, pris mudur ado nē ferfer weder salōf iran.

⁵² Jesus ĩ irokenen, “Ogon dimig in modoũ bun uno, ere nigin, idi ganan dimig ul difeis dalef, dimig bun gare douf. ⁵³ Ā kisi gef are, aya, neu Dei isennauf nigin aweignē di, ĩ kaisā bagai, engel musei biya, sewenti-tu tausen wal fiya imau bun inoya kisi feleya sã de? ⁵⁴ Age afouf are, Negur nē Itotoya anĩ nigin iron enĩ ganan, naig fe kisi fel, agef wō youf?”

⁵⁵ Sain anĩ bun, Jesus tamo musei irokenēdin, “Ā bē tamo walegedig gen, aya ā dimig adodo seburer adodo waleyagau fenē usigef de? Naa ganan, aya tempel fofomala bun abod ken, od afelnēdidig, anĩ ere, ā aya to urouyagen. ⁵⁶ Anĩ ere, profet neid itotoya kisi falauf nigin, enĩ ganan wō yen.” Age ye di, in dō fiya tar ganan ditornē diyalelen.

Jesus Juda Kaunsel Neid Kot Mala Bun Ifaren

(Mak 14:53-65; Luk 22:54, 55, 63-71; Jon 18:13, 14, 19-24)

⁵⁷ Idi Jesus dalen, pris mudur ado Kaiafas garan dirou dilen, an lo ifelnēdiya tamo, tamo kayau neid mudur adodo geid guru difen. ⁵⁸ Anĩ ere, Pita, Jesus dume naal soso fiye ken, dōf tokō fel ile, pris mudur ado nē fofomalan wō yen. ĩ namen ile fen, kabĩ tamo geid dibod ken, naig be difiyēf nigin lo fen.

⁵⁹ Pris odudug, Juda neid kaunsel ganan geid, Jesus laa bun dinenēf nigin, bou bun idegēya od dinou fenē dimiren. ⁶⁰ Musei wagen disi fen, disenneid fen, idegēya od diraran, anĩ ere, Jesus laa bun dinenēf nigin od gariya taka to dilen.

Dum tamo uru wō den, ⁶¹ anidim diron, “Tamo enim iron, ‘Aya Negur nē tempel narĩ afel fen, naa towo bun baban anouf, are kisi feleya.’ ”

⁶² Age de di, pris mudur ado fã ye, ifar fen, Jesus irokenen, “Õ to solo urõf de? Eĩ ere od anĩ, tamo enidi õ nigin dirousif?” ⁶³ Anĩ ere, Jesus mutũ ifaren.

Pris mudur ado Jesus irokenen, “Õ mata ibodõya Negur mala bun urõf nigin, od arokonok. Õ momoi Kristus, Negur Naal be anĩ, amã urokanamãf.”

⁶⁴ Jesus aiten yalen, “Ao, õ ogo yer urok. Anĩ ere, aya ã ganan arokeneik: Dum bun, Tamo Naal Negur megeir ado ima biyalem ibod ken, saa lalo bun isi mog, ã ulogouf.”

⁶⁵ Jesus age ye di, pris mudur ado karĩ ye fen, in kolos serek fe fen, iron, “Ĩ Negur kono fel! Ere nigin ada od megeir fiya nigin tamo baban tamirẽf? Ulegef, ã gama Negur kono fel anĩ karĩ gel. ⁶⁶ Anĩ ã ere kisi gef?”

Idi aiten dalen, “Ĩ laa bun ilauf.”

⁶⁷ Age de fen, idi, Jesus nawa bun disisne ken, imedim dun. Tunim wala fã de fen, ⁶⁸ diron, “Kristus, kurõ weis urokanamã, aim õ inok?”

Pita Jesus Nigin Wa Fen

(Mak 14:66-72; Luk 22:56-62; Jon 18:15-18, 25-27)

⁶⁹ Pita, pris mudur ado nẽ fõ fofomalan ibod mog, kabĩ kayau momoul taka wagen isi iron, “Õg Jesus Galili tamal weim uyõgen.”

⁷⁰ Anĩ ere, ganan meleid bun ĩ waf fen, iron, “Õ od urok enĩ, aya keleĩ sã.”

⁷¹ Age ye fen, ĩ iyok ilen, bobog bun, an kayau momoul takam ile fen, tamo kayau an difaren idi irokenẽdin, “Tamo enĩ, Jesus Nasaret tamal ĩ geiden.”

⁷² ĩ baban waf fen, total od iron, “Tamo are aya keleĩ sã!”

⁷³ Sain naal ile di, idi an difaren Pita garan dile fen, diron, “Momoi bagai, õ idi neid taka, on od wogõya bun ogo yaor yok.”

⁷⁴ Age de di, ĩ mogo yogo bouwa geluf fen, total od irokenẽdin, “Tamo are aya keleĩ sã!”

Age ye mog, kaisã bagai tataro kokorok yen. ⁷⁵ Age fe di, Pita Jesus wogõ yen anĩ nigin weder fokõ yen, “Sain tataro kokorok yeya sã mog, õ aya nigin wa wo towo wouf.” Anĩ nigin, ĩ weder fokõ ye di, ĩ mayarē ile fen, inã odug yalen.

27

Judas ĩ Yogo Kosim Bun Ula Iseginen

(Mak 15:1; Luk 23:1, 2; Jon 18:28-32; Aposel 1:18, 19)

¹ Bonimeĩ bagai, pris odudug, tamo kayau neid mudur adodo geid, Jesus yukesiya nigin od difon. ² Idi ĩ difõ dale diroule, gawaman nē mudur Pailat ima bun dinon.

³ Anĩ Judas, Jesus kiwai ifenen, ĩ lof mog, Jesus dukesiyouf nigin ĩ bou bun od dun anĩ ile fen, ĩ kisif wau yu ken, teti silwa koin moni kel iroule, pris odudug, tamo kayau neid mudur adodo geid ifenēdin. ⁴ Judas iron, “Aya mosor anon, ere nigin, ĩ mosor sã mog, ayam kiwai anon.”

Age ye di, idi aiten dalen, “Amã ere mayõf? Are ogon sakir.”

⁵ Judas moni irou ile, tempel namen irara ken, ilen. Anĩ ĩ iya ile, yogo kosim bun ula iseginen.

⁶ Pris odudug moni gei de fen, diron, “Lo to wal tafouf nigin, moni enĩ tempel nē kolekta bokis bun to ufeg, ere nigin, moni enĩ naud mala.” ⁷ Katõ fiya bure difel fen, moni anim, mis inoya tamo nē teneub anĩ na dale fen, yaũ tamo mumã difediyouf nigin, idi kisi difon. ⁸ Anĩ bunem, gamag teneub anĩ yana, Naud nē Mayã dedig. ⁹ Are profet Jeremaia nē od, eig ye wogõ yen anĩ kisi felen: “Idi teti silwa koin moni dalen, moni anĩ Israel tamo kayau ĩ nigin digiren. ¹⁰ Idi moni anim, mis inoya tamo nē teneub na dalen, Odug aya agef irokanan kilei.”*

* 27:10: Sekaraia 11:12, 13; Jeremaia 19:1-13; 32:6-9

Jesus Pailat Mala Bun Ifaren

(Mak 15:2-15; Luk 23:3-5, 13-25; Jon 18:33-19:16)

¹¹ Jesus, Rom gawaman nē mudur Pailat, mala bun ifare di, gawaman nē mudur Pailat ĩ to fiyen, “Ō Juda neid king de?”

Jesus iron, “Are de yer, ō urok anĩ.”

¹² Sain pris odudug, tamo kayau neid mudur adodo geid, Jesus bou bun od dun, ĩ aitedin to yalen. ¹³ Pailat Jesus to fiyen, “Ō boũ bun od dirarak to karĩ wof de?”

¹⁴ Anĩ ere, Jesus aiten to yalen, ĩ bou yũya od tekelei bagai nigin taka to solof iron. Age fe di, gawaman nē mudur, odug biya terē yen.

¹⁵ Gama gawaman mudur nē tobonunã, Pasa sifa naa bun, tamo kayau, tamo taka kalabus bun digirĩ di, yal-isnēdig. ¹⁶ Sain anĩ bun, idi kalabus tamo taka, yana sane bagai adon, ĩ yana Barabas. ¹⁷ Bonimei, tamo kayau, Pailat nē fō bun guru difesi di, Pailat to fedin, “Nanĩ ã aliskeneĩf anĩ oroyeik, Barabas de oo Jesus ĩ Kristus dedig anĩ?” ¹⁸ Ere nigin, ĩ yogo kelein, tamo kayau neid mudur adodo idi, kiyēĩ bunem, Jesus ĩ ima bun dinon.

¹⁹ Pailat od es fiya modoũ bun ibod mog, in aiwa od sur fen, “Tamo anĩ ĩ mosor sã, ĩ nigin ereb taka to ago wouf, ere nigin, aya, nor bõ, ĩ nigin ami ken, morõ odug ĩ nigin ailel.”

²⁰ Anĩ ere, pris odudug, mudur adodo geid, tamo kayau od irõya nigin wedereid diroun, are idi Barabas yalishnēya nigin ado, Jesus dukesiyouf nigin nonĩ douf nigin age difen.

²¹ Gawaman nē mudurem to fedin, “Aya ã aliskeneĩf nigin, uru enidi ã nanĩ oroyeik?”

Idi aiten dalen, “Barabas anĩ.”

²² Pailat to fedin, “Age fiyauf are, aya, Jesus, Kristus dedig nigin, ere naig afouf?”

Idi ganan diron, “Aa tetek bun ũf!”

²³ Pailat to fedin, “Ere nigin? Ere mosor ĩ age fen?”

Anĩ ere, idi total bagai diweig diron, “Aa tetek bun ũf!”

²⁴ Pailat ĩ anĩ ile fen, ĩ od irōya nigin naab taka sã, anĩ tamo kayau idi total bagai dino fen, kusĩ dou fenē age dife di, ĩ naan yale fen, tamo kayau meleid bun ima kulof fen, ĩ iron, “Tamo enĩ naud aya bun sã, are āgenei sakir!”

²⁵ Tamo kayau ganan aiten dale diron, “Yogon naud utor len, amã bun ado nemã kesu tar bun yenēf!”

²⁶ Age de di, ĩ Barabas yalis ifenēdin. Agef fen, ĩ irō di, Jesus wagĩ de fen, ĩ aa tetek bun dũf nigin, kusĩ tamo imeid bun inon.

Kusĩ Tamo Jesus Diselinen

(Mak 15:16-20; Jon 19:2, 3)

²⁷ Gawaman mudur nē kusĩ tamo, Jesus dale gawaman mudur nē fō namen dile fen, an mayã taka, kusĩ tamo ganan gou difalaisi salili difiyen. ²⁸ Idi Jesus nē kolos dinukeis fen, kolos meluk giriya anĩ difounnen. ²⁹ Age dife fen, idi malũ duri ado dale, teter tanak kori de fen, ĩ mudur bun kurũ difen. Idi werĩ tibog dale, ima biyalē dino fen, wagen bobou de fen, diselinen. Idi diron, “O Juda neid king gai gai ibodōf!” ³⁰ Idi ĩ disisne ken, idi baban werĩ tibog ima bun tamal dale, mudur bun baba baban dun. ³¹ Idi diseline kel fen, kolos meluk giriya anĩ dinukeis, yogon kolos bagai anĩ baban difounnen. Age de fen, kusĩ tamom idi, ĩ aa tetek bun dũf nigin dirou diselen.

Jesus Aa Tetek Bun Dun

(Mak 15:21-32; Luk 23:26-43; Jon 19:17-27)

³² Sain idi mayã anĩ ditor diyok dile fen, idi Sairini tamal tamo taka fotou difen, yana Simon. Idi ĩ, Jesus nē aa tetek faali foug nigin nugo difiyen. ³³ Idi disel, modoũ yana Golgota (anĩ nē gariya, Mudur Tuwa nē Modoũ) wō den.

³⁴ Kusĩ tamo idi, an wain makik ado falei difen anĩ, Jesus yãf nigin difenen. Anĩ ere, ĩ yõ ile fen, yõya nigin itoron. ³⁵ Sain idi ĩ aa tetek bun du kel fen, idi aisaĩ dira kodẽ de fen, yogon kolos morou morou gadõ difen.† ³⁶ Age de fen, idi an dibod ken, lo difiye kelen. ³⁷ ĩ bou bun od dinon anĩ, idi yogon mudur ilun ditoton: Eĩ JESUS, JUDA NEID KING. ³⁸ Age de fen, kusĩ tamo idi, bẽ tamo urug, ĩ geid aa tetek bun didenen, taka yogon ima biyalẽ, taka yogon ima kilẽ. ³⁹ Tamo kayau dile disi dife, Jesus kono difiye ken, kasã difiyẽ, mudureid dira ken, ⁴⁰ idi diron, “Õ onom tempel narĩ wol fen, baban naa towo bun anouf won, õ ogo nigin usennẽf! Õ Negur Naal wouf are, aa tetek bun tamal kutũ weis!”

⁴¹ Age difiyen gen, pris odudug, lo ifelnẽdiya tamo, tamo kayau neid mudur adodo, idi Jesus diselinen. ⁴² Idi diron, “Tunĩ anĩ isennẽdin, anĩ ere, ĩ yogo nigin isennẽya kisi feleya sã! ĩ Israel nẽ king! Utornẽg len, gama aa tetek bun tamal kutũ yesiyouf. Age fe di, ada ĩ nigin momoi tauf. ⁴³ ĩ Negur nigin momoi yedig. ĩ irõdig, ‘Aya Negur Naal,’ anĩ nigin, Negur ĩ nigin orouf are, utornẽg len, gama Negurem ĩ isennẽf.” ⁴⁴ Age difiyen gen, bẽ tamo Jesus geid, aa tetek bun didenen idig, ĩ nigin kono fiya od in bou bun diran.

Jesus Laa Fen

(*Mak 15:33-41; Luk 23:44-49; Jon 19:28-30*)

⁴⁵ Tuwelf kilok gaa ado nẽ ile, tri kilok aragaun, gugum isin, teneub ganan kerub fen. ⁴⁶ Tri kilok age fiya mog, Jesus wade bagai iweig iron, “Eloi, Eloi, lama sabaktani?”

† 27:35: Itotoya tunĩ dum ditoton: gadõ difen, are od profet wogõ yen anĩ kisi falauf nigin: “Idi neu gabar idi atun gadõ de fen, neu kolos nigin aisaĩ dira ken, kodẽ den.” (Sam 22:18)

-anĩ nē gariya, “Neu Negur, neu Negur, ere nigin õ aya utornal?”‡

⁴⁷ Tunĩ an difaren, anĩ karĩ de fen, diron, “İ Eliya iweignek.”

⁴⁸ Kaisã bagai, idi atun takam gudu re ile, spons[§] yalen, wain kai ado bun nu feis fen, tibog bun ino fen, Jesus yãf nigin ifenen. ⁴⁹ Tunĩ ganan diron, “Gama utornēg, Eliya isi isennē mog, tailauf.”

⁵⁰ Jesus baban ait odug nem iweig di, in uur ul fe yale di, laa fen.

⁵¹ Sain anĩ bun, gabar meluk odug tempel namen modoũ fateul bun ibodon anĩ, serek fe uru fen, ilunenem irousil teneburen. Teneub yoũf fen, meein fara fedin.

⁵² Matmat bobog kã fedid di, tamo kayau fateul musei gare den idi, baban mata fafã den. ⁵³ Idi matmat bunem fafã den anidi, Jesus kel fã ye di, Jerusalem fateul taun dile fen, tamo kayau musei meleid bun wowã den.

⁵⁴ Kusĩ tamo tunĩ, idi neid orowa geid, Jesus tari difiyen, teneub yoũ fe di, ereb ereb ganan wowã ye di, dile fen, fatuk bagai terē de fen, diron, “Mmoi bagai, ĩ Negur Naal!”

⁵⁵ Kayau musei an difaren, idi so del fen, lo difen. Idi Galili anenem Jesus aruna yaleya nigin dõ difen anidi.

⁵⁶ Idi atun Maria Magdala tamal, Maria Jems Joses ado neid sineid, taka Sebedi gere tar neid sineid.

Jesus Mũ Difen

(Mak 15:42-47; Luk 23:50-56; Jon 19:38-42)

⁵⁷ Aragau mog, safina ado tamo, Arimatea tamal, yana Josef isin, ĩ Jesus nē dõ fiya tar anĩ nē taka. ⁵⁸ İ Pailat wagen ile, Jesus nē bouwa buru nigin to fiyē di, Pailat yo ye fen, Jesus nē bouwa buru ĩ ifenēya nigin, kusĩ tamo

‡ 27:46: Sam 22:1 § 27:48: Maaĩwõ tamal safina taka, ku nanaal musei ado naan dũ fedig.

irokenēdin. ⁵⁹ Josef bouwa buru yale gabar lalau amuyē sã anim sile fen. ⁶⁰ Agef fen, ĩ yogon matmat mata sa bun ku yalen ani bun, Jesus nē bouwa buru inenen. ĩ meein odug wele fe di, isi, matmat awa ku katī fel fen, ilen. ⁶¹ Maria Magdala tamal, Maria taka ado, matmat wagen dibodon.

Kusī Tamo Matmat Lo Difen

⁶² Naa taka, Sabat naa nē dodok fiya naa anī bure fele di, pris odudug, Farisia tamo geid, Pailat wagen dilen. ⁶³ Idi diron, “Tamo Odug, amã karī maulef, idegēya tamo ĩ matan iyo ken, iron, ‘Naa towo bure fele di, aya laa bun tamal, baban mata kel fã auf.’ ⁶⁴ Age fiya nigin, õ urõ len, naa towo bun matmat total bagai tari difouf. Age fiya sãf, in dõ fiya tar disi, bouwa buru bē dale mã, tamo kayau didegneïd fen, ĩ laa bun tamal kel fã yel douf. Idegēya dum isiyouf anī gai sane bagai, uruwa nē wal fiyauf.”

⁶⁵ Pailat iron, “Lo fiya tamo tekelei waleg. Uleg fen, ã, taka nem matmat bun ileya nigin, total bagai katī feleya nigin, ã keleĩ anī kilei bagai, matmat agog total bagai lo gouf.” ⁶⁶ Anī nigin, idi dile, matmat bun meein teten wõ dũ dino fen, lo fiya tamo anī dinenen.

28

*Jesus Laa Bun Tamal Mata Kel Fã Yen
(Mak 16:1-10; Luk 24:1-12; Jon 20:1-10)*

¹ Sabat naa bure fele di, uub nē naa matu bun bonimei mumurei ado, Maria Magdala tamal, Maria taka ado matmat dilou fenē dilen.

² Sain anī bun kaisã bagai, mimĩ total ado wõ yen, ere nigin, Odug nē engel saa ilun tamal isin, matmat bun ilen, meein welef yerin ile di, teten ibodon. ³ Agef fen, in lo fiya kolimei filiya gen, in kolos lalau medeïya saa lalo lalau gen. ⁴ Matmat lo difen tamo, idi ĩ nigin kumĩ de, tererē de fen, laa tamo gen denenan.

⁵ Engel kayau irokenēdin, “To kumī wog, ere nigin, aya keleī, ā Jesus aa tetek bun dun anī umirnēgef. ⁶ Ī ein sã, ĩ iron kilei, mogo laa bun tamal mata kel fã yel. Usig fen, ĩ yenen modoũ uleg. ⁷ Agog fen, kaisã bagai uleg, in dō fiya tar urokenēdig: ‘Ī laa bun tamal kel fã ye fen, ĩ ketem Galili ilef. An ā ĩ ulogouf.’ Aya mogo ā arokeneim.”

⁸ Age ye di, kayau idi, kaisã bagai matmat ditor dilen, kumī den, anī ere, waud kulīya ado, Jesus nē dō fiya tar dirokenēdiyou fenē nigin gududu den. ⁹ Age de mog, Jesus tarabã feid fen, iron, “Fel.” Idi ĩ wagen disin, in ye dirou fen, seli dabin. ¹⁰ Age dife di, Jesus idi irokenēdin, “Ā, to kumī wog, uleg fen, neu turau tar idi, Galili dilauf nigin urokenēdig; idi an aya dileyauuf.”

Matmat Lo Fiya Tamo Neid Od

¹¹ Kayau naab luwe dile mog, matmat lo difen tamo tunī, taun namen dile, pris odudug bun, erab erab ganan wō yen anī nigin od dinon. ¹² Pris odudug, mudur adodo geid, guru de, kisi katō de fen, idi kusī tamo moni odug difenēdin. ¹³ Idi, matmat lo difen tamo dirokenēdin, “Ā urōgouf, ‘Jesus nē dō fiya tar bō disi fen, mainana kel mog, in bouwa buru bē dalen’ gouf.” ¹⁴ Od enī gawaman nē mudur bun ilauf are, amã faded mafiyē di, ā morō to walogouf.” ¹⁵ Anī nigin, kusī tamo moni dalen, idi diron kilei age difen. Od enī, Juda tamo kayau bun iyokelen, gamag agef yenek.

Jesus In Dō Fiya Tar Soosi Kabī Odug Ifenēdin

(Mak 16:14-18; Luk 24:36-49; Jon 20:19-23; Aposel 1:6-8)

¹⁶ Age fe di, in dō fiya tar ilewen Galili dilen, arei Jesus irokenēdin nē an dilen. ¹⁷ Sain idi Jesus dilen, idi seli dabinen, anī ere, tunī waud urun. ¹⁸ Age dife di, Jesus wagedin isin irokenēdin, “Megeir adok, saa ilun nē ado tenebur nē anī ganan, Negurem aya ifanan. ¹⁹ Anī nigin, ā, teneub

ganan bun, tamo kayau ganau bun uleg fen, neu dō fiya tar unenādigouf, Dei yana nem, Naal yana bunem, Awa Uur Fateul yana bunem, idi naan ugunēdigouf. ²⁰ Agog fen, od aya ā arokenein anī ganau dō difouf nigin ufelnēdigouf. Momoi bagai, aya ā geid sain faimud tabodok, ile, sain idikalauf bun.”

Mata Ifenēya Nē Od
The New Testament in the Marik Language of Papua New Guinea
Nupela Testamen long tokples Marik

copyright © 2011 Wycliffe Bible Translators, Inc.

Language: Marik

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 0868934534

The New Testament

in Marik

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-07-22

PDF generated using Haiola and XeLaTeX on 19 Oct 2021 from source files dated 20 May 2021

d7099f9d-3bdf-5620-8eb3-7e6c51cab7ea